

সান্বিজী ।

(পৌরাণিক নাটক ।)

[ষ্টার থিয়েটারে অভিনীত ।]

শ্রীক্ষীরোদপ্রসাদ বিদ্যাবিনোদ এম, এ,
প্রণীত ।

কলিকাতা

কলিকাতা ।

২০১ নং কর্ণওয়ালিস্ স্ট্রীট হইতে
শ্রীযুক্ত গুরুদাস চট্টোপাধ্যায় কর্তৃক প্রকাশিত ।

২৮নং বিডন রো, উইলকিন্স মেসিন প্রেসে

জে, এন, বক্স দ্বারা মুদ্রিত ।

১৩১১ ।

মূল্য ৥০ আট আনা ।

পুরুষ ।

যম ।

নারদ ।

মাণ্ডব্য ।

সত্যবান্ ।

হ্যমৎসেন	সত্যবানের পিতা ।
অশ্বপতি	সাবিত্রীর পিতা ।
সনাতন	অলিঙ্করার স্বামী ।
তুঙ্গুরু	মালাকার ।

কঙ্কী, ঋষিগণ, তাপসকুমার, কাঠুরিয়াগণ,
দূত ইত্যাদি ।

স্ত্রী ।


সাবিত্রী ।

অলিঙ্করা	মাণ্ডব্যের পালিত কন্যা ।
মালবী	সাবিত্রীর মাতা ।
শৈব্যা	সত্যবানের মাতা ।
মালিনী	তুঙ্গুর স্ত্রী ।

সপ্ত সতী, কাঠুরিয়া-স্ত্রী ইত্যাদি ।

প্রস্তাবনা ।

পরমা প্রকৃতি তুমি, সত্যী তুমি, গতি তুমি সার ।
(তুমি) চির মধুময় সোণার স্বপন, সুখা চির পিপাসার
তুমি সংসার তুমি প্রাণ,
অনাদি জীবনে আপন গান,
তুমি স্নেহ মায়া, পতি স্ত্রী জায়া, তুমিই জননী তার ।
(তুমি) আপন অঙ্গে জড়িতা রঙ্গে জলদে বিজলী হার ।



সানিভ্রীণ



প্রথম অঙ্ক



প্রথম দৃশ্য—নগরপ্রান্ত ।

কঙ্কী ।

কঙ্কী । এক এক ক'রে সমস্ত ভাট দেশে ফিরে এলো ।
কেউ রাজকুমারীর পাত্র আনতে পারলে না । এত বয়স
হ'ল, এমন অদ্ভুত ব্যাপার ত কখন দেখিনি । রাজার
মেয়ে,—তায় রূপে লক্ষ্মী,—এমন সর্বাঙ্গসুন্দরী কত্ভার
পাত্র মিললো না ! কেন ? কি দৈব-বিড়ম্বনায় ? কোন্
বিধাতার কি প্রেহেলিকাময়ী ইচ্ছায় ? কত্ভার মৌল বৎসর
বয়স উত্তীর্ণ হয় হয় হয়েছে । কত্ভার চিত্তায় রাজা ও
রাণী একরূপ উন্মাদ ব'লেই হয় । একরূপ অবস্থায় ভাটেরা
অমনি অমনি ফিরে এসেছে শুনলে, তাঁরা হতাশায়
জ্ঞানশূন্য হবেন । কি বলি ? কেমন ক'রে বলি ?

প্রতিদিন রাজা আমাকে ভাটেন্দ্রের প্রত্যাগমনের কথা জিজ্ঞাসা ক'রছেন, কিন্তু কোন্ মুখে বলবো—মহারাজ, এ পৃথিবীতে আপনার কণ্ঠার পাত্র নেই। যদি কোন দেবতা মানুষের মূর্তি ধ'রে বিবাহ ক'রতে আসেন, তবেই এ মেয়ের বিবাহ হবে, নতুবা উপায় নাই।

(তুশুরুর প্রবেশ ।)

তুশুর। যা বলে'ছো ঠাকুর!—আপনা আপনি মনের হুখে যা প্রকাশ ক'রে বল'ছো, সব ঠিক।

কঞ্চুকী। কে ও, তুশুর ?

তুশুর। আর তুশুর। বাপের বড় পুণ্য ছিল, তাই মানে মানে যে তুশুর সেই তুশুর ফিরে এসেছি, নইলে জগৎম্পো হয়ে গিয়েছিলুম আর কি !

কঞ্চুকী। জগৎম্পো কিরে !

তুশুর। আর কিরে!—পিঠে অনবরত বাড়ি পড়লে, জগৎম্পোই বা কেন—ঢাক হয়ে যেতুম। কেবল “যঃ পলাতি স জীবতি” ক'রে, পালিয়ে এসে বেঁচেছি। শাস্ত্রে ব'লেছে অশ্বো ধাবতি, গৌ শকায়তে, আর চৌরঃ পলায়তে। ধাবতিই কর. আর শকায়তেই কর বাবা, চোর যে, সে চিরকাল যেমন সমভাবে পালিয়ে আসছেন, আজও পর্যন্ত সে নিয়মের ব্যতিক্রম ক'রলেন না। তা সিঁদই দিন, আর গাঁটই কাটুন, ধরাং ন পড়তি। পালাতে শিখেছিলুম, তাই বেঁচে এসেছি। তোমরা হ'লে ধরা পড়েছিলে আর কি !

কঞ্চুকী । ধরতে এসেছিল কে ?

তুষুরু । ওই ওঁরা ।

কঞ্চুকী । ওরা ?—ওরা কারা ?

তুষুরু । বাবুয়া ।

কঞ্চুকী । বাবুয়া কিরে পাগল ?

তুষুরু । এলেই দেখতে পাবেন । তাঁরা সব আজই রাজ-
বাটিতে আগমন ক'রছেন । এলে আপনার সঙ্গে কোন্
না দেখা হবে ? শুনলুম—দিদিরাণীর যে পাত্র সন্ধান
ক'রে এনে দিতে পারবে, সে অর্দ্ধেক রাজ্য পুরস্কার
পাবে । ভাবলুম—অল্প মেহনতে যদি বড় মানুষ হয়ে
যাই, তা হ'লে বাজে খেটে মরি কেন ? এই না ভেবে
কঞ্চুকি মশায়, পাত্রের সন্ধান ত বেরলুম ।

কঞ্চুকী । তার পর ?

তুষুরু । তার পর গ্রামের পর গ্রাম, দেশের পর দেশ,—সাত
সমুদ্র তের নদী—কোন জায়গা খুঁজতে বাকি রাখলুম
না ।

কঞ্চুকী । তার পর ?

তুষুরু । তার পর—বাবা ! যেখানে যাই, সেইখানেই বাবা ।
একটা ক'রে মানুষ ধরি, আর তার কাছে দিদিরাণীর
রূপের কথা বর্ণনা করি, অমনি একটা ক'রে বাবাজী
লাভ হয় । সম্প্রকটা নতুন পাতান গেল কঞ্চুকি মশায় ।
দিদিরাণীর রূপের বর্ণনা শোন্বা মাত্রই তারা অমনি ভুঁয়ে
স্রাষ্টাঙ্গ হয়ে মা ব'লে প্রণাম করে । আর সেই সঙ্গে
আমাকেও একটা । বলে—এ শুভ সংবাদ নিয়ে কে তুমি

বাবা!—কে তুমি আমাদের ছলতে এসেছ বাবা? কঙ্কুকি মশায়, ব'ল্বে কি? দিদিরাণীর বের সম্বন্ধ ক'রতে ক'রতে লাথ লাথ বাবাজী ষোঁগাড় ক'রে এসেছি। শেষে বাবাদের জ্বালায় প্রাণ যায় যায় হয়ে উঠলো। যেখানে যাই, সেইখানেই বাবা!—লোকের ঘরে ঢুকি, সেখানে গুনি না বাবা। বনে পালাই, দেখি না বাবা জঙ্গল হয়ে জমে আছে। গাছে উঠি, দেখি না বাবা ফল হয়ে ঝুলছে! জলে ডুবলুম, কঙ্কুকি মশায়, সেখানেও দেখি না এক বাবা!—তুই কে রে বাবা? আজ্ঞে আমি গাঙ্গদাড়া। তা গাঙ্গদাড়া বাপধন, তুমি এখানে কেন? তিনি অমনি ব'লে উঠলেন,—“আমি মৌনবংশাবতংস। তুমি মায়ের দাস, স্ততরাং তোমার সঙ্গে আমার ঘনিষ্ঠ সম্বন্ধ।” এই কথা ব'লেই, গাঙ্গদাড়া বাপধন চোৎ ক'রে অগম জলে প্রবেশ ক'রলেন। জল থেকে উঠে, কাণ ঝাড়তে ঝাড়তে—ব'ল্বে কি কঙ্কুকি মশায়!—ফড়ফড় ক'রে হাজার খানেক বাবা বেরিয়ে গেল।

কঙ্কুকী। দূর পাগল, নে গথ ছাড়্।

তুধুরু! দোহাই কঙ্কুকি মশায়, নিথো নয়। সমস্ত পৃথিবী ঘুরে, এক গাদা বাবা শব্দ কাণে ঢুকেছিল। ছোট কাণ, তাতে অত বাবার জায়গা কোথায়? কাজেই একটু নাড়া পড়তেই সত অতিরিক্ত বাবা ছেল, সব ফড়ফড় ক'রে বেরিয়ে গেল। নানা কারণে প্রাণটা বড়ই চ'টে গেল। শেষে মনে ক'রলুম—বয়স্ পাত্র ত পাওয়া যাবেই না, অথচ পাত্র না পেলে আমার রাজ্যলাভও হচ্ছে না, এই

না ভেবে কঞ্চুকি মশায়, এক বুদ্ধি ক'রে ফেল্‌লুম ।
আচ্ছা ঠাকুর, আমার একটা কথার জবাব দাও
দেখি ।

কঞ্চুকী । কিসের ? তোর পাগলামীর জবাব দেবো !

তুষুর । পাগলামী নয় কঞ্চুকি মশায়—পাগলামী নয় । স্বয়ং
বেষ্পতি ঠাকুরের টোল থেকে আমদানী করা বুদ্ধি ।
তুমি জবাবই দাও না । বল দেখি, পাত্রে বয়স কত
হ'লে ভাল হয় ?

কঞ্চুকী । এই চব্বিশ পঁচিশ ।

তুষুর । উঃ ! তা হ'লে ভারি লোকমান ক'রে এসেছি কঞ্চুকি
মশায়, ভারি লোকমান ক'রে এসেছি । হাতে পেয়ে পাত্র
ফেলে দিয়েছি :

কঞ্চুকী । সে কিরকম ?

তুষুর । চমৎকার—চমৎকার !

কঞ্চুকী । বলিস কিরে !

তুষুর । খাঁটি চব্বিশ বছর ।

কঞ্চুকী । আস্তে চায় ?

তুষুর । তার আর আসা আসি কি, আনগেই হ'লো ।

কঞ্চুকী । দেখতে কেমন ?

তুষুর । পাঁচ মিশিলি—খানিকটে ফরসা, খানিকটে কাল,
খানিকটে বা নেটে নেটে, খানিকটে বা চাপাফুলের
মতন । কথা কর—খানিকটে আধ আধ, খানিকটে
ভাঙ্গা ভাঙ্গা, খানিকটে খোনা খোনা, খানিকটে বা
কলকণ্ঠ । বুদ্ধি—খানিকটে নেই ব'লেই হয়, খানিকটে

টনটনে। খানিকটে বেঙ্গতি, খানিকটে ভূমি, খানিকটে আমি,—এই রকম।

কঞ্চুকী। এ সব কি বল্‌ছিন্‌ ?

ভুশুক। বুঝতে পারছ না, তবে বলি শোন। পৃথিবী ঘুরে ঘুরে যখন দেখলুম, একটাও পাত্র মিললো না, তখন গোটা চেরেক ছ-বছরের ছেলে জোগাড় ক'রলুম। বল্‌ব কি কঞ্চুকি মশায়, যে ছেলেটাকে জিজ্ঞাসা করি 'বে ক'রবি ?' সেইটেই বলে 'কর্কো'। আমি মনে ক'রলুম—এইবারে ঠিক হয়েছে। একে চব্বিশ বছর যখন পাওয়া গেল না, তখন চারটের চব্বিশ ক'রে নিয়ে যাই। এই না ভেবে চারটে ছেলেকে—একটাকে মাথায়, দুটাকে ছ বগলে, আর একটাকে শিকে ক'রে গলায় ঝুলিয়ে আনতে লাগলুম। বেশ আসছিলুম, চারটে ছেলেকে চুরি ক'রে বেশ গোছ-গাছ ক'রে আনছিলুম, পথে আস্তে আস্তে শিকে ছিঁড়ে গলার ছেলেটা টিপ ক'রে প'ড়ে গেল,—সামলাতে গিয়ে মাথার ছেলেটা টাউরি খেয়ে গড়াতে শুরু ক'রলে। দেখতে দেখতে বগলও ফসকে গেল। তখন এটা সামলাতে হটা যায়, ওটা সামলাতে সেটা যায়। ট্যা ভ্যা লেগে গেল—দেখতে দেখতে হলপুল কাণ্ড ! যাদের ছেলে চুরি ক'রে আনছিলুম, তারা না শব্দ শুনে 'মাঠে : মাঠে :' ক'রে আমার দিকে ছুটে এলো—আমিও অমন 'বাবারৈ বাবারৈ' ক'রতে ক'রতে দে ছুট।

কঞ্চুকী। বুঝতে পেরেছি—এইবারে গান্‌।

ভুশুক। সত্যি কঞ্চুকি মশায়, রাজকুমারীর পাত্র ত চব্বিশ

বছুরে একটা পাওয়া যাবেই না—এই রকম চার পাঁচটায় চব্বিশ চাও ত, যত চাও এনে দিতে পারি। কঞ্চুকি মশায়, সরে পড়, সরে পড়—ওই এক বাবা আসছেন। উনি বরাবর আমার সঙ্গে নিয়েছেন। উনি ধাড়ী বাবা,—ওঁর সঙ্গে ছ-চারিটা খুচরো বাধাও আছেন। উনি যদি করেন ‘মাতৈঃ’, তাঁরা করেন ‘মাস্ত্র ভৈষীঃ’—বাপ! প্রাণটা গিয়েছিল আর কি! কি বিভীষিকা!

কঞ্চুকী। কোন মহাপুরুষ যেন এদিকে আসছেন না?

তুঙ্গুক। নিশ্চয়—মহাপুরুষ, তাতে আর সন্দেহই নেই। তবে কি জান কঞ্চুকি মশায়, ওঁকে যে বাগিয়ে গায়ে হাত টাত বুলিয়ে, তুমি রাজকুমারীর পাত্র ক’রে বস্বে, আর সেই সঙ্গে মজা ক’রে অর্দ্ধেক রাজ্য মেয়ে দেবে, সেটা হচ্ছে না।—সে শুড়ে বালি। ওঁর কাছে গিয়ে যেমন প্রস্তাব ক’রলুম যে, বুড়ো ঠাকুর, একটা কত্তা আছে,—সেটার ষোল বৎসর পার হয়ে যায়, কাজেই বাপ মার ধর্ম যায়, কেউ তাকে বে ক’রতে চায় না—তুমি সেটাকে বে কর না। শুনেই বুড়ো ঠাকুর ব’লে ‘ষোল বছরের মেয়ে?’ আমি ব’ললাম—হাঁ দেবতা। ‘কেউ বে ক’রতে চায় না?’ আমি বললাম—না দেবতা। তখন ঠাকুর মেয়ের রূপের কথা জিজ্ঞেস ক’রলে। আমি মনে ক’রলুম, বুঝি ঠাকুর বাগে এলো। এই না ভেবে, দেদার রূপ বর্ণনা ক’রতে লাগলুম। ‘রূপের বর্ণনা শুনতে শুনতে ঠাকুরের চোক বুজে আসতে লাগল। দেখতে দেখতে টস্ টস্

জল—দেখতে দেখতে দমবন্ধ—পেট ফুলে ঢাক—গেল
 গেল—মনে ক'রলুম বুঝি ব্রহ্মহত্যা হ'লো! কাজেই
 ঠেলাঠেলি ক'রতে লাগলুম। অনেক ঠেলাঠেলির পর
 ছম্ ক'রে এক দীর্ঘ নিশ্বাস। তার পর না উঠেই,
 আমাকে একেবারে—এই যেমন সেয়াকুলে কাপড় জড়ায়
 —এই এমনি ক'রে (কঞ্চুকীকে বেঁটন) জড়িয়ে ধ'রলে।
 বললে—তুমুঝরে! এতদিন কোথায় ছিলি রে!

কঞ্চুকী। হাঁ হাঁ—করিস কি—করিস কি!

তুমুঝ। র'স, ভাল করে বুঝিয়ে দিই।

কঞ্চুকী। আরে গেল—ছাড়্ ছাড়্।

তুমুঝ। শেষে জড়াজড়ি থেকে গড়াগড়ি—সেটা কিরকম
 দেখিয়ে দেবো?

কঞ্চুকী। যা, যা,—আর দেখাতে হবে না।

তুমুঝ। বে আজ্ঞে—ঐ ঠাকুর আসছে, তা হ'লে জড়াজড়িতে
 ঔর কাছেই দেখে নিয়ো। ঔর শুনেছি নাছোড়বান্দা
 পিরীত। শুনেছি—একবার উনি শূলে বসেছিলেন!

কঞ্চুকী। শূলে বসেছিলেন?

তুমুঝ। হাঁ—তা এমনি কৌশল ক'রে বসেছিলেন যে, বসবা-
 মাত্রই ঘুম। হাজার বৎসরে সে ঘুম ভাঙেনি।

কঞ্চুকী। শূল!—তবে কি উনি মহাতপা মাণ্ডব্য?

তুমুঝ। এই—তবে ত তুমি সব থবর রাখ। ওই গো ঠাকুর,
 উনি আপনাকে দেখে এই দিকেই আসছেন। তুমি ঔর
 সঙ্গ আলাপ কর, আমি পলায়ন করি।

[তুমুঝর প্রস্থান।]

প্রথম অঙ্ক ।

(মাণ্ডব্যের প্রবেশ ।)

কঙ্কী । আসুন দয়াময় !—আমার প্রণাম গ্রহণ করুন ।

মাণ্ডব্য । বিষ্ণবে নমঃ ।—আপনি কে ?

কঙ্কী । অধীন—রাজকঙ্কী ।

মাণ্ডব্য । মহারাজ কি রাজধানীতে অবস্থান ক'রছেন ?

কঙ্কী । আজ্ঞে হাঁ প্রভু । কোথায় আপনার গমন হচ্ছে ?

মাণ্ডব্য । তীর্থ পর্য্যটনে ।

কঙ্কী । মহারাজের প্রতিনিধিস্বরূপ রাজগৃহে আপনার পদ-
ধূলি ভিক্ষা করি ।

মাণ্ডব্য । পদধূলি নয় ব্রাহ্মণ,—মহারাজ অশ্বপতির ঘবই আজ
আমার গন্তব্য তীর্থস্থান ।

দ্বিতীয় দৃশ্য—রাজবাটী ।

অশ্বপতি ও মালবী ।

মালবী । মহারাজ, আর ত লোককে বুঝিয়ে রাখতে পারিনি ।

অশ্ব । বিষয়টা কি মহিষি যে, লোকেরা তোমার কাছে বোঝ-
বার জন্য এত উদ্গ্রীব হয়েছে ?

মালবী । লোকের উদ্গ্রীব হবার কারণ কি, মহারাজ কি
জানেন না ? কত যে ষোল বচ্চর পার হয় । বাড়ীতে
যে আসে, সেই জিজ্ঞাসা করে—রাজকুমারীর বিবাহ-
যোগ্য বয়স উত্তীর্ণ হয়ে যাচ্ছে, অথচ তাকে পাত্রস্থা করা
হচ্ছে না কেন ?

অশ্ব। সে কি আমাকেও জিজ্ঞাসা ক'রছে না মহিষি ? কিন্তু কি ক'র্ব্ব, আমি ত চেষ্টার ক্রটি ক'রছিনি। সমগ্র ভারতের মধ্যে এমন স্থান নেই, যেখানে সাবিত্রীর পাত্রের অনুসন্ধান লোক না পাঠিয়েছি। নানা দেশ থেকে কত স্নলক্ষণযুক্ত পাত্রও ত এলো, কিন্তু কেহই ত তোমার মেয়েকে বিবাহ ক'রতে চায় না। তোমার মেয়ের অদৃষ্টে পাত্র জুটেও জুটছে না, তা আমি কি ক'র্ব্ব ?

মালবী। এ কথা কি লোকে বিশ্বাস করে ? তারা মনে করে, আপনি ইচ্ছা পূর্ব্বক কন্যাকে কুমারী রেখেছেন।

অশ্ব। মনে যদি করে, তা হ'লেই বা কি ক'র্ব্ব ? লোকের মনের উপর আধিপত্য ক'রতে পার্ব্ব, এমন পুণাই বা কি ক'রেছি। যথার্থ কথা ব'লতে কি মহিষি, এক সাবিত্রীর জন্ত আমার এত সৌভাগ্যও স্মৃথ নাই। সাবিত্রীর জন্ত দিবরাত্র চিন্তাতারাক্রান্ত হৃদয়ে আমি জীবন্ত হয়ে অবস্থান ক'রছি। মনে মনে ভাবছি যে, করলুম কি ? আঠার বৎসরের কঠোর সাধনায় দেবতার দ্বারে ভিক্ষা ক'রে, অশান্তি ঘরে নিয়ে এলুম ! যৌবনস্থা কন্যা, কুমারী অবস্থায় চক্ষের উপর বিচরণ ক'রছে। চক্ষের উপর যেন পিতৃপুরুষের অধোগতি দেখতে পাচ্ছি। দশম বর্ষ পর্য্যন্ত বালিকাদের কঙ্কাকাল। মায়ের আমার সে কঙ্কাকাল বহুদিন উত্তীর্ণ। এখন দেখছি কুমারী-কাল পর্য্যন্ত উত্তীর্ণ হয়ে যায়। আমি নিজেই আমাকে কি ব'লে যে প্রবোধ দিব, তাই বুঝতে পারছি না ; তা

তোমাকে আবার কি প্রবোধ দিব প্রাণেশ্বরী ! দেবতা-
আরাধনায় কতাপ্রাপ্তি । যদি আমার ধর্মলোপই তাঁর
অভিপ্রায় হয়, তা হ'লে বৃথা অনুশোচনায় ক'রব কি ?

মালবী । তবে কি আমার সাবিত্রীর বিবাহ হবে না ?

অশ্ব । হবে কি না হবে, বিধাতাই ব'লতে পারেন । আর
যদিই বিবাহ হয়, তা হ'লেই, ষোড়শ বর্ষ উত্তীর্ণ হয়ে
হ'লেই বা ফল কি ? আমাকে ত ধর্ম্মে পতিত হ'তে হ'ল ।

মালবী । হা ভগবান্, এ কি বিড়ম্বনা ! এমন সর্বশূলক্ষণা,
ধীরা, সান্বী—এমন ভক্তিমতী—দেখলে বোধ হয় যেন
সাক্ষাৎ কৈলাসেশ্বরী সতী কতাক্রমে আমার ঘরে অব-
তীর্ণা । আমার এমন কত কি না পতিভাগ্যে বঞ্চিত !

অশ্ব । সে দুঃখ আর আমার কাছে ক'রে কি ক'রবে ? আর
আমার কাছে দুঃখ জানিয়েই বা লাভ কি ? সর্বশূলক্ষণা
হয়েই ত মা আমাকে বিপন্ন ক'রেছেন । মা আমার
শক্তিস্বরূপিণী, প্রভাতারুণবর্ণা, সকল কোমলতার আধার
হয়েও তেজোময়ী । যে দেখে, তারই মনে দেবীভ্রমে
ভক্তির উদ্রেক হয় । মাতৃজ্ঞানে সকলেই তার চরণ-
প্রান্তে মস্তক অবনত করে । এরূপ অবস্থায় তোমার
মেয়ের কেমন ক'রে বিবাহ হয় ? সাবিত্রী দেবীর
আরাধনায় আমি এ কতদূর লাভ ক'রেছি । জানি না,
দেবীর মনে কি আছে ।

মালবী । দেবীর মনে কি আছে, সে বুঝতে কি আর এতকাল
যায় ? কুলরক্ষার জন্ত পুত্রকামনায়, আপনি আঠার
বৎসর ধ'রে কঠোর তপস্যায় সাবিত্রী দেবীর অর্চনা

ক'রলেন, কোথা থেকে প্রজ্ঞাপতি ব্রহ্মা কিনা ওপর-পড়া হয়ে বর দিতে এলেন। আরে রাম রাম, দেবতারাও কিনা আমার অদৃষ্টে প্রভারক হ'ল! কুলধর্ম-রক্ষার জন্ত তপস্বী—পুত্রের কামনায় যজ্ঞ,—ফল হ'ল কিনা কত! তা হোক, সাবিত্রীকে পেয়ে আমি শতপুত্র-লাভের আনন্দ পেয়েছিলুম। কিন্তু মহারাজ, তাকে এ অবস্থায় দেখে কেমন ক'রে নিশ্চিন্ত থাকি! চক্ষের উপর কুলনাশ কেমন ক'রে দেখি! পিতৃপুরুষের অধোগতি স্মরণ ক'রে প্রাণ আমার বড়ই কাতর হয়ে উঠেছে। মহারাজ, হতাশ হ'লে চলবে না। এখনও সময় আছে। আর একবার চেষ্টা করুন। পাত্রে সন্ধানে আর একবার দেশবিদেশে লোক প্রেরণ করুন। অবশ্যই সাবিত্রী দেবী আপনার মনস্কামনা পূর্ণ ক'রবেন।

অখ। আমি কি নিশ্চিতই আছি প্রাণেশ্বর! আবার আমি দেশ বিদেশে লোক পাঠিয়েছি। দেখি তারা কতদূর কি ক'রে ওঠে। তারা যখন না পারবে, তখন নিজে আমি একবার পাত্রে সন্ধানে বহির্গত হব। তাতেও যদি না হয়, তখন কুলধর্ম-রক্ষার জন্ত শাস্ত্রের যে আদেশ, তাই পালন ক'রব।

মালবী। কি ক'রবেন?

অখ। কি ক'রব,—কি ক'রব—মালবি, জিজ্ঞাসা ক'রোনা। রমণী তুমি—কোমলা। তুমি সে কঠোর বাক্য শোন্বার যোগ্য নও।

মালবী। তবু শুনি।

অশ্ব । সে বাক্যের একটা একটা অক্ষর, সহস্র বজ্রের বলে তোমার কোমল বক্ষে আঘাত ক'র্বে। মালবি, তুমি সহ্য ক'র্তে পারবে না ।

মালবী । যখন সে কার্য্য ক'র্বেন, তখন যদি সহ্য ক'র্তে পারি, তাহ'লে এখন শুনে সহ্য ক'র্তে পারব না কেন ?

অশ্ব । শাঙ্গের ব'লেছে—কুলরক্ষার জন্ত যদি লোক পরিত্যাগ ক'র্তে হয়, তা হ'লে লোক পরিত্যাগ ক'র্বে। গ্রামের জন্ত কুল ত্যাগ ক'র্তে হয়, কুলত্যাগ ক'র্বে। দেশের জন্ত যদি গ্রাম ত্যাগ প্রয়োজনীয় হয়, ত গ্রাম ত্যাগ ক'র্বে। আর আত্মার জন্ত যদি পৃথিবী পরিত্যাগের প্রয়োজন হয়, তাহ'লে যে দণ্ডে আত্মার বিভীষিকা উপস্থিত হবে, সেই দণ্ডেই এই স্বর্গাদপি গরীয়সী জন্মভূমিকেও পরিত্যাগ ক'র্তে কুণ্ঠিত হবে না। রাগি, সাবিত্রীর জন্ত যদি কুলধর্ম্মনাশের সম্ভাবনা দেখি, তাহ'লে অমন সোণার মেয়েকেও আমাকে বিসর্জন দিতে হবে !

মালবী । হা ভগবান্, এই কি স্বামীর আমার কণ্ঠের তপস্তার পরিণাম ! মহারাজ, সমগ্র রাজ্য যৌতুক দেবার ঘোষণা দিয়ে পাণ্ডুর সন্ধানকরুন না কেন ?

অশ্ব । রাগি, সাবিত্রীকে যে পত্নীরূপে গ্রহণ কর্ত্তে সমর্থ, সে কি তুচ্ছ রাজ্যের ভিখারী ।

(দূতের প্রবেশ)

অশ্ব । কি সংবাদ ?

দূত । সংবাদ শুভ নয় । সমস্ত কাট বিফল হইয়া ফিরে এসেছে ।

মালবী। সমস্ত ভারতের মধ্যেও আমার কন্ঠার একটা পাত্র
মিলল না ?

দূত। রাজপুত্রদের উন্নততার সংবাদ সমস্ত ভারতে রাষ্ট্র
হয়েছে ? কোন রাজপুত্র রাজকুমারীকে বিবাহ করিতে
স্বীকৃত হয় না। কোন রাজাও আপন সন্তানকে মদ্র-
দেশে পাঠাতে চায় না।

অশ্ব। তাহ'লে কন্ঠার বিবাহের আশা পর্যন্ত জলাঞ্জলি।

দূত। তাই ত কার্য্যতঃ দেখছি মহারাজ ! এত বয়স হ'ল,
এরূপ বিচিত্র ব্যাপার ত কখন দেখিনি ! ভাটেরা ব'লে
—মায়ের নাম শোন্‌বামাত্রই লোকে সেই দূরদেশ থেকে
উদ্দেশে তাঁকে প্রণাম করে। কেউ কি তাহাদের কাণে
কাণে ব'লে দেয় যে, দেবী আমাদের ঘরে কন্ঠারূপে
অবস্থান ক'রছেন ?

মালবী। তা হ'লে কি হবে ? মহারাজ, কি হবে ? মহারাজ,
দাসীর প্রতি দয়া করুন। মায়ের প্রাণ—অভাগিনীর
মায়ের প্রাণের দিকে একবার দয়া করে দৃষ্টি নিক্ষেপ
করুন।

অশ্ব। দারুণ কর্তব্য—প্রজারঞ্জন, লৌকিকতা-ধর্ম্ম-রক্ষা।
বুঝতে পেরেছি, আমার জীবনের সমস্ত সাধ আকর্ষণ
ক'রে, অকূল হৃৎসাগরে নিমজ্জিত ক'রবার জন্ত, আমার
কামনার শান্তি দিতেই যেন বিধাতা আমার গৃহে এ কন্ঠা
পাঠিয়েছেন।—সোৎসুক নয়নে সমস্ত প্রজা আমার পানে
চেষ্টে আছে। আজ আমি হ'তে যদি সমাজ-ধর্ম্মনাশ হয়,
তাহ'লে সর্ব্বনাশ হবে—সর্ব্বনাশ হবে। মানুষ একে

প্রথম অঙ্ক।

স্বভাবতই স্বাধীনতাপ্রিয়। সুতরাং তারা যদি একবার আমার আচার দেখে প্রশ্রয় পায়, তা'হলে অল্পদিনের মধ্যে কুলজীর্ণ আপন আপন মর্যাদার হানি ক'রবে। বর্ণসঙ্করের সৃষ্টি হয়ে পাপের প্রথর শ্রোতে চক্ষের নিমেষে সমাজ ধ্বংসপ্রাপ্ত হবে।

মালবী। মহারাজ, বহুশতাব্দী ত্রিকালদর্শী ব্রাহ্মণও ত আপনার সহায় আছেন। এ দারুণ-বিপত্তি-সময়ে তাঁহাদের শরণা-পন্ন হো'ন না কেন।

(কঞ্চুকীর প্রবেশ।)

কঞ্চুকী। মহারাজ, মহাতপা মাণ্ডব্য ঋষি আপনাকে আশীর্বাদ ক'রতে এসেছেন।

অশ্ব। মালবি, সত্তর ঋষিরাজের জন্তু পাদ্য অর্ঘ্য নিয়ে এসো। মা জগদীশ্বরী এতদিন পরে সন্তানের প্রতি কৃপা-কটাক্ষে চেয়েছেন। শীঘ্র যাও, শীঘ্র যাও।

[প্রস্থান।

মালবী। নারায়ণি! মা! এ কুলক্ষয়রূপ মহাপাতক হ'তে স্বামীকে আমার রক্ষা কর।

তৃতীয় দৃশ্য—অলিন্দ্য।

মাণ্ডব্য।

মাণ্ডব্য। তাইত ভাবি, এ কি বিচিত্র ঘটনা! প্রতি প্রভাতে যথারীতি স্নানান্তে আহ্নিক করি, তথাপি প্রাণে তৃপ্তি পাই না কেন? আমি নিজেই কি যথারীতি দেবার্চনা

ক'রতে অসমর্থ হয়েছি ; না নিত্য নিত্য এ তৃপ্তি আমার, কেন নিশাচর কিংবা নিশাচরী কর্তৃক অপহৃত হয়েছে । প্রতিদিন চিন্তা ক'রেছি, কিন্তু কোন উপায়েই এতদিন আমার এ ভাবনার মীমাংসা হয় নি । ধ্যানান্তে উন্মীলিত চক্ষে ভগবতী গায়ত্রীর চিদাভাস দেখতে আকাশ পানে চেয়েছি, দেখি আকাশস্থল স্নান !—প্রাণের আবেগে নবোদিত অরুণের অভ্যন্তর অনুসন্ধান ক'রেছি, দেখি আদিত্য-হৃদয়ে জ্বাকুসুমসঙ্কাশা ছাতিময়ী ভুবনোজ্জল-করী কুমারীশ্রীর কিরণময় সিংহাসন শূন্য ! প্রাণের যাতনায়, মায়ের অনুসন্धानে আমি ভুবন প্রদক্ষিণ ক'রে এসেছি, সমস্ত পরিশ্রম নিষ্ফল । মা যে আমার ধানের সীমান্তে অবস্থান ক'রছেন, তা কেমন ক'রে জানবো ? কিরণমালিনি ! বেদরূপা জননি ! অধম সন্তানকে লুকিয়ে ষোল কলায় পূর্ণ হয়ে তুমি যে মদ্ররাজগৃহে অবস্থান ক'রছ, তা ত জানতুম না মা ! কিরণময়ী আজ পতিব্রতা মাহাত্ম্য-প্রচারের জন্ত মানবী-মূর্তিতে ধরায় অবতীর্ণা । মা, মা, ইষ্টদেবি সাবিত্রি ! অধম সন্তান আজ তোরা মানবী মূর্তি দেখতে এসেছে । দেখা দিবি কি মা ? কত্যা হয়ে মদ্ররাজের ঘর কেমন ক'রে আলো ক'রে আছ, দেখবার জন্ত প্রাণে আমার বড়ই অস্থিরতা । মা ! দেখা দে, দেখা দে ।

(অশ্বপতির প্রবেশ)

অশ্ব । আশ্বন দয়াময়, আশ্বন, এ দার্সের গৃহ পবিত্র করুন ।

[প্রণাম ।

মাণ্ডব্য । অয়োহস্ত মহারাজ !

(মালবীর প্রবেশ ও পত্র পুষ্প মাণ্ডব্য-চরণে
প্রদান ।)

সর্কাতীষ্ট পূর্ণ হো'ক মা, চিরায়ুতী হও ।

মালবী । প্রভু, আসনে উপবেশন করুন ।

মাণ্ডব্য । এই যে বসুঁছি মা, তার জন্ত ব্যস্ত হবার কোনও
প্রয়োজন নেই । তুমি মা, ত্রিলোক-বিশ্রুতা ধর্মরতা ।
তোমার গৃহে আতিথ্য গ্রহণ, অতিথির বহুভাগ্যের কথা ।
মহারাজ ! আমি বহুদেশ, বহুরাজ্য, বহুতীর্থ পূর্ণাটন
ক'রে এই পথ দিয়ে পুণ্যতীর্থ কাশী গমন ক'রছিলাম ।
পথে আসতে আসতে স্তন্যলুম—তোমার গৃহে পবিত্রা
ভক্তিময়ী, সদহুষ্ঠানচারিণী, ষোড়শী কুমারী অবস্থান
ক'রছেন । শুনেই বুঝলাম, মা অন্নপূর্ণা যখন নিকটেই,
তখন তাঁকে দর্শন ক'রতে আবার অতদূরে যাবার প্রয়ো-
জন কি ?

অথ । বলেন কি প্রভু !

মাণ্ডব্য । শাস্ত্রসম্মতা কুমারী যদি ষোড়শী হন, তিনি স্বয়ং
অম্বিকা । তিনি পার্শ্বিক জীবনে, নারীদেহে মাতৃ-মূর্তি ।
সর্কজীবের—সর্ক মানবের—এমন কি, সর্কদেবতারও
নমস্তা । এমন কথাকে যিনি বিবাহ করেন, তিনি
নরদেহে উমাপতি । মহারাজ ! আপনি গিরিপতি
হিমালয় তুলা ভাগ্যান্ধ । মা মদ্ররাণি ! তুমিও উমা-
জননী মেনকার ছায় মহাভাগ্যবতী ।

অশ্ব । বলেন কি প্রভু, এ সব কি কথা ! আমি যে আপনার
এ অদ্ভুত লোমহর্ষণকর বাক্যে জ্ঞানশূন্য ।

মাণ্ডব্য । আমি শাস্ত্র-কথাই ব'লছি মহারাজ ।

মালবী । আপনার কোন্ শাস্ত্র মান্বো দেবতা ? আপনি
এখন দেবী দর্শন ক'রতে কাশী যাওয়া বন্ধ ক'রে এখানে
এসে উপস্থিত হয়েছেন । আমরা কিঙ্ক যে দেবীর
জালাম্ব বাই !

মাণ্ডব্য । সে কি রকম মা ? মা কি আমার চঞ্চলা ?

মালবী । চঞ্চলা হ'লেও দুঃখ ছিল না । মা যদি আমার যথা-
র্থই দেবী হন, তা হ'লে রণ-রঞ্জিণী মূর্তি ধ'রে এলেও,
আমি বুকের ধন বুকে তুলে নিতুম । যদি মা আমার এ
অভাগিনীর ঘরে আস্‌বার সময়ে দয়া ক'রে তাঁর দেবা-
টাকেও তাঁর সঙ্গে ক'রে নিয়ে আসতেন ! আপনার
দেবী যে এখন আমাদের চতুর্দশ পুরুষ পর্য্যন্ত নরকস্থ
ক'রতে ব'সেছেন ।

মাণ্ডব্য । এসব কি ব'লছ মা, আমি যে সম্যক্‌ প্রণিধান ক'রতে
পারছি না ।

অশ্ব । ঠাকুর, কল্যাণদাসে অস্থির হয়ে প'ড়েছি ।

মালবী । ঠাকুর, শত চেষ্টা ক'রেও, সাবিত্রীর আমার বর
জুটলো না ! কি হবে দেবতা ? কি ক'রে ধর্ম রক্ষা
হয় । কি ক'রে লোকনিন্দার হাত থেকে নিস্তার পাই !

মাণ্ডব্য । বর জুটলো না ! মা কি আমার কুংসিতা ?

মালবী । বড় কুংসিতা ঠাকুর, বড় কুংসিতা । আপনাদের
শচী, লক্ষ্মী, সরস্বতীই বা কি কুংসিতা !—আপনাদের

উমারাগীই বা কত কুৎসিতা ? অন্তর্যামী ঠাকুর, প্রাণের
যাতনায় কাতর হয়ে আপনার ত্রীচরণে আশ্রয় গ্রহণ
ক'রলুম, আপনিও কিনা সময় বুঝে রহস্ত কর্তে এলেন।
মা আমার কুৎসিতা ? ব্রহ্মাণ্ডের সৌন্দর্য্য মা আমার
ক্ষুদ্র দেহে আয়ত্ত ক'রেছে—সে মা আমার কুৎসিতা ?
মাণ্ডব্য। ভাল, মাকে একবার আন দেখি। দেখে শুনে
বুঝে দেখি, ব্যাপার খানা কি !

অশ্ব। যাও মহিষি, শীঘ্র সাবিত্রীকে এখানে নিয়ে এস।

মালবী। ও সব ব্যাপার বোঝাবুঝি আমি বুঝি না। যখন কৃপা
ক'রে আপনার দাসদাসীর গৃহে পদার্পণ ক'রেছেন, তখন
আমাদের একটা গতি না ক'রে পায়ে ঠেলে যে চ'লে
যাবেন, সেটি হচ্ছে না।

অশ্ব। ভাল, আগে সাবিত্রীকে নিয়েই এস, তার পর যা ব্ল-
বার ব'লো।

[মালবীর প্রস্থান।]

মাণ্ডব্য। (স্বগত) মায়ের আগমনবার্তা জানবার জন্ত প্রাণে
বড়ই কৌতূহল জেগে উঠেছে। (প্রকাশে) সাবিত্রী—
সাবিত্রী—কি সুন্দর নাম ! এ নাম কোথা পেল
মহারাজ ?

অশ্ব। সাবিত্রী দেবীর আরাধনা ক'রে মাকে পেয়েছি, তাই
সাবিত্রীর প্রসাদস্বরূপ কন্তার নাম রেখেছি সাবিত্রী।

মাণ্ডব্য। যদি বাধা না থাকে, তা হ'লে ঘটনাটা জানতে
পারি কি ?

অশ্ব। আপনি শুরু ; আপনার কাছে ব'লতে বাধা কি ?

পুত্রকামিনার আমি কুলদেবতা সাবিত্রী দেবীর আরাধনা করি। আঠার বৎসরের তপশ্চায় দেবী দাসের প্রতি প্রেমলা হন। অপূৰ্ণ মূর্তি ধারণ ক'রে আমার সম্মুখে উপস্থিত হয়ে, আমাকে বর গ্রহণ ক'রতে আদেশ করেন। আমি ধর্ম্মরক্ষার্থ মায়ের কাছে কুলোজ্জ্বল পুত্র কামনা করি। দেবী সেই কথা শুনে ব'লেছিলেন—“তোমার অভিপ্রায় পূৰ্ণ হ'তেই অবগত হ'য়ে আমি প্রজাপতি ব্রহ্মার নিকট তোমার জন্ম পুত্র প্রার্থনা করি। তিনি তোমাকে একটা কন্যা দান ক'রতে প্রতিশ্রুত হয়েছেন। মহারাজ, ব্রহ্মা কর্তৃক আদিষ্ট হয়ে তোমাকে আশীর্বাদ করি, অচিরে তুমি একটা তেজোময়ী কন্যা লাভ কর। দ্বিরুক্তি না ক'রে এই মুহূর্তেই তুমি গৃহে প্রতিগমন কর।” এই কথা ব'লেই দেবী দেখতে দেখতে অস্তদ্বান ক'রলেন। গৃহে ফিরে এলুম। মায়ের আশীর্বাদের ফলে অচিরেই এক কন্যারূপ লাভ ক'রলুম। বল্ব কি দেবতা! জগতের সকল সৌন্দর্য্য একত্র হয়ে দেখতে দেখতে আমার গৃহে নয়নানন্দকরী নব তিলোত্তমারূপে প্রস্ফুটিত হ'লেন। কিন্তু দুঃখের কথা কি বল্ব প্রভু! ষোড়শ বর্ষ অতিক্রান্ত হ'তে চল্লো, তথাপি আজও পর্য্যন্ত মাকে পাত্রস্থ ক'রতে পার্লেম না।

মাণ্ডব্য। এমন কন্যার পাত্র মিল্ল না!

অশ্ব। বহুপাত্রেব সন্ধান ক'রেছি, বহু স্তলক্ষণযুক্ত যুবাকে কন্যা দান করবার জন্ম গৃহে এনেছি; কিন্তু লজ্জাভার-নমিতাঙ্গী কুমারীকে আজও পর্য্যন্ত কোনও পুরুষ প্রেমচক্ষে

দেখতে সাহস করেনি। অত্যাধি যত রাজপুত্র বিবাহার্থী হয়ে এসেছে, সকলেই আমার কন্যাকে মাতৃজ্ঞানে ভক্তিসহকারে দূর থেকে প্রণাম ক'রে প্রস্থান করে।

মাণ্ডব্য। পাত্র মেলেনি ব'লে, গৌরী কিনা আজও পর্য্যন্ত কুমারী! তা মহারাজ, এতদিন চেষ্টা ক'রেও তোমরা নিজে যখন কিছু ক'রতে পারনি, তখন মাকে নিজের ওপর পতি-নির্ভরতার ভার প্রদান কর নি কেন?

অশ্ব। তাই ত প্রভু! একথা ত এক সময়ের জন্যও আমার মনে উদয় হয়নি।

মাণ্ডব্য। শুভদিন শুভক্ষণ দেখে, যত শীঘ্র পার, মাকে পতি-অন্বেষণে প্রেরণ কর। আশীর্বাদ করি, মহারাজ, আপনার গৃহে শান্তি ও ধর্ম চিরকালের জন্য প্রতিষ্ঠিত হোক।

(মালবী ও সাবিত্রীর প্রবেশ ।)

মাণ্ডব্য। (স্বগত) আসছি স্ মা আনন্দময়ি! সন্তানের আকুল আগ্রহের কাতর স্বর তোর কাণে কি পৌছাল মা! মহেশবদনোৎপল্লা, বিষ্ণুহৃদয়সম্ভবা, বেদপ্রসবিত্রী গায়ত্রী! দিবাকরের হৃদয়-আসন শূন্য ক'রে—মদ্রাজগৃহে প্রচ্ছন্নবেশে—অবলা-বালিকাস্থলভ কোমলতায় কার প্রাণ গলাতে এসেছে মা? মা! দূর হ'তে অধম সন্তান তোমার চরণারবিন্দে কোটি কোটি প্রণাম করে। তুমিই না হয় কন্যারূপিণী—পিতা মাতার মমতাজালে সর্বদা জড়িয়ে ইচ্ছাপূর্বক আপনাকে বিন্ধিত হ'য়েছে। তাতে আমার কি জননি! আমি তোমার সঙ্গে আত্মবিন্ধিত হ'তে

যাব কেন ? মা, আবার—আবার—বারবার আমার প্রণাম গ্রহণ কর ।

মালবী । এই নিন প্রভু, আপনার দাসী । মা, ঠাকুরকে প্রণাম কর । প্রণাম ক'রে পদধূলি মাথায় নিয়ে, ঠাকুরের কাছে স্বামি-সৌভাগ্য প্রার্থনা কর । বল—যেন মনোমত পতিলাভ করি, যেন আমা হ'তে মঙ্গল-বংশের কুলধর্ম রক্ষা হয় । (সাবিত্রীর প্রণাম)

মাণ্ডব্য । বেটী ! চুপ ক'রে থাকবে মনে ক'রেছো ? কল্যাণ-রূপিণি ! শুধু কি নম্রনেত্রিয়ার চরিতার্থতায় আত্মার তৃপ্তি হয় ! যে বিদ্রোহের ঈষৎকম্পনে চতুর্দেবের সৃষ্টি হয়েছে, অক্ষরময়ি ! সেই তুমি, আমার পিপাসু আত্মার সমীপস্থ হয়ে নীরব থাকবে ! দেখি বেটী, সন্তানকে ছলনা ক'রে কতক্ষণ থাকতে পার !

মালবী । কি মা, ঠাকুরের কাছে বর প্রার্থনা না ক'রে নীরব রইলি যে ?

মাণ্ডব্য । নীরব কি সাধে থাকে ! মহারাজ, এখন বুঝতে পেরেছি যে, এ কত্থার বিবাহ হয় না কেন । বোবা মেয়েকে কে বে ক'র্বে !

মালবী । ও সাবিত্রি, কথা কওনা মা !

অথ । মা, দেবতার কাছে আশীর্বাদ গ্রহণ কর ।

সাবিত্রী । প্রভু শাস্ত্রে শুনেছি—কামনা ত্যাগ ক'রে ভগবানের আরাধনাই হচ্ছে সর্বশ্রেষ্ঠ আরাধনা । যদিই বা কামনা করতে হয়, তা হ'লে অগ্রে দেবতার যথাশক্তি আরাধনা করা প্রয়োজন । আরাধনায় তুষ্ট হয়ে যদি দেবতা

স্বৈচ্ছায় বর প্রদান করেন, তা হ'লে সেই আরাধনাই হচ্ছে শ্রেষ্ঠ কাম্যধর্ম। নতুবা ভিক্ষা দেবতার কাছেও নিন্দনীয়। তবে এও শুনেছি—জনক জননীর বাক্য বেদস্বরূপ; আজ্ঞা, শাস্ত্রের আদেশের ত্রায় অলঙ্ঘনীয়। যে পিতা মাতার আদেশ লঙ্ঘন করে, সে দেবাসনে উপবিষ্ট হ'লেও ধর্ম্মে পতিত হয়। তাই আজ জননী কর্তৃক আদিষ্ট হয়ে, আপনার কাছে প্রার্থনা করি, যেন আমা হ'তে মদ্রবংশের কুলধর্ম্ম নষ্ট না হয়।

মাণ্ডব্য। শাস্ত্র ব্রাহ্মণের উপর আশীর্ব্বাদের যেটুকু অধিকার দেছেন, তাইতে বলি, মা তোমার মনোভীষ্ট পূর্ণ হোক। মালবী। আরাধনা ক'রতে পাওনি ব'লে ছঃখু? তার জন্ত ছঃখু কি মা! তুমিই না হয় আজকে এই অতিথি সেবার ভার গ্রহণ কর।

অশ্ব। সাবিত্রি, কাল পর্যায়ে তুমি উপবাসিনী ছিলে; স্মরণে আজ এই দেব অতিথির সংকার ক'রে তাঁর প্রসাদ গ্রহণ কর। আর শোন—তোমার সম্প্রদানকাল উপস্থিত, অথচ কোন ব্যক্তি আমার নিকট প্রার্থনা ক'রছেন না। অতএব তুমি স্বয়ং আপনার গুণসদৃশ স্বামী অন্বেষণ কর। যে পুরুষ তোমার প্রার্থিত হবেন, আমার কাছে তাঁর কথা নিবেদন ক'রো; পরে আমি বিবেচনা ক'রে তোমাকে সম্প্রদান ক'রব। কল্যাণি! আমি ধর্ম্মশাস্ত্রে ব্রাহ্মণগণকে যে বচন পাঠ ক'রতে শুনেছি, তা তোমাকে ব'লছি শোন—যে পিতা কন্যাদান না করেন, তিনি নিন্দনীয় হন; যে সংসারী বিবাহ না করেন, তিনিও নিন্দাই হন; আর যে

পুত্র স্বামিহীনা জননীর প্রতিপালন না করে, সেও নিন্দা-
ভাজন হয়ে থাকে। তুমি আমার এই কথা শুনে, যত
শাস্ত্র পার, স্বামীর অবেষণ কর। যাতে আমি দেবগণের
নিন্দনীয় না হই, তাই কর। আজই শুভদিন। আমি
তোমার বাত্রার উপযোগী বাহনাদি আয়োজন ক'রতে
আদেশ প্রদান করি।

সাবিত্রী। কোথায় যেতে আদেশ করেন ?

অম্ব। তোমার ধর্ম্বেখানে তোমায় আকৃষ্ট ক'রে নিয়ে যাবে,
সেইখানেই যাবে। ফল কথা, স্বামীর সংবাদ না গ্রহণ
ক'রে তুমি আর ঘরে দিরো না। যদি অকৃতকার্য হও,
তা হ'লে মদ্রবংশের সঙ্গে সম্বন্ধ জন্মের মত পরিত্যাগ
কর।

সাবিত্রী। যথা আজ্ঞা।

(পুরবাসিনীগণের প্রবেশ ও গীত ।)

তবে যাও তবে যাও আসিতে ।

এক চাঁলে সরলে যুগলে ফিরিতে ॥


বাধি গলে গলে বাহুলতা-হারে,

অচেনা দেশ হ'তে আন ধ'রে তারে,

সে প্রিয় মোহন মন মোহিতে :—

হৃথ-বারিদ-প্রাবিত সয়ে ভাসিতে ॥

দ্বিতীয় অঙ্ক ।



প্রথম দৃশ্য—পথ ।

তুষুরু ও মালিনী ।

তুষুরু । দেখ্ দেখি বউ, কি ক'রলি ! রাজকুমারী বনবাসে
চ'লেছে ব'লে দিগ্বিদিক্ জ্ঞানশূন্য হয়ে ছুটে এলি, এখন
কোথায় এসে পড়লি বল্ দেখি । আর পথ চিন্তে
পারছিনি ।

মালিনী । কি ক'রব ? আমি জীলোক, চ'লেই না হয় এনেছি;
তুই পুরুষ মানুষ, তুই পথ ঘাট চিন্‌বিনি—তা আমি কি
ক'রব ?

তুষুরু । বেশ, আগ্র তবে পথের মাঝখানে ছ'জনে হাত পা
মেলিয়ে মরি ।

মালিনী । দিদিরাণী যে দণ্ড থেকে আমাদের তাগ ক'রে
এসেছে, সে দণ্ড থেকে আমরা কি বেঁচে আছি ! তা
আর মরণের ভয় দেখাচ্ছিন্ কি ? ভয় হোগ্গে তোর ।
আমি ত তোকে রেখে মরতে পারলে বেঁচে যাই :

তুষুরু । ভারি সুবিধের কথাটাই কইলি ! ক্ষিদেয় নাড়ী বাঁ বাঁ
ক'রছে—তেঁয়ার প্রাণ টা টা ক'রছে,—তার ওপর অন্ধেক
রাজ্যটা পেতুম, সেটা হ'লো না ব'লে মন খাঁ খাঁ ক'রছে ।
নিজে নিজেকে নিয়েই নড়তে পারছিনি, এমন সময়

তুমি মলে এই সারা পথটা তোমার কাঁধে ক'রে নিয়ে
বেড়াই। ভারি স্নেহের কথাই কইলি বউ!

মালিনী। বলিস্ কি মিন্‌সে, এত দয়া!

তুষুর। না বউ, মরবার কথা বলিন্‌নি। অনেক দিন তোর
মিষ্টি মিষ্টি গালাগালি খাইনি। গালাগালের সাধ এখনও
আমার মেটেনি। আগে দিদিরাণীকে খুঁজে বা'র করি,
তার পর মরতে হয় দুজনেই এক সঙ্গে মরা যাবে। এখন
ক্ষিধেয় মরি তার কি? সঙ্গে ক'রে কতকগুলো চিঁড়ে
এনেছিনি, দে না।

মালিনী। শুধু চিঁড়ে কেন হাড়ের মতন চিবিয়ে খাবি, একটু
অপেক্ষা কর—পথের ধারে আস্তে আস্তে একটা গরু
চরতে দেখে এলুম—রোস্ সেইটেকে টেনে এনে দিই।

তুষুর। যা, তা হ'লে আর দেরি করিন্‌নি। (মালিনীর
প্রস্থান) না বাবা, আর নয়, চেষ্টার চূড়ান্ত হয়েছে।
রাজা রাজকুমারীকে এক রকম বনবাসেই দিয়েছে।
বর মেলে ত দিদিরাণী দেশে ফিরবে, নইলে আর তাকে
দেখতে পাব না। বউ তা হ'লে আমার আর দেশে
ফিরছে না। সে নিত্য নিত্য রাজকুমারীর শিবপূজার
কুল যুগিয়ে এসেছে। তার এতদিনের কুল যোগান বৃথা
হ'লো। দিদিরাণীকে দেখতে না পেলে সে কি বাচবে!
—অমনিতেই ত সে আধমরা হ'য়ে আছে। আর অমন
বউ গেলে কি ছাই আমিও আর বাচব! আহা বউ ত নয়
—যেন পৈতৃক বউ! দরদ কি!—মায়া কি!—যাক
বাবা, ভাবলে আর জ্ঞান থাকে না। কাজেই বউ যত-

দ্বিতীয় অঙ্ক ।

ক্ষণ না আসে, ততক্ষণ এই চিঁড়ে কঁটার সাহায্যে একটু অগ্রমনস্ক হয়ে যাই। ও বাবা—আবার সেই মাঠে: এদিকে আসছে যে! লুকুবো এমন জায়গাও ত নেই, কি করি? ও বাবা! এসে পড়লো যে। তা হ'লে কি করি? দূর ছাই, কি আর ক'রব, তা হ'লে এই করি—(চিঁড়ে ভক্ষণ)।

(মাণ্ডব্যের প্রবেশ)।

মাণ্ডব্য। মা আমার শুভক্ষণে পতি-অন্বেষণে গৃহ থেকে যাত্রা ক'রেছেন। মায়ের স্বামি-সম্মিলন যতক্ষণ না দেখতে পাচ্ছি, ততক্ষণ কিছুতেই প্রাণে শান্তি পাচ্ছি না। একি! কে তুমি? পথের ধারে—গাছের তলায়—আধ আঁধারের ভেতর ব'সে, কে তুমি?

তুষুরু। ধ'রেছে, ঠিক ধ'রেছে। স্রুখে পেছনে চোক, ওর হাত এড়িয়ে যাবার যো কি!

মাণ্ডব্য। কে তুমি? কথা কচ্ছনা কেন?

তুষুরু। আমি।

মাণ্ডব্য। আনি কে?

তুষুরু। চিনে নাও।

মাণ্ডব্য। নাম কি?

তুষুরু। রাস্তা বন্ধ—গলা দিয়ে আমি বেরবার পথ নেই।

মাণ্ডব্য। সে কি রকম?

তুষুরু। আজ্ঞে, খাওয়া চলছে দেখে, কথাগুলো আস্বার স্রুবিধে পাচ্ছে না।

মাণ্ডব্য । তা হ'লৈ এতগুলো কথা এলো কি ক'রে ?

তুষুরু । আজ্ঞে, কতকগুলো পিছলে এসেছে, আর কতকগুলো
ঠোঁটের ডগায় এসে ব'সেছিল, ঠোঁট নাড়তেই বেরিয়ে
প'ড়েছে ।

মাণ্ডব্য । আর কেও—তুষুরু !

তুষুরু । আজ্ঞে, আর তুষুরু নেই, এখন ডুগুডুগি ।

মাণ্ডব্য । সে কি রকম ?

তুষুরু । আজ্ঞে, প্রাণের তার ছিঁড়ে এখন বেসুরো মেরে
গেছি দেবতা ।

মাণ্ডব্য । তুমি ত রাজকুমারীর বরের সন্ধানে গিয়েছিলে ?

তুষুরু । আজ্ঞে গিয়েছিলুম ।

মাণ্ডব্য । তার পর ?

তুষুরু । তার পর এই চিঁড়ে খাচ্ছি ।

মাণ্ডব্য । চিঁড়ে খাচ্ছ কি ! পাত্রে সন্ধান পেলে না ?

তুষুরু । পাব না কেন, হাজার হাজার ।

মাণ্ডব্য । তবে অমনি অমনি ফির্ছ কেন ?

তুষুরু । আজ্ঞে দেবতা, চিঁড়ের পক্ষে ধামিই ভাল, চিটকে
পাত্রে বড় সুবিধে হয় না ।

মাণ্ডব্য । পাত্রে সন্ধান বেরিয়ে দেশ বিদেশ ঘুরে, শেষে কি
এই চিঁড়ে নিয়ে এসে উপস্থিত ক'রলে ।

তুষুরু । আর কি করি দেবতা ? রাজকুমারীর বরাতে বর নেই
ব'লে কি আমাদের ক্ষিধেও থাকবে না !

মাণ্ডব্য । তা এখন যাচ্ছ কোথায় ?

তুষুরু । যেখানে ছ চোক যায় ।

মাণ্ডব্য । তা হ'লে বল বৈরাগ্য । কেন তোমার সংসারে কি
কেউ নেই ?

তুশ্বুরু । সে কি দেবতা, থাক্বে না কেন ! আমার সংসারে
কেবল আমিই নেই ।

মাণ্ডব্য । স্ত্রী পুত্র নেই ?

তুশ্বুরু । স্ত্রী ! সধবা না বিধবা ?

মাণ্ডব্য । স্ত্রী—বিধবা !

তুশ্বুরু । আজ্ঞে হাঁ দেবতা, আমার এক বিধবা স্ত্রী আছে ।

মাণ্ডব্য । বিধবা স্ত্রীলোক বল ।

তুশ্বুরু । আজ্ঞে না দেবতা,—স্ত্রী । যে দিন থেকে তাকে ঘরে
এনেছি, সেই দিন থেকেই তার গুণে মরে আছি ।
স্বোয়ামী ম'রে গেলেই ত স্ত্রী বিধবা হয় দেবতা ।

মাণ্ডব্য । তা হয় । কিন্তু অমন স্ত্রীকে যে একাকিনী ফেলে
আসতে নেই । তাতে যে পাপ হয় ।

তুশ্বুরু । বল কি দেবতা !

মাণ্ডব্য । স্ত্রী হ'চ্ছেন গৃহ-দেবতা—বংশজননী । তাঁকে পরি-
ত্যাগ আর জননী পরিত্যাগ দুইই সমান ।

তুশ্বুরু । বল কি দেবতা । স্ত্রী জননী ?

মাণ্ডব্য । বংশজননী—কুলরক্ষয়িত্রী দেবী । জননীও যে ব'লতে
না পারা যায়, এমন নয় । শাস্ত্রে ব'লেছে—

পতির্জায়াং প্রবিশতি গর্ভো ভূত্বৈহ মাতরং ।

তস্তাং পুনর্নবো ভূত্বা দশমে মাসি জায়তে ॥

তুশ্বুরু । আর বলতে হবে না দেবতা । শোনবামাত্রই প্রাণে
আমার ভক্তি-রস পাক মেরে উঠছে ।

মাণ্ডব্য । দেখ তুম্বরু, তোমার কাছেই আমি মায়ের সন্ধান পেয়েছি । তোমার এ মহোপকার আমি জীবনে বিন্ধত হব না । তুম্বরু, যদি গৃহত্যাগেই তোমার অভিরুচি হয়, তা হ'লে তোমার স্ত্রীকে নিয়ে আমার আশ্রমে চল । আমার বিশ্বাস, সেখানে তুমি রাজকুমারীকে দেখতে পাবে ।

তুম্বরু । পাব দেবতা—দিদিরাণীকে দেখতে পাব ?

মাণ্ডব্য । দিদিরাণীকেও পাবে, আর তার বরকেও পাবে ।

তুম্বরু । বল কি দেবতা !

মাণ্ডব্য । শীঘ্র যাও, তোমার স্ত্রীকে নিয়ে এস ।

তুম্বরু । দেখাও দেবতা—দিদিরাণীকে দেখাও । রাজ্যলোভে দিদিরাণীর বর খুঁজতে গিয়ে বরও হারিয়েছি, দিদিরাণীকেও হারিয়েছি । বরের লোভে গেলে বরও পেতুম দিদিরাণীকেও হারাতুম না । দেখাও দেবতা,—স্বামী স্ত্রীতে তোমার দোরে হত্যা মেরে প'ড়ে থাকবো ।

মাণ্ডব্য । তা হ'লে আর বিলম্ব ক'রো না ।

[প্রস্থান ।

তুম্বরু । ও বউ, বউরে ! বউ আমার গর্ভভূত্রেহ মাতরং ! ও বাবা, শাস্ত্র দেবতায় লিখেছে ; ওতে কি আর ভুল হবার ঘো আছে । (মালিনীর প্রবেশ) আস্চ্ বউ—আস্চ্ ? ও বউ, বউরে !

মালিনী । কি হ'ল—কি হ'ল ?

তুম্বরু । বড় কি নয় বউ—বড় কি নয় । ইতিমধ্যে ডারি কাণ্ডকারখানা হয়ে গেছে । তোর বড় উঁচু পায়া বউ—বড় উঁচু পায়া । তুই আমার মহাশুরু । ম এ আকার ।

(গীত)

তোমায় কি বলে ডাকব বউ ।
 তুমি নাই যার নাই তার কেউ ॥
 • আঁটির ভিতরে তালের শাস,
 তার ভেতরে জল—
 তার ভেতরে তোমার বাস,
 কল কল কল জলে ঢেও ॥
 (তুমি) বিরহ-কাননে মধুর ঠাক—
 (কিস্ত) ঘরের ভিতরে ঘুঘুর ডাক,
 ধরা গলায় তুমি বিম্বিশাক, ভরা পেটে তুমি হেউ ॥

মালিনী । ও মা, এ বলে কি ! ক্ষেপে গেলে নাকি ?
 তুষুরু । একবার দাঁড়া বউ, তোকে একটা প্রণাম ক'রে নিই ।
 মালিনী । ও মা, এ মিন্‌সে করে কিগো !
 তুষুরু । শাস্ত্র ব'লেছে বউ,—দেবতায় ব'লেছে ।
 মালিনী । শাস্ত্রে কি ব'লেছে ?
 তুষুরু । শাস্ত্রে বলে—তুই আমার মএ আকার ।
 মালিনী । এমন পোড়া কণালে শাস্ত্র কোথায় পেলি ?
 তুষুরু । দেবতায় ব'লে দিয়েছে । বলে—তুই গর্ভ ভূষেহ
 মাত্রং । দশমে মাসী জায়তে । অর্থাৎ এখন আছিস
 মএ আকার, আর দশ মাস পরেই হবি মাসী ।
 মালিনী । শাস্ত্রে ব'লেছে ?
 তুষুরু । মিথ্যা নয় বউ—শাস্ত্রে ব'লেছে ।
 মালিনী । তাই ত ভাবি, জানা নেই শোনা নেই—পরের ছেলে
 —তার ওপরে এত মায়া হয় কেন ? শাস্ত্রে ব'লেছে !

নাও আর কষ্ট ক'রতে হবে না। আর পথের ধারে থাকতে হবে না। নীলমণি আমার ঘরে চল। শাস্ত্রে ব'লেছে, তবে আর কি ! আমার এতদিনের সাধ মিটে গেল। অঁটকুড়ী নাগ খণ্ডন হয়ে গেল। একাধারে পতি-পুত্র ! নাও—দুধ এনেছি খাও।

তুষ্কুর : ভক্তি-রস খেয়েই পেট ভরে গেছে বউ—আর দুধ খেতে হবে না। নে এখন চল। যে বাবা ঠাকুর তোকে আমার চিনিয়ে দিয়েছে, তার ঘরে যাই চল। সেখানে দিদিরানীকেও দেখতে পাবি, তার বরকেও দেখতে পাবি।

মালিনী : বলিস্ কি ?

তুষ্কুর : আর বলাবলি কি ? পতি পেলি, পুত্র পেলি, আজ তোকে একবারে চোদ্দ পুরুষ পাইয়ে দেব। চ'লে চল—
চ'লে চল।

(গীত)

তুষ্কুর : শোনলো প্রেমের খনি।

তুর্নিলো আমার ম এতে আকার, আমিলো বাছনি ॥

মালিনী : আগেই বুঝেছি তা, থামো থামো বাহু,

বলতে হবে ন, এন চলি পা পা পা।

তুষ্কুর : তবে খাব আমি ফাঁর ননী,

গেছে চিঁড়ে খেয়ে ছিঁড়ে মুখপানি।

মালিনী : তবে, আঁচল ধরে এস বাছ ঘরে,

এস ধীরে চোরা নীলমণি ॥

দ্বিতীয় দৃশ্য—কাননপথ ।

কঞ্চুকী ও সাবিত্রী ।

কঞ্চুকী । এ.কি ক'রলে রাজনন্দিনি ! মহারাজ তোমার সঙ্গে যান বাহন, ধন রত্ন, অসংখ্য অলুচর পাঠিয়ে দিলেন, তুমি সে সমস্ত ত্যাগ ক'রে, এই ছঃখিনীর বেশে, পৃথিবী ভ্রমণ ক'রতে চ'ললে ?

সাবিত্রী । ব্রাহ্মণ, আপনি মদ্রবংশের চিরহিতাকাজ্ঞী ! আমার বর্ত্তমান অবস্থা ত আপনি সবই বুঝতে পারছেন । কি কর্তব্য, আপনিই আমাকে বুঝিয়ে বলুন না কেন ।

কঞ্চুকী । তুমি বুদ্ধিমতী—শাস্ত্রদর্শিনী, তোমাকে আমি কি বোঝাব মা ? তবে তোমার এ অবস্থা দেখে, আমি প্রাণে কেমন ক'রে ধৈর্য্য ধরি !

সাবিত্রী । সপ্তাহ পরে আমার কি অবস্থা হ'তে পারে, তা কি বুঝতে পেরেছেন ব্রাহ্মণ ?

কঞ্চুকী । ভবিষ্যতে কার কি অবস্থা হ'তে পারে, কেইবা ব'লতে পারে রাজকুমারি ! অতি দূর ভবিষ্যৎ কেন, কালকের কথা আজকে ব'লতে পারে, এমন ভবিষ্যদ্বাণীই বা কে আছে ?

সাবিত্রী । ব'লতে পারুক আর নাই পারুক, সকলেরই ভবিষ্যতের অন্তিস্থে একটা না একটা বিশ্বাস আছে । আর সেই বিশ্বাসে আত্মনির্ভর ক'রে মানুষে চিরদিনই কার্য্য ক'রে আসছে । ভবিষ্যতে জ্ঞানী ব'লে প্রতিষ্ঠালাভ ক'রবে ব'লে, লোকে বিদ্যা অর্জন করে । বংশরক্ষার

জন্ত পুত্র কামনা করে। দারিদ্র্যের হাত থেকে নিস্তার পাবার জন্ত অর্থসঞ্চয় ক'রে রাখে। ভবিষ্যতের অন্তিস্থে বিশ্বাস না থাকলে সংসারের পথে মানুষ কখনও এক পাও চ'লতে পারত না।

কঞ্চুকী। তবে কি মা তোমাকে সন্ন্যাসিনীর বেশেই থাকতে হবে, তোমার বিশ্বাস হয়েছে ?

সাবিত্রী। আমাকে বিবাহিতা দেখবার জন্ত পিতা সমগ্র ভারতে পাত্রানুসন্ধান ক'রেছেন, তথাপি পাত্র মেলেনি। রাজরাজেশ্বরের সন্তানগণের ভেতরে এমন কেউ নেই যে, আমাকে ভার্য্যাতে গ্রহণ করে। কাজেই যোগিনী-বেশ ধারণ ভিন্ন আমার গতান্তর নাই। যদি স্বামী পাই, নিশ্চয় তিনি বনবাসী—সন্ন্যাসী। যদিই না পাই—যদি কুমারী অবস্থাতেই আমার ষোড়শবর্ষ উত্তীর্ণ হ'য়ে যায়, তাহ'লে মদ্রবংশের সঙ্গে আমার এ জন্মের মত সম্বন্ধ-বিচ্ছেদ।

কঞ্চুকী। সম্বন্ধ-বিচ্ছেদ !—সে কি ! এ কি কেউ কখনও স্বপ্নেও মনে স্থান দেয় ? তুমি রাজা ও রাণীর নয়নস্বরূপা—জন-পদবাসীর প্রাণ—ব্রাহ্মণগণের মন্তস্বরূপ। বাৎসল্যে—মায়ায়—ধর্ম্মে,—তুমি যে সিংহাসন প্রতিষ্ঠা ক'রে ব'সে আছ, স্বয়ং বিধাতাও যে তোমাকে সে সিংহাসন থেকে বিচ্যুত ক'রতে পারে না !

সাবিত্রী। কিন্তু ঠাকুর, সর্পদষ্ট অঙ্গুলি লোকে হাত থেকে বিচ্ছিন্ন করে। আমার ষোড়শ বৎসর উত্তীর্ণ হ'তে সপ্তাহমাত্র অবশিষ্ট। এই সময়ের মধ্যে, স্বামীর স্ত্রীপাদ দর্শন যদি আমার ভাগ্যে না থাকে, তা হ'লে মদ্রবংশের

কুলধর্ম-রক্ষার্থ আমিও পিতা মাতার কাছে এ মুখ দেখাতে পারব না,—পিতা মাতাও কত্নাকে গৃহে স্থান দিতে পারবেন না। বিধাতার ইচ্ছায় আমি বনবাসিনী। বনবাসিনীর আবার যান-বাহনাদি ঐশ্বর্যের প্রয়োজন কি ? ওই সম্মুখে উপবন। ফলমূল্যশী ব্রহ্মর্ষি রাজর্ষিগণ ওই উপবনে অবস্থান করেন। ব্রহ্মৈশ্বর্যে তাঁরা ধনী। সেখানে অকিঞ্চিৎকর রাজৈশ্বর্যের অভিমান নিয়ে যাওয়া কেন ? তরুলতাশ্রিতা, বনজলতা কুমুম-ভূষণা ঋষিকন্তা-গণের চরণগেরু-স্পর্শে ওই স্থান পবিত্র। ওরূপ স্থানে পদব্রজে ভক্তি-সহকারে প্রবেশই শাস্ত্রমত। ব্রাহ্মণ, অহুমতি করুন। আপনি অহুমতি না করলে ত আমি এস্থান ত্যাগ করিতে পারি না। আপনি পিতৃস্থলাভি-ষিক্ত। আপনার অহুমতি গ্রহণ ব্যতিরেকে ত আমি এস্থান ত্যাগ করিতে পারব না। করলে ধর্ম পতিত হব।

কঙ্ককী ! হা ভগবান্, এই করতেই কি বাড়ীথেকে বরাবর মায়ের সঙ্গে সঙ্গে এলুম ?

সাবিত্রী। প্রভু, চিন্তার সময় নেই। ছুঃখ করে ফল নেই।

কঙ্ককী। এ তুমি কি বলছ সাবিত্রী ? আমি যে বাল্যকাল থেকে তোমাকে বুকে করে মানুষ করে এসেছি।

সাবিত্রী। মায়ী—মায়ী—জ্ঞানবুদ্ধ ব্রাহ্মণ ! মায়ী পরিত্যাগ করুন। সমস্ত সংসার একমাত্র ধর্মের উপর প্রতিষ্ঠিত। মায়ী সেখানে অদৃষ্ট-আকাশে, মানুষের তীব্র ভোগবাসনা-স্বরূপ ঘনঘোরা কাদম্বিনীর গায়, চঞ্চল চপলার হাসিমাড়।

জ্ঞানে নিবে নাগ, অজ্ঞানতায় ঘন ঘন নূতন শ্রী ধারণ
ক'রে মানুষের হৃদয় আকর্ষণ করে। মায়া—মায়া—
বড় প্রলোভন—মানুষকে হুর্ভেদে অন্ধকারে ফেলবার জন্ত
মুহুমূহঃ কল্পিতা বিজলী। ব্রাহ্মণ! মায়া পরিত্যাগ
করুন, আমাকে পরিত্যাগ করুন, মদ্রবংশের একমাত্র
ভিত্তি—ধর্মের দিকে লক্ষ্য করুন।

কঙ্কুকী। তবে আর আমি কি ব'লব মা!—হৃদয়ে একটা
পর্কতের ভার নিয়ে ফিরে চল্লুম।

সাবিত্রী। অশীর্বাদ করুন, ফিরে আপনাদের যেন চরণ দর্শন
ক'রতে পারি।

কঙ্কুকী। একান্ত মনে ভগবানের কাছে প্রার্থনা করি, পিতার
মর্যাদা রাখতে—বংশের মর্যাদা রাখতে—শাস্ত্রের মর্যাদা
রাখতে—তুমি যেমন এই অতুল স্বার্থত্যাগ দেখালে,—
কায়মনোবাক্যে ভগবানের কাছে প্রার্থনা করি—মর্যাদা-
ময়ি! তোমা হ'তে যেন সমগ্র নারীজাতির মর্যাদা রক্ষা
হয়। তা হ'লে আসি মা! তোমার আগমন-প্রতীক্ষায়
কাননের প্রান্তভাগে আমি এই সপ্তাহকাল পর্য্যন্ত যানাদি
নিষে অবস্থান করি।

[প্রস্থান।

সাবিত্রী। পিতার আদেশ শুনেই চ'লে এসেছি। কোথায়
যাব, কি ক'রব—কিছুমাত্র বিচার করবার অবকাশ
পাইনি। এইবার বিষম পরীক্ষা! সম্মুখে গভীর বন—
বিভীষিকা দেখিয়ে আমাকে নিরস্ত করবার জন্তই যেন,
চারিদিকে প্রকাণ্ড বাহু বিস্তার ক'রে অর্দ্ধগগনভেদী

মন্তক সঞ্চালনে, আমার গন্তব্যপথের মহাবিল্ল-স্বরূপ হ'য়ে
দাঁড়িয়ে আছে সূর্য্যাকিরণ প্রতিহত—সমস্ত পথ অন্ধ-
কারে আচ্ছন্ন হয়েছে। এই পথে এখন আমায় একা
চ'লতে হবে! সঙ্গে চিরহিতাকাঙ্ক্ষী ব্রাহ্মণ ছিলেন,
কর্তব্যানুরোধে তাঁকেও পর্য্যন্ত নিরস্ত করলেম।
দেবতাকে দেখতে হ'লে ঐকান্তিকতার প্রয়োজন।
সঙ্গরহিত না হ'তে পারলে সে একাগ্রতা আসে না।
দেবতা দর্শনোদ্দেশ্যে পথ চ'লেছি,—শাস্ত্রাদেশে নিঃসঙ্গ
হয়েছি। তবে মন, আজ তুমি এত চিন্তাকাতর কেন?
প্রফুল্ল হও—ইষ্টদেবতার স্মরণ কর। পিতা মাতার
আশীর্বাদ—দেবতা ব্রাহ্মণের আশীর্বাদ—বর্ষস্বরূপ হ'য়ে
তোমার অঙ্গের চতুর্দিকে বেঠন ক'রে আছে। মা মঙ্গ-
কুলের ইষ্টদেবী সাবিত্রি! তুমি স্বয়ং এই নির্জন বনপথে
আমার পথপ্রদর্শিকা হও।

(গীত ।)

ভীষণ বন আধিয়ার।

জানিনা কোথায় চলি, আলো কি আঁধার

চলিতে এসেছি চলেছি তাই,

নিরাশে কি ভাসি কুল কি পাই,

জানিতে নাই মা অধিকার ;—

শুধু চলিতে এসেছি চলিয়া যাই অভয় চরণ কঙ্কণ সার

(অলিঙ্করার প্রবেশ)

। পিতা . বললেন—নবোদিত অরুণের অকরণমালা
পূজীকৃত হ'য়ে জীবনময়ী পুতলিকামূর্তিতে এই বনপ্রান্তে

বিচরণ ক'রছে। কিন্তু কই—কোথায়? এখনও যে আমি চারিদিক্ অন্ধকার দেখছি। আহা কি সুন্দর—কি সুন্দর। বনবিলাসিনি! এই দরিদ্রা ভগিনীর প্রতি কৃপা ক'রতে এসে, দ্বারসমীপস্থ হ'য়ে, বিলম্ব ক'রছ কেন? অদূরে এই গভীর বনাভ্যন্তরে আমার পিতা মহাতপা মাণ্ডব্য মূনির আশ্রম। এস, তোমাকে সে স্থানে নিয়ে যাই।

সাবিত্রী। আশ্রম-রূপিণী কল্যাণি! আমি অশ্রমদান-যোগ্যা কি না, আপনি বিবেচনা করুন।

অগ্নি। তুমি রাজ্যেশ্বরীই হও, কি ভিখারিনীই হও—দেবীই হও কিংবা মানবীই হও—ব্রাহ্মণকন্যাই হও, কি চণ্ডাল-কুমারীই হও,—আমার আশ্রমসমীপে যখন নিরাশ্রয়ার মত বিচরণ ক'রছ, তখন তুমি আমার ইষ্টদেবী।

সাবিত্রী। দেবী—

অগ্নি। ভগিনী—দেবী কেন?—এই ত তোমাতে আমাতে কি সম্বন্ধ, প্রকাশ ক'রে ব'ল্‌লুম্। তবে সাংসারিক জীবনের যদি একটু মধুর আশ্বাদ অনুভব ক'রতে আমাকে অনুমতি কর, তা হ'লে তুমিও আমার দেবী নও, আমিও তোমার দেবী নই। আমরা দুটী ভগিনী। আমি ব্রাহ্মণকন্যা—আর তুমি—

সাবিত্রী। ক্ষত্রিয়নন্দিনী।

অগ্নি। স্নতরাং আমি জ্যেষ্ঠা—আর তুমি কনিষ্ঠা। এস বোনটী আমার! কোন্ স্বপ্নরাজ্যের—কোন্ স্বপ্নময় গগনের সোণার ফুল! ভূতলাবতীর্ণ হ'য়ে কৃপা ক'রে

দ্বিতীয় অঙ্ক ।

তোমার দুঃখিনী ভগিনীটাকে দেখা দিতে এসেছ !
তোমায় কি আর আমি ছাড়তে পারি । এস, সঙ্গে
এস ।

সাবিত্রী । ভগিনী ! এ প্রাণ যদি তোমাকে দান ক'রবার
আমার অধিকার থাকত, তা হ'লে এখনি তোমাকে
সর্বস্ব সমর্পণ ক'রে, চিরজীবনের জন্য তোমার দাসীত্ব
গ্রহণ ক'রতুম । একুপ আনন্দ আমি জীবনে কখনও
অনুভব করিনি । কি ব'লব, আমি সঙ্কল্প ক'রে ইষ্ট-
দেবের মন্দিরে আমার এ প্রাণ-পুষ্প উপহার দিতে
চ'লেছি ।

অলি । ভাল, আগে উৎসর্গ হোক, তার পর আমি না হয় দেব-
তার দ্বারে এ পবিত্র নিষ্ঠালাটী ভিক্ষা ক'রে নেবো ।
এখন ত সঙ্গে চল ।

(গীত ।)

পথহারা শুকতারা তুমি মধু-যামিনী-ফুল ।

মধু-বাতাসে এসেছ ভেসে ক'রেছ আকুল ।

(প্রাণ মন ক'রেছ আকুল)

মুখ দেখে কঁাদে প্রাণ, জাগে অতীতের গান,

দূর তটিনীর সেই ছায়া ভরা কূল ।

(এস) বেঁধে আঁচলে, নে যাই চ'লে, জীবন ভরা ডুল ।

তৃতীয় দৃশ্য—তপোবন-সান্নিধ্য।

তাপস-কুমারগণ।

১ম তা, কু। দেখে ভাই, আজ অনধ্যায়নের দিন। সুতরাং যখন আচার্য্যগৃহে পাঠ নাই, তখন সকলে মিলে কিঞ্চিৎ কিঞ্চিৎ ফল সংগ্রহ করা যাক। যেহেতু শাস্ত্রে ব'লেছে—ব্যাকরণের সূত্রাদি দ্বারা ক্ষুধারূপ ছন্তর সাগর পার হওয়া যায় না।

২য় তা, কু। তাতে কিঞ্চিৎ হস্তপদ সঞ্চালনে বৃক্ষারোহণ ক'রতে হয়! আর পক্ষ হরীতকী, বিভীতকী, আমলকী দাড়িম্ব ইত্যাদি ফল—বদন ব্যাদন করত তন্মধ্যে নিষ্কিন্ত ক'রতে হয়। তার পর একটা বার কোনও প্রকারে উদর মধ্যে প্রবিষ্ট ক'রতে পারলেই—

সকলে। ছন্তরা ক্ষুধা-সাগর পার।

১ম তা, কু। হাঁ হাঁ—ক'রলে কি—ক'রলে কি! একটা ব্যাকরণছুটী কথা কয়ে ফেললে!—সাগরকে ছন্তরা ব'লে ফেললে!

২য় তা, কু। সর্বনাশ! ব্যাকরণ-দোষ? ব্যাকরণ-দোষে সর্ব নষ্ট—কাব্য নষ্ট, বিজ্ঞান নষ্ট, ক্ষুধা নষ্ট। ব্যাকরণ ছুটী রসনা দিয়ে ফল আশ্বাদন ক'রলেই অগ্নিমান্দ্য, অন্ন, অজীর্ণ, উদরাগ্নান, বিসৃচিকা—

১ম তা, কু। এমনকি, স্মৃত্তিকা পর্য্যন্ত হ'তে পারে।

সকলে। বেশ! তবে আমরা ছন্তর ক্ষুধা-সাগরের এপার।

২য় তা, কু । ওহে ভাই, তা হ'লে কিং ক'র্তব্য ?

১ম তা, কু । কোন বনে প্রবেষ্টব্য ।

২য় তা, কু । আমি বলি কি, আজ আর বনে প্রবেষ্টব্য নয় ।

আজকে চল কোন প্রতিবাসীর আশ্রম-বৃক্ষে ।

১ম তা, কু । সে কি ! তাতে যে অপহরণ করা হবে ।

২য় তা, কু । আগে হ'লে অপহরণ হ'ত । এখন গুরুগৃহে যে
শিক্ষালাভ ক'রেছি, তাতে অপহরণ আর হ'তেই
পারে না ।

১ম তা, কু । কি শিক্ষা লাভ ক'রেছ বল ।

২য় তা, কু । শাস্ত্রশিক্ষা ।

১ম তা, কু । বল—বল, এমন শাস্ত্রকথা শুন্লে সত্ত্ব ফললাভ
করা যায় ।

সকলে । শুধু ফল ? ফলানি । যথা—ফলম্ ফলে ফলানি । ইতি
বিদ্যাসাগরঃ ।

২য় তা, কু । তবে বলি শোন, শাস্ত্রটা গুরুমুখেই শ্রবণ করা
হয়েছে ।—এক দিন আমার আচার্য্য পথে যেতে যেতে
একটা বৃক্ষে একটা সুন্দর কাঁটাল ফল পকাবস্থায় দেখতে
পান । যেমন সেই পক ফল দর্শন, অমনি তাঁর রসনায়
জল সঞ্চরণ । আমাকে আদেশ ক'রলেন—বৎস, ক্ষুধা
প্রবলা, জঠর-জ্বালা নিবারণ ক'রতে তুমি সত্ত্ব ঐ বৃক্ষ-
রোহণ ক'রে কণ্টাল ফলটা আনয়ন কর । আমি বল্লুম
—প্রভু ওটা যে পরের সামগ্রী । এই কথা না শুনেই
প্রভু ক্রোধে অগ্নিস্থিগ্নবৎ হয়ে, রোষ কষায়িত-লোচনে
আমাকে ব'ললেন—ওরে মূর্খ ! এ সংসারে সব আপনার,

পর কে ? তুই যদি সত্ত্বর ঐ ফল না পেড়ে নিয়ে আসিস, তা হ'লে তৎক্ষণাৎ তোকে ভস্মীভূত ক'রব। কি করি, ভয়ে ভয়ে কাঁটালটা পেড়ে আনয়ন ক'রলেম। প্রভুও অমনি ধ্যান-নিমীলিত চক্ষে সেই কাঁটালটা—কোষ, ভুতুড়ি, মাংস আটীগুলি পর্য্যন্ত—সর্ব্বসমেত উদরস্থ ক'রে ফেললেন, আর বলতে লাগলেন—“অয়ং নিজঃ পরো বেতি গণনা লঘুচেতসাং।” এ আমার, ও, পর ; এসব লঘুচিত্ত লোকেই ব'লে থাকে। “উদারচরিতানাস্তু বহুধৈব কুটুমকং।” যে সব লোক উদার, তাদের পৃথিবী-শুদ্ধ লোক কুটুম্ব। সেই অবধি তাঁর প্রিয় শিষ্যও যৎসামান্য উদারচরিত হ'তে আরম্ভ ক'রেছেন। আজ কয়দিন ধ'রে বড়কুটুম্বদের উদ্যান থেকে কাঁটাল, পেয়ারা, রসাল—এইগুলো দিয়েই উদরের জ্বালা নিবারণ ক'রে আসছেন।

সকলে। সাধু—সাধু—মহাজনো যেন গতঃ স পস্থাঃ।

১ম তা, কু। এস আমরা সবাই মিলে আজ সেই পথই অবলম্বন করি।

২য় তা, কু। ওহে ভাই ! দেখ দেখ, এক দম্পতী এদিকে আগমন ক'রছেন।

১ম তা, কু। সত্যই ত হে—এক জায়াপতী—জম্পতী বা দম্পতী।

সকলে। ইতি নিপাতনাং সাধু।

২য় তা, কু। সুতরাং ওঁরা যখন নিপাতনে সিদ্ধ হয়েছেন, তখন নিশ্চয়ই সাধু।

সকলে। সাধু—সাধু—

১ম তা, কু। তবে এস আমরা সমস্তম ও সলজ্জ হ'য়ে দণ্ডায়-
মান হই।

(তুষ্মরু ও মালিনীর প্রবেশ)

তুষ্মরু। বুঝতে পেরেছি' বউ, আমরা কোণায় এসেছি ?

এই হ'চ্ছে সেই দেবতার আশ্রম।

মালিনী। প্রণাম কর। বল—বাবা আশ্রম! আমি না যষ্টীর
দাস, আমায় বাঁচিয়ে রাখো। ওগো কারা সব ওখানে
দাঁড়িয়ে আছে দেখনা। ঐ বুঝি দেবতারা গো!

তুষ্মরু। দেবতার বাচ্ছা! ভয় নেই, এগিয়ে চল। হাঁ দেবতা,
বাবা ঠাকুরের আশ্রম এখান থেকে কতদূর ?

১ম তা, কু। বাবা ঠাকুর! তাঁর আশ্রম!

২য় তা, কু। বাবা ঠাকুর! তিনি ত চিরকুলই গাছের তলায়
বাস করেন।

সকলে। বেল-তলায় সন্ধান কর।

মালিনী। ওগো এই যে বেশ সুপাত্র রয়েছে! এদের ভেতর
থেকে এক জনকে জিজ্ঞেসা কর না। দেখ না, যদি
দিদিরাণীর বর এর ভেতর থেকে মেলে।

তুষ্মরু। ভাল কথা মনে ক'রে দিয়েছি' বউ। জিজ্ঞেসা কর—
জিজ্ঞেসা কর।

মালিনী। আমি যে লজ্জাশীলা! ও বাবা, আমি কেমন ক'রে
ব'লব!

তুষ্মরু। ভয় নেই—ভয় নেই—আমি তোকে নির্লজ্জা ক'রে

দিচ্ছি। দেবতা, অধীনের একটা নিবেদন আছে। এই

যে আমার সঙ্গে মেয়েটী দেখছেন—আমি এটীর বর।

১ম, তা, কু। আর ওটী তোমার কত্না ?

তুষ্কুর। আজ্ঞে সেটা আমি কেমন ক'রে ব'ল'ব দেবতা !

আমি মুরুফু—শাস্তর জানি না। শাস্তরে যদি বলে, তবে তাই।

১ম, তা, কু। অবশ্য—ব্যাকরণ শাস্ত্র এ বিষয়ে তন্ন তন্ন ক'রে ব'লেছে।

২য়, তা, কু। যথা—পিতা মাতা, ভ্রাতা ভগিনী—বর কত্না।

সকলে। আজা আই, বলদ গাই।

১ম, তা, কু। তা যা হোক, হাঁ সাধ্বী !

মালিনী। আজ্ঞে দেবতা, আমি সাধ্বী নই—মালিনী। সাধ্বী আমার পিন্ শাস্ত্রী।

২য়, তা, কু। বেশু বেশ ! তা আপনার এ পথে কোথা গন্তব্য।

তুষ্কুর। কোন বিশেষ জায়গায় যে গন্তব্য, তা নয়।

১ম, তা, কু। তা হ'লে ইতস্ততঃ ভ্রমণশীলা !

সকলে। কিংকর্তব্যবিমূঢ়া।

তুষ্কুর। হাঁ দেবতা, আপনাদের একটা কথা নিবেদন ক'রব ?

সকলে। কর।

তুষ্কুর। আপনারা কি বিবাহ করেননি দেবতা ?

১ম, তা, কু। কি ! আগরা বিবাহ করিনি !

২য়, তা, কু। বিবাহ ! কোন্ বিবাহ ? বি পূৰ্ণক বহ ধাতু
ঘঞ ?

তুষ্কুর। আজ্ঞে ষং কি ঘড়্ ঘড়্, তা জানি না। তবে—বিবাহ

১ম, তা, কু। আমরা বিবাহ করিনি !

সকলে। অষ্ট প্রহরই বিবাহ করছি। আমরা বিবাহ করিনি !

২য়, তা, কু। গুরুগৃহে যা পাচ্ছি, তাই বিবাহ করছি।

১ম, তা, কু। সাত দিন ধ'রে বৃদ্ধা পিতামহীকে বিবাহ ক'রছি।

এই ত তোমার ভার্য্যা পথভ্রাস্তা। তুমি বল, এখন
আমরা সবাই মিলে ঠুঁকে বিবাহ ক'রে, ঠুঁকে আশ্রমে
নিয়ে চ'লে যাই।

মালিনী। ওরে মিন্সে !

তুম্বুক। হাঁ হাঁ—বুঝেছি, আর কেন ?

সকলে। তাই ভাল, এস সকলে আজ পুণ্য সঞ্চয় করি। এস

সকলে মিলে এঁকে বিবাহ ক'রে ফেলি। ধর ধর।

মালিনী। ও মিন্সে ! এ কোথায় এনে ফেলি ?

তুম্বুক। রক্ষা কর বাবারা—আমি নিজে আবার বিবাহ ক'রছি।

আয় বউ, পালিয়ে আয়।

সকলে। সলজ্জা ভীতা চকিতনয়না পলাতিকা।

[সকলের প্রস্থান।

(মাণ্ডব্যের প্রবেশ)

মাণ্ডব্য। মায়ের অন্বেষণে যেমন আমি অস্থির হ'য়ে সমস্ত
সংসার পরিভ্রমণ ক'রে বেড়িয়েছি, তেমনি মা আমার
পতি-দেবতার অন্বেষণে অস্থির হ'য়ে সন্তানের আশ্রমে
ছুটে এসেছেন। পাছে ব্যথা লাগে ব'লে, যে পায়ের
রক্তচন্দন-চর্চিত জবা-কুশুম অতি সাবধানতার সহিত
অঞ্জলি দিয়েছি, সেই চরণ আজ আশ্রমপথকণ্টকে ক্ষত

বিস্তৃত! শিরীষ-কুশুমের ছায় কোমল শয্যায় শয়ন
ক'রেও যে মায়ের অঙ্গ নিষ্পীড়িত হয়েছে, তিনি আজ
পর্যটনশ্রমে কাতর হ'য়ে তরুতলে ধূলি শয্যায় শয়ন
ক'রবার জন্ত ব্যস্ত হ'য়ে বেড়াচ্ছেন! বেশ হয়েছে—বড়
সন্তুষ্ট হয়েছি। হবে না—কষ্ট হবে না! শ্রীচরণের দর্শন
দিতে তুমি যেমন সন্তানগণকে অনন্ত কাল ধ'রে কষ্ট
দিয়ে আসছ, তার ফল পাবে না! ইষ্টদেবতার অনুসন্ধান
মানুষকে কত কষ্ট পেতে হয়, তা একবার বোঝ। কত
যোগীন্দ্র মুনীন্দ্র আজীবন ধ্যান ক'রে, অনাহারে, দেহকে
শুদ্ধ—এমন কি, বল্মীকিস্তূপে পরিণত ক'রেও তোমার
দর্শন পায় না। নরদেহ-ধারিণি! দেহীর দে দাক্ষণ কষ্ট
একটু হৃদয়ঙ্গম কর। দেখে একটু সমবেদনার আনন্দ
অনুভব করি।

(সাবিত্রীর প্রবেশ)

সাবিত্রী। প্রভু! ব'লতে পারেন—এ স্থানে বিশ্রামযোগ্য স্থান
কোথায় পাই? এ কি! আপনি! প্রভু! (প্রণাম)

মাণ্ডব্য। কেও—মা মদ্ররাজনন্দিনী!

সাবিত্রী। হাঁ প্রভু!

মাণ্ডব্য। স্বামী-অন্বেষণার্থে এই স্থানেই এসে উপস্থিত হয়েছে?

সাবিত্রী। দেবতার অবস্থানযোগ্য আর স্থান কই?

মাণ্ডব্য। স্বামি-দর্শনলাভ ঘটেছে?

সাবিত্রী। সত্তরেই ঘটবে, বিশ্বাস। এ দাসী সতীর আশ্বাস ও
আশ্রয় পেয়েছে।

মাণ্ডব্য । এত বিশ্বাস ?

সাবিত্রী । সত্য-ধর্ম্মেও যদি বিশ্বাস স্থাপন না ক'রতে পারি, তা হ'লে কোন্ ধর্ম্মে বিশ্বাস করি প্রভু ! তা হ'লে কোথায় দেবতা—কোথায় শাস্ত্র ? ধর্ম্মনাশ কে করে ? অধর্ম্মিকের শাস্তি কে দেয় ? তা হ'লে কুলধর্ম্ম-নাশভয়ে পিতাই বা আমাকে ত্যাগ ক'রবেন কেন ? আমিই বা পিতা মাতার মমতা ছিন্ন ক'রে ঐশ্বর্য্যাসন্তোগের লীলাস্থল রাজপ্রাসাদ পশ্চাতে ফেলে, বনে প্রবেশ ক'রব কেন ?

মাণ্ডব্য । মা ! চির-কৌমার্য্য-ব্রতাবলম্বী সংসারী আমি । সত্য-ধর্ম্মের মর্যাদা আমি কি বুঝ'ব, তবে অনুমানে এটা বুঝতে পারি—যার রৌষরঞ্জিত কমললোচনের কটাক্ষে, যিনি বিধাতা—সর্ব্বজীবের সৃষ্টিকর্তা—সর্ব্ব-শক্তিমান—সেই ব্রহ্মার পুত্র যজ্ঞ-সভাস্থলে—সর্ব্বদেবতার সম্মুখে ছাগমুণ্ড লাভ ক'রেছিলেন,—তঁার কৃপায় তঁার আশ্বাসে কি না সাধিত হ'তে পারে ? তঁার অতিক্রুদ্ধ প্রাণহীন কোমল অঙ্গের ভার এক দিন ধরিত্রীরও অসহ হয়েছিল । তাই জগৎরক্ষার জন্ত স্বয়ং নারায়ণ স্বহস্তে স্নদর্শন চক্রে সেই অঙ্গ ছিন্ন বিচ্ছিন্ন ক'রেছিলেন । সেই এক একটা ছিন্ন অংশ ইতস্ততঃ বিক্ষিপ্ত হয়ে ভারত বর্ষে একপঞ্চাশৎ পীঠের সৃষ্টি ক'রেছে । ধরণীর যে যে স্থান সত্য-দেহ স্পর্শ ক'রেছে, আজ সেখানে এক এক মহাতীর্থ । তাদের মৃত্তিকার কণায় কণায় পুঞ্জীকৃত ধর্ম্মরাশি ।

সাবিত্রী। এমন স্থানে এসেও যদি ধর্মলোপ হয়, তা হ'লে
ধর্মের লোপই—আমার চক্ষে মহাধর্ম।

মাণ্ডব্য। তা মা, সেই সতী জননী আছেন কোথায় ?

সাবিত্রী। আমাকে দেখে তাঁর যে আনন্দ হয়েছে, তাই তাঁর
পতিকে উৎসর্গ ক'রতে, আমাকে এই স্থানে অপেক্ষা
ক'রতে ব'লে চ'লে গেছেন। কিঞ্চিৎ ক্লান্তিবোধ হচ্ছিল
ব'লে কোন বিরামস্থানের অনুসন্ধান ক'রছিলুম।

মাণ্ডব্য। আপাততঃ ওই অশোক-মূলে কিছুক্ষণের জন্ত
বিশ্রাম কর। তার পর মা সাবিত্রী!—ব'লতে পারি
না—এই অতাল্প সময় পূর্বে তোমার নিকটে আতিথ্য
গ্রহণ ক'রে এসেছি—সে রাজোচিত সেবা—আমি নিত্য
ভিক্ষান্নভোজী ফলমূলাশী—সে ভোজনস্থল এক মুখে
কেমন ক'রে বর্ণনা ক'রব মা! আমি তোমাকে
কি ব'লে নিমন্ত্রণ ক'রবো মা!—

সাবিত্রী। আমি যে দাসী প্রভু!

মাণ্ডব্য। বেশ, ভগবানের কাছে প্রার্থনা করি—অতী তুমি
সফলকামা হও। তার পর আমার আশ্রমে গিয়ে প্রসাদ
গ্রহণ কর।

সাবিত্রী। যথাআজ্ঞা।

চতুর্থ দৃশ্য—তপোবন ।

অলিঙ্করা ও সনাতন ।

সনা । বলি, আর কতদূর আমার যেতে হবে ?

অলি । আস্তে আস্তে । গোল ক'রো না । হয়ে এলো এলো হয়েছে ।

সনা । হয়ে এলো এলো ক'রে ত একক্লোশ পথ নিয়ে এলে !

অলি । তাতে কি হয়েছে—অলিঙ্করাকে যখন চোখে দেখনি, তখন যে হাহতাশে একদণ্ডে কত বিশক্লোশ মেরে দিয়েছ ! এখন—এই সামান্য দেড়গজি ক্লোশ—এও তুমি জীর হাত ধ'রে আসতে পার না !

সনা । আরে গেল, আমার যে ফল পাড়া হ'ল না ।

অলি । তবে এতক্ষণ ধ'রে পম্পা-সরোবর-তীরে কি ক'রছিলে ?

সনা । জল-হিল্লোলে নীলপদ্মের লীলা দেখছিলুম ।

অলি । কেন, নীলপদ্ম দেখে ত্রেতা যুগের কথা মনে প'ড়ে গেল নাকি ? ওঃ ! প্রভু একেবারে তন্ময় ! চুল ধ'রে টানি, তবু প্রভুর সাড়ি নাই । একবারে নিশ্চল—নিষ্কম্প ! মাথা আর নড়ে না । যেন মাথায় গন্ধমাদনের ভার ।

সনা । এ ত ভেলা বিপদ !—ফল আনি ।

অলি । গোল ক'রো না—সঙ্গে চল—একেবারে পুণ্যফল পর্যাস্ত তোমাকে পাইয়ে দিচ্ছি ।

সনা । বল কি ?

অলি । ও আর বলাবলি কি !—তোমরা মজা ক'রে খাটবে খুটবে, আর আমরা একটু কষ্ট ক'রে তোমাদের জন্ত

একটু পুণ্যসঞ্চয়ও যদি না ক'রতে পারব, তবে শাস্ত্রে আমাদের সহধর্মিণী ব'ল্বে কেন ? নাও—আর একটু-খানি পা চালিয়ে চল ।

সনা । কোথায় যেতে হবে, না ব'ল্লে, সনাতন শর্ম্মা আর পাদমেকং ন গচ্ছতি ।

অলি । যেতে হবে কেন ? কোথাও যেতে হবে না । সঙ্গে যখন আমি রয়েছি, তখন আর যাওয়া হ'ল কোথায় ? গৃহিণী গৃহমুচ্যতে । আমার সঙ্গে পথে চলছ—সে ত ঘরেই আছ । প্রাস্তরে তৃণশয্যায় আকাশ পানে চেয়ে গা ঢেলে প'ড়ে আছ—সেন স্বর্ণ অট্টালিকায় হৃদ্ধফেননিভ শয্যায় হাবুডুবু খাচ্ছ । গাছের ওপর তুড়ুক তুড়ুক ক'রে লাফাচ্ছ—যেন নন্দনকাননের পারিজাত-কুঞ্জের দোহল্য-মান ফল ।

সনা । আর তুমি সেই বৃক্ষের তলদেশে ভ্রমণশীলা রস্তা ।

অলি । না—এই যে দে'খছি তোমার দিব্য জ্ঞান জন্মে গেছে ! আমাকে একেবারে অপর্য ঠাউরে ফেলে । হোক না সে ভুবনমোহিনী—রস্তা স্বর্কেশা—তুমি কিনা তার সঙ্গে আমার তুলনা ক'রলে !—তুমি কেন তার চেয়ে কোন পতিপরায়ণা চণ্ডালিনীর সঙ্গে আমার তুলনা ক'রলে না ? যাও, তোমার সঙ্গে আর কথা কইব না ।

সনা । ক্রোধ করো না—ক্রোধ করো না—রূপে তুমি রস্তা, হৃদয়ে বিশ্বৈখরীর প্রাণ ।

অলি । আবার রস্তা—

সনা । মর্ত্তমান, মর্ত্তমান—রাগ কর কেন ? আমি কোথায়

তোমার জন্ত দূর বনে আহারের অন্বেষণে কত পরিশ্রম
ক'রে ঘুরে বেড়াচ্ছি, আর তুমি কিনা পতিবিরোগ-বিধুরা
হ'য়ে মনের সাথে দেশবিদেশে পরিভ্রমণ কচ্ছ !

অলি। তবে কি তোমার প্রত্যাশায় ঘরের ভেতরে আশাপথ
চেয়ে ব'সে থাকতে হবে ?

সনা। থাকবে না ?

অলি। কেমন ক'রে থাকব প্রাণেশ্বর !—আমি যে পুঁটে
একছটাকে বিরহিণী। কাজেই একটুমাত্র বিরহ
পেলেই—গণ্ডুষ-জলমাত্রেণ শফরী ফরফরায়তে—অর্থাৎ
চারিদিকে কিলির বিলির ক'রে ছুটে বেড়াই। গভীর
বিরহের অগম জলের রুই কাংলা বিরহিণী ত নই যে,
কখনও কালে ভজ্রে—সরোবরের মাঝখান থেকে—হুড়ুম
ক'রে একটা ঘাই মারবো।—নাও, চল—আর দূর
নেই। যাক, গল্প ক'রতে ক'রতে—কথায় কথায়
অনেক দূরে এনে ফেলেছি। প্রভুর সখাটাকে অনেক-
ক্ষণ সঙ্গীহারা ক'রেছি। দেখি সত্যবান্ সখার অদর্শনে
কতক্ষণ পম্পা-সরোবর-তীরে ব'সে থাকতে পারে !
এখনি তাকে আসতে হবে। চির-সত্যপ্রিয়ী মহাত্মা
দ্রুমৎসেনের পুত্র সত্যপ্রিয় সত্যবান্ ভিন্ন সাবিত্রীর যোগ্য
স্বামী আর কে আছে ? আমার প্রাণ ব'লুছে যোগ্য পাত্র।
পিতাও এ শুভ মিলন কার্যে সাহায্য ক'রতে আমাকে
অনুমতি দিয়েছেন। প্রজাপতি ! এ শুভকার্যে আমার
সহায় হও। এ শিবপার্বতী-মিলন দেখে আমি জীবনকে
ধন্য করি।

সনা। তবে সত্য কথা বলি অলিঙ্করা! সখাকে একলা পম্পাতীরে রেখে এসে কাজ ভাল করিনি। তুমি এত দূর আনবে জানলে, তাকে সঙ্গে ক’রে আনতুম। জানইত, তার পিতা মাতা স্বল্পক্ষণ মাত্র তার অদর্শনেই কাতর হন। এই জন্ত দূরদেশে ফল আহরণ ক’রতে নিষেধ করেন।

অলি। তা জানি ; কিন্তু পিতৃস্নেহই বল, আর মাতৃস্নেহই বল—কমলকল্লারের লীলাস্থল—পম্পার তীর থেকে টেনে আনায়,—এ দুইটা যোগ্য আকর্ষণ নয়। তার শোভার প্রলোভন থেকে ফিরিয়ে আনতে হ’লে—একটা সখী চাই।

সনা। স্বস্থানচ্যুত—বনবাসী—অন্ধ রাজার পুত্রকে কোন্ রাজা কত্যা-দানে স্বীকৃত হবে অলিঙ্করা ?

অলি। আর আমি যদি একটা পাত্রী জোগাড় ক’রে দিই ?

সনা। অসম্ভব ! তুমি বনবাসিনী—তুমি রাজাদের অভিমান বুঝবে কি ?

অলি। যদি দিই ?

সনা। তা হ’লে অলিঙ্করা ! তোমাকে জটায় বেঁধে, মহেশ্বরের মতন আমি একবার ত্রিভুবন ঘুরে বেড়াই।

অলি। বস, শুনে একেবারে অঙ্গ জল !

সনা। আহা ! এ অঙ্গ কবে জল হবে অলিঙ্করা ? তা হ’লে এ পুণ্য জলতরঙ্গ জটায় বেঁধে, ভাঙ্গড় ভোলানাতের মতন আমি চিরজীবন নেশায় বৌদ হ’য়ে ব’সে থাকি।

অলি। নাও, তামাসা রাখ। রেখে, একবার ওদিক পানে

চেয়ে দেখ দেখি । দেখ দেখি ওখানে—ওই দূরে মালা-
বান্ পর্ব্বতের অধিত্যকায়,—কি একটা অপূর্ব্ব সামগ্রী
অবস্থান করছে ।

সনা । কই ? কোথায় কি ? কিছুই ত দেখতে পাচ্ছি না ।

অলি । দেখতে পাচ্ছ না ! সেকি ?—ওই অশোক-তরুচ্ছায়ায়
অবস্থিতা । যেন মালাবানের গলদেশে নন্দনবিচ্যুতা
সস্তানকের মালা ! দেখতে পাচ্ছ না ?

(সত্যবানের প্রবেশ ।)

সত্য । সনাতন—সনাতন—সখা ! দেখেছ ? এমন অদ্ভুত
প্রকৃতিলীলা আর কখন কি দেখেছ ?

সনা । কি সখা ? কোথায় সখা ?

সত্য । পম্পাতীরে । অদ্ভুত—অদ্ভুত !—শীঘ্র এস—দেখবে এস ।

সনা । কি দেখবো ?

সত্য । ব'লতে পারব না—কিছুই ব'লতে পারব না ।

ভাষায় সে সৌন্দর্য্যবর্ণনার সংস্থান নাই । ব'লে বৈচিত্র্য
ভেঙ্গে যাবে—শীঘ্র দেখবে এস ।—কোথায় কিছু নেই—
অকস্মাৎ পম্পা যেন এক নূতন প্রাণে উদ্বেলিত হ'য়ে
উঠেছে ! পম্পার সেই অগণ্য খেত শতদল কে যেন
সহসা সিন্দূররাগে রঞ্জিত ক'রে দিয়েছে । হিল্লোলে
ঝঙ্কার—ভ্রমরে ঝঙ্কার—পম্পাতীরের তরুলতা সহসা
ফলিত ও কুসুমিত হয়ে অগণ্য পক্ষীর ঝঙ্কারে মুখরিত !

অলি । শুধু এই ! এ ত আমরা গেলেও দেখতে পাই । আমি
মনে করলুম—না জানি আরও কত কি দেখেছ ! শুধু
এই দেখে উন্মাদের মত ছুটে এলে ?

সত্য। আর দেখেছি—কিন্তু সে কি দেখলুম! সেই স্বচ্ছ পম্পা-
হৃদয় আলো ক’রে গভীর জলাভাস্তরে, অশোকমূল-
সিংহাসনে ধ্যানস্তিমিত নেত্রা—অলিঙ্করে! আমি কি
দেখলুম!

অলি। বুঝি কোন দেবীমূর্তির ছায়া!

সনা। এসব কি কথা সখা!—এসব কি কথা অলিঙ্করা!—
একি! একি! সখা সত্যবান্ একি অদ্ভুত! দেখ দেখ
সহসা অকালে অশোক তরুণঞ্জরিত হ’য়ে উঠলো!

সত্য। সেই সেই! যেন দেখা—কত দেখা! দণ্ডে দণ্ডে—পলে
পলে—অবিচ্ছিন্ন মিলনে কত দেখা! কত মাথামাধি!
দূরে—অতি দূরে—পৃথিবীর সীমার পারে—পূর্বাচল-
শিখরে কত দেখা! সেই চিরমধুময়ী দামিনীলতা—কত
মাথামাধি! সনাতন—সনাতন—ভাই! কোথায় তুমি?

অলি। কি সখা! দিগ্ভ্রম হ’য়ে গেল নাকি?

সত্য। আমি কোথায়? এখানে—এতদূরে? কেন? তুমি
কোথায়? এখানে—এতদূরে? কেন?

অলি। কাকে ব’লছ সখা?

সনা। একি! একি! এ তুমি কি ব’লছ সখা?

সত্য। মোহিনী—মোহিনী! কোন মহা প্রলোভনে মুগ্ধ হ’য়ে,
সংসারের কঠিন মৃত্তিকায়, শশিকলা আবৃত্তা ক’রতে, এত
দূরে চ’লে এসেছ?

[প্রস্থান।

সনা। ও সখা! ও সখা! কোথায় যাও? কি হ’ল! কি
দেখলে?

অলি। এখানে দাঁড়িয়ে, সখা সখা ক'রে চিংকার ক'রে হাত
পা ছুঁড়লে কি হবে? সঙ্গে যাও—ছুটে যাও—ধর।
ব্যাপার কি সংবাদ নাও, প্রতিকার কর।

[সনাতনের প্রস্থান।]

[পট-পরিবর্তন ।]

(মাণ্ডব্যের প্রবেশ)

মাণ্ডব্য। অলিঙ্করা—মা আমার! দেখ্ছ কি?

আমূলতো বিক্রমরাগতাত্মং সপল্লবং পুষ্পচয়ং দং
কুর্কস্ত্যশোক। হৃদয়ং সশোকং নিরীক্ষ্যমাণা নবযৌবনানাং॥
মূল থেকে আরম্ভ ক'রে অকালে মুকুলিত অশোক কোন
পুণ্যময়ী বরবর্ণিনীর গুভাগমন সূচিত ক'রেছে—একবার
দর্শন কর। দেখ দেখ চারিদিক দেখ। করবীর-বন,
জবা-বন, কুন্দ, মালতী, সেকালিকা নবপ্রফুল্ল পুষ্পভারে
অবসন্ন—যেন চারুৰূপা বরাদ্ধনাগণ বরণ-ডালা মাথায়
লয়ে, কোন নববধূর গৃহপ্রবেশপ্রতীক্ষায় দাঁড়িয়ে
আছে! বিক্ষুব্ধ জলনিধির হৃদয়োচ্ছ্বাস, শুভ্রজলদমূর্তিতে
সমস্ত মাল্যবান্ শৈলকে আবৃত ক'রে, পর্কতনন্দিনীর
মস্তকে ছত্রস্বরূপ হয়ে অবস্থান ক'রছে! দেখ মা—
চেষ্টে দেখ।

অলি। পিতা! এ সমস্তই ত আপনার আনন্দময় বিশাল হৃদ-
য়ের প্রতিবিম্ব।

মাণ্ডব্য । যাও মা কল্যাণময়ি ! চির-আকাজিক্তের ক্ষণিক
দর্শনে অবসরা মাকে আমার জাগরিত ক'রে আশ্রমে
নিয়ে এস ।

[প্রস্থান ।

অলি । (অগ্রসর হইয়া) সাবিত্রি—সাবিত্রি ! উঠ—বেলা
হ'য়েছে—আশ্রমে চল ।

সাবিত্রী । (উঠিয়া) চল ভগিনি—গুরুর পদারবিন্দে সর্কাস
অঙ্কিত ক'রে জীবন সার্থক করি ।

পঞ্চম দৃশ্য—পথ ।

নারদ ও মাণ্ডব্য ।

নারদ । তাই ত বলি, সম্মুখে একটা অন্ধকারের জাল ফেলে
কে আমার ভবিষ্যদৃষ্টি রোধ ক'রে ব'সে আছে !
ভুবনপালিনী—ত্রিসন্ধ্যাকুপিনী—তুমি ? পতিব্রতা-মাহাত্ম্যা-
প্রচারের জন্ত মা আমার ধরায় অবতীর্ণা—মদ্ররাজগৃহে
প্রচ্ছন্নবেশে ষোল বৎসর কুমারী মূর্তিতে অবস্থান ক'রছেন ;
এ ষোল বৎসরের ভিতর একটা দিনের জন্তও আমাকে
রূপা করবার অবকাশ পাননি । রাজা অশ্বপতির অস্তিত্ব
পর্যন্ত আমার স্মৃতি থেকে বিলুপ্ত ক'রে দিয়েছিলেন ।
পাছে আমি ভুলে কোন দিন এ পথে পদার্পণ করি ;
পাছে কণ্ঠাদায়গ্রস্ত রাজা, কণ্ঠার পাত্ৰাভুসন্ধানের জন্ত
আমাকে অনুরোধ ক'রে বসেন । এবারে তোমারই

অদৃষ্ট সুপ্রসন্ন। মা এবারে পতিনির্কীচনের ভার তোমারই ওপর প্রদান ক'রেছেন। মাণ্ডব্য! মায়ের চিরসেবক—গায়ত্রী-সাধক—তুমি আমার পরমাত্মীয়। সুতরাং যোগ্য ব্যক্তিতেই এ ভার সমর্পিত। আত্মীয়—প্রিয়—তপস্বি-প্রধান! তোমার এ সৌভাগ্য আমি নিজেই সৌভাগ্য জ্ঞান করি। তাই বা কেন? আমি নিজে এ ভার প্রাপ্ত হ'লে যত না আনন্দিত হ'তুম, তোমার পাওয়ায় তা হ'তে শতগুণ আনন্দ লাভ করিছি। যাক্, এখানে আর বেটীর সঙ্গে দেখা ক'রব না। দেখা, একেবারে তার পিতৃভবনে মদ্ররাজ সম্মুখেই করা যাবে। পথে আর তার গমনের বিঘ্নস্বরূপ হয়ে দাঁড়াব না। বৎস, কায়মনোবাক্যে আশীর্বাদ করি—তুমি সফলকাম হও।

মাণ্ডব্য। মায়ের রূপায় আপনি একবার শিবশক্তি-মিলনের অধিকার পেয়েছিলেন। দক্ষমুখে পতিনিন্দা শুনে যে দিন সতী অভিমানে দেহত্যাগ করেন, সতীবিয়োগ-কাতর উন্নত ভোলানাথকে প্রকৃতিস্থ দেখবার জন্ত, মায়ের অনুসন্ধানে আপনি একবার ত্রিভুবন পরিভ্রমণ ক'রেছিলেন। সে দিন আপনার কি দিন!—যে দিন নগেন্দ্র-কন্দরে কুসুমিত কুঞ্জবন মধো সখীগণ-পরিবৃত্তা শিবার্চন-নিরত। আনন্দময়ীকে আপনি প্রথম দর্শন করেন,—প্রভু, সেদিন আপনার কি দিন! শৈলশিখরের সুধাহিল্লোলময় সরোবরতীরে অগণ্য-শ্বেত-শতদল-পরিমল-নিষেবিতা কমলেশ্বরী নগেন্দ্রনন্দিনী অষ্টমবর্ষীয়া গৌরী যেদিন, দুর্কী চন্দন বিলপত্র করপল্লবে—অর্ঘ্যগ্রহণ ক'রে

—নিম্নলিখিত নয়নে শিব শিব শব্দে সমস্ত মেদিনী কল-
ঝঙ্কারে মুখরিত ক'রেছিলেন, বীণাধর! তখন আপনি
আত্মবিস্মৃত। জননীর সম্মুখে আত্মবিস্মৃত—চিত্রপুতলিকাবৎ
নিশ্চল। অরণেই যে মহাভাগ, সর্বশরীর রোমাঙ্কিত
হয়ে উঠে!

নারদ। ঋষিরাজ, তুমিই বা দেখতে বাকি রাখলে কই?
অভাগ্য আমি অভিমানাক্ষ চক্ষু মায়ের সম্মুখে দাঁড়িয়েও
বা দেখতে পাইনি,—অতুল লাবণ্যময়ীর সে সময়ের
সমস্ত সৌন্দর্য্য এইমাত্র তোমার মানসচক্ষের আয়ত্তীভূত
হয়েছে। আমি তোমার কৃপায় আবার দেখতে পাচ্ছি—
যা তখন দেখিনি, তাও দেখতে পাচ্ছি। সেই বহু দূরের
—যুগ যুগান্তরের—ভক্তিবিনম্রা উমাশলীর জলভারাক্রান্ত
নয়ন যেদিন শৈলশিখরে অমিয়-নির্ঝরিণীর সৃষ্টি ক'রেছে
—ঋষিরাজ, তোমার কৃপায় শতগুণ সৌন্দর্য্যে সে শোভা
আমার মানসপটে অঙ্কিত হয়ে উঠেছে। তুমি ধন্ত!
আবার বলি—তুমি ধন্ত!!

মাণ্ডব্য। আমি আপনার শিষ্য—দাস! দেবর্ষি, যার নাম-
অরণে মানব হৃদয়ে ভক্তিরস প্রবাহিত হয়, আমি ভাগ্য-
বশে আজ সেই আপনার শ্রীচরণ-সমীপে উপস্থিত। যদি
কিছু দেখতে পাই, সে আপনার ওই শ্রীচরণেরই কৃপায়
বই ত নয়।

নারদ। ভাগ্যবান, তুমি আঙ্গ প্রত্যক্ষে পরোক্ষে মায়ের চরণ
দর্শন ক'রছ। শুধু তাই নয়,—আমি অষ্টমী গৌরীর
ঘটকালী ক'রেছি, তুমি ষোড়শী অম্বিকার স্বামি-সম্মিলনে

ব্যবস্থা ক'রছ। আমার সময়ে বেটী কচি আট বছরের
মেয়ে--চঞ্চলা--সংসারের কোন কথাই জানে না, বোঝে
না ; তোমার সময়ে বেটী ষোড়শী ধীরা গম্ভীরা জ্ঞানময়ী
মাতৃকপিণী। আমার সময়ে মা অফুটন্ত কমলকোরক ;
আর তোমার সময়ে মা আমার সহস্রদলে প্রফুটিতা
ভুবনব্যাপি-দৌরভয়ময়ী। আমার সময়ে যোগেশ্বর মায়ের
অনুসন্ধানে সহস্রকোশ দূরে যোগাসনে উপবিষ্ট ;
আর তোমার সময়ে যোগেশ্বরী নিজেই পতি-অম্বেষণে
নিরতা। ঋষিরাজ, তবে আমাদের মধ্যে অধিক
ভাগ্যবান কে ?

মাণ্ডব্য। আমি কি এ শিবশক্তি-মিলনের যোগ্য ঘটক !

নারদ। নিশ্চয় ; নইলে মা খুঁজে খুঁজে তোমাকেই বা এসে
ধ'রবেন কেন ? ভক্তিরসের আধার—মায়ের প্রিয় সেবক
—তুমি যোগ্য নও ! তবে যোগ্য কে ? তা হ'লে
ঋষিরাজ, আগাকে অনুমতি কর, আমি বিদায় হই।
যখন এতদূরে এসেছি, তখন আর মাকে না দেখে কেমন
ক'রে ফিরব ! মাকে দেখবার জন্য প্রাণ আমার বড়ই
ব্যাকুল হয়ে উঠেছে।

মাণ্ডব্য। এ কথায় আমি আর কি ব'লব ! আপনার সঙ্গশ্লথ—
স্বর্গশ্লথ হ'তেও মধুর। দেবর্ষে ! সে যে চিরদিনের উপ-
ভোগ্য সামগ্রী ! চিরদিন পাশে থাকলেও যে, এ স্নহসাধ
মেটাবার নয়। আপনার ইচ্ছায় বাধা দিই, আমার
এমন শক্তি কি ! তা হ'লে আমার প্রণাম গ্রহণ করুন।

[প্রণাম ও প্রস্থান।

(প্রস্থানোত্তত নারদ-সম্মুখে তুঙ্গুরু ও মালিনীর
প্রবেশ।)

তুঙ্গুরু। বস! এইবারে বেঁচে গেছিস, আর ভয় নেই। নে,
এইবারে এই ঠাকুরকে মনোযোগ দিয়ে প্রণাম কর।
ঠাকুর দয়াময়,—তাকে এখনি এই গোলক-ধাঁধা থেকে
বা'র ক'রে নিয়ে যাবে এখন।

মালিনী। বাবা ঠাকুর, প্রণাম হই।

[উভয়ের প্রণাম।]

নারদ। কে তুমি ভদ্রে ?

মালিনী। না বাবা ঠাকুর, আমরা ভদ্রে নই—শূদ্রে।

নারদ। ভাল, তোমরা এখানে কি ক'রতে এসেছ ?

তুঙ্গুরু। আজ্ঞে, আমরা ছুটোছুটি ক'রতে এসেছি।

নারদ। ছুটোছুটি আমরা সবাই ক'রতে এসেছি।

তুঙ্গুরু। য্যা—বল কি দেবতা! তুমি শুদ্ধ ছুটোছুটি ক'রছ!

নারদ। আমি শুধু কেন, সমস্ত সংসার ছুটোছুটি ক'রছে।

তুঙ্গুরু। য্যা—ও বউ!

মালিনী। তাই ত গো! তা হ'লে আমাদের সংসার ?

তুঙ্গুরু। আর সংসার! সে ত একখানা কুঁড়ে ঘর; সে এতক্ষণ
ছুটোছুটি ক'রে, কার পাদাড়ে হয় ত হাড় গোড় মুচুড়ে
প'ড়ে আছে।

নারদ। কোথায় যাবে ?

তুঙ্গুরু। আর কোথায় যাব! যে সংবাদ দিলে, তাতে ত যাবার
দফা রফা।

দ্বিতীয় অঙ্ক ।

নারদ । ভাল, কোথায় যেতে চাও বল । আমি তোমাদের
সঙ্গে ক'রে নিয়ে যাচ্ছি ।

মালিনী । গিয়ে কি ক'রব দেবতা ! আমি অবলা,—সংসারের
সঙ্গে ছুটতে পারব কেন ?

নারদ । (স্বগত) হেঁয়ালিতে কথা কইতে গিয়ে দেখছি বিপদ
ক'রে ব'সেছি । (প্রকাশ্যে) তোমাদের যাতে না ছুটতে
হয়, তার উপায় ক'রে দেবো, এখন চল,—কোথায় যাবে
বল, আমি সঙ্গে ক'রে নিয়ে যাই ।

তুষ্ক । তবে মনের হঃখের কথা বলি শোন দেবতা !—এই যে
এটাকে আমার সঙ্গে দেখ্‌ছো, এটা আমার চৌদ্দপুরুষের
পিণ্ডির হাঁড়ী ।

নারদ । সে কি ? এই না তুমি ওকে বধু ব'লে সম্বোধন ক'রলে ?

তুষ্ক । সে ত চিরকালই ক'রব । তুমি ব'লেও ক'রব আর
না ব'লেও ক'রব । বাবা আমাকে মৃত্যুকালে এই
সামগ্রীটা শুধু দিয়ে গিছলো । ব'লে গিছলো—এটিতে
বংশের পিণ্ডি রইলো ; খুব সাবধানে যত্ন ক'রে রেখো—
যেন ভেঙ্গে ফেলো না । কাজেই ওটাকে পুত্‌পুত্‌ ক'রে
—শিকের তোলায় মতন ক'রে—তুলে রেখেছিলুম ।
এখন কোন কারণে এ দেশে এসে বড়ই বিপদে প'ড়ে
গেছি দেবতা !

নারদ । বিপদ !—মাণ্ডব্যের আশ্রম,—এখানে বিপদ !

তুষ্ক । ভয়ঙ্কর বিপদ দেবতা,—ভয়ঙ্কর বিপদ ! আর ওই যে
দেবতার নাম ক'রলে, সেই দেবতাই যত নষ্টের মূল ।
সেই দেবতা কতকগুলো সম্পর্ক বউএর ঘাড়ে চাপিয়ে

দিয়েছে;—কচি বউ সে ভারী ভারী সম্পর্কগুলো সামলে উঠতে পারছে না। বলে—‘গর্ভ ভূত্রেহ মাতরা’—‘দশমে মাসী’। আবার তার ব্যাকরণ-পড়া চেলাগুলো বউকে আমার ধ’রে—এই বিবাহ করে ত, এই বিবাহ করে !

নারদ। তা হ’লে বিপদের কথা বই কি !

তুধুরু। এত তুচ্ছ বিপদ। শেষকালে শুনি, আমি এখানে এসে অবধি বউএর প্রাণের সর হ’য়ে গেছি। আমি যখন সর হ’য়ে গেলুম, তখন বউএর প্রাণ ত নিশ্চয়ই দুধ হয়ে গেছে। চারিদিকে টকো কামরাঙ্গা গাছ—বউ কোন দিন তলায় যেতে যেতে জমে যদি দই হয়ে যায়, কিংবা আলগা প্রাণ—যদি বুনো বেরালে চক্ চক্ ক’রে কোন দিন মেরে দেয়, তা’হলে আমার দশা কি হবে দেবতা !

নারদ। ভয় নেই, তোমরা আমার সঙ্গে চল।

তুধুরু। আমি চ’ল্লে কি হবে দেবতা ! বউ কি আমার আর চলতে পারবে !

নারদ। আমি এমন ক’রে তোমার বউকে নিয়ে যাব যে, বউ তোমার পথের কোনও কষ্ট টের পাবে না।

মালিনী। তা হ’লে কি বাবা ঠাকুর তুমিও আমাকে বিবাহ করে নিয়ে যাবে।

তুধুরু। বাবা ঠাকুর কেনরে পাগলী ! শুনলুম—বাবা ঠাকুরের এক ঢেঁকি আছে, সেই তোকে বিবাহ ক’রবে।

নারদ। বিবাহ ক’রবে কি ?

তুধুরু। তোমায় কি বিবাহ ক’রতে ব’লতে পারি দেবতা !

আমার স্ত্রী লক্ষ্মী জী তোমার কাঁধে চাপিয়ে কি
মেরে ফেলব !

নারদ । ওঃ ! বি—বাহ ।

তুধুরু । আজ্ঞে, বি—পূর্বে দিয়ে বয়ের খাতে ঘড়র্ ঘড়র্ ।

নারদ । ঘড়র্ ঘড়র্ !

তুধুরু । আজ্ঞে, তারা ব'লেছিল ষং ; কিন্তু আমি এখন
দেখছি ঘড়র্ ঘড়র্ ।

মালিনী । আর ঘড়র্ ঘড়র্ও নেই দেবতা, এখন সাঁই সাঁই
—ছুটোছুটি ক'রে এখন গলা সাঁই সাঁই ক'রছে ।

নারদ । বি-বাহ ! বিশেষ প্রকারে বহন ক'রে নিয়ে যাওয়া ।

মালিনী । হাঁ দেবতা ! তোমার টেকিকে হুকুম কর, সে আমা-
দের বিবাহ ক'রে নিয়ে যাক ।

নারদ । সে যা ভাল বিবেচনা হয়, করা যাবে এখন । এখন
কোথায় যাবে বল ?

তুধুরু । মদ্র দেশে ।

নারদ । তোমরা কি রাজকুমারী সাবিত্রীর সঙ্গে এসেছিলে ?

তুধুরু । আজ্ঞে, সঙ্গে আসিনি । আমরা এসে দেখি রাজ-
কুমারী এখানে ! সেই বাবা ঠাকুর, রাজকুমারী আর
তার বরকে দেখাবে ব'লে, আমাদের এখানে আস্তে
বলেন ।

মালিনী । এসে রাজকুমারীকেও দেখলুম, আর তার বরকেও
দেখলুম । কিন্তু বে' দেখলুম না । কেবল মালা গাঁথে
ঘুরে বেড়ালুম ।

নারদ । তোমরা মালাকার ?

মালিনী । হাঁ দেবতা, আমি আর আমার স্যোয়ামী—ছজনে
রাজকুমারীর শিবপূজার ফুল যোগাতুম ।

নারদ । বটে ! তবে ত তোমরা ভাগ্যবতী ভাগ্যবান্ ।

তুষ্কুর । আজ্ঞে আগে বাণ ছিলুম, এখন দিদিরাণীর ব্যাপার
দেখে তেউড়ে ধনুক হ'য়ে গেছি । বর দেখলে, আমা-
দেরও দেখলে ; কিন্তু বে ক'রলে না !

মালিনী । আমাদের মালাও নিলে না ।

নারদ । বোধ হয়, এখনও সময় হয়নি ।

তুষ্কুর । দেখ দেবতা, অভিমানে আর আমরা দিদিরাণীর সঙ্গে
কথা কইনি ।

মালিনী । দিদিরাণী সঙ্গে যেতে অনুরোধ করেছেন, আমরা
যাইনি ।

নারদ । মালা কি ক'রলে ?

মালিনী । দিদিরাণী যখন নিলে না, তখন করি কি, মালা সঙ্গে
নিয়ে চ'লেছি ।

নারদ । কই দেখি । (মালিনীর মালা প্রদর্শন) বাঃ বাঃ !
এখনও ত অটুট রয়েছে মা !

তুষ্কুর । কি ! এ মালা শুকুবে ? দিদিরাণী আর বরের নামে
গাঁথা মালা—এ মালা শুকুবে ? তা হ'লে দিদিরাণীর মুখ
দেখবো না ।

মালিনী । কি ! এ মালা শুকুবে ? এ মালা শুকুলে আমরা
ছজনে জলে কাঁপ দেবো না ।

নারদ । না না, শুকুবে কি ! সাগর শুষ্ক হবে, সহস্র সূর্য্য
কিরণবিতরণে নিশ্চিভ হবে, তথাপি তোমাদের রচিত

এ মালা শুকুবে না। দেখ মা, এখনও গলদেশে ধারণের সময় হয়নি ব'লে তোমাদের দিদিরাণী এ মালা গ্রহণ করেনি। এক বৎসর পরে সেই সময় আসবে, তখন চিরদিনের জন্ত অটুট সৌরভে এই মালা তোমার দিদিরাণী ও তার বরের গলদেশে আশ্রয় ক'রবে। এখন আমার সঙ্গে চল।

[প্রস্থান।

(গীত।)

পিরীতি লাঞ্ছনা অতি মনোবাথা কারে কই।

তার, কাছে রাখা দূরে থাকা কিছু না যাতনা বই।

রও যদি প্রাণ দূরে দূরে প্রাণ জ্বলে বিরহ জ্বরে,
কাছে এনে রাখলে পরে হই তপ্ত খোলায় ভাজা থই।

মালঞ্চ কামিনী ফুল, দূরে থেকে হয় প্রাণাকুল

ছুঁতে গেলে বেজায় ভুল, যেন পাকা ধানে মই।

দেখতে যেন দুধের বাটী, সরপুরিয়া পরিপাটী,

হাতটী দিলে হওলো খাঁটি, বাঘ তাড়ান টকো দই।

ষষ্ঠ দৃশ্য—রাজবাটী।

নারদ ও অশ্বপতি।

নারদ। মহারাজ, তোমার গুণে দেব দানব গন্ধর্ব্ব সকলেই মুগ্ধ; আমিও যে তোমার ভক্তির দ্বারা আকৃষ্ট হ'য়ে তোমাকে দেখতে এসেছি, এতে বিন্মিত হবার কি আছে! তুমি রাজর্ষি জনকের তুল্য নিকাম সংসারী। রাজর্ষি

জনকের কাছে জ্ঞানশিক্ষার্থ আমি একদিন নারায়ণ কর্তৃক প্রেরিত হয়েছিলুম। সেই মহাত্মার কাছে আমি যে শিক্ষা লাভ করেছিলুম, আমি এতদিনের যোগ-সাধনায় তার শতাংশের একাংশও শিক্ষা পাইনি। সুতরাং তোমার এখানে আগমনে আমরাও যে কিছু স্বার্থ নেই, এটা বোধ ক'রো না। মহারাজ! তুমি মহাপ্রাণ—যোগীরও পূজ্য। তোমার রাজ্য—ধর্মরাজ্য, প্রজা—চিরসুখী, কালে পর্জন্ত বর্ষণশীল, পৃথিবী শস্তশালিনী—চির শ্রামলা। স্ত্রী মালবী—যেন স্বয়ং সত্য-জননী প্রসূতি। পুণ্য তীর্থের স্থায়—তোমার রাজ্য-দর্শনেও পুণ্য সঞ্চিত হয়।

অশ্ব। বহু বৎসর আপনার এ দাসের গৃহে পদধূলি পড়ে নি। নিজ গুণে আমাকে এই যে সুমিষ্ট বাক্য দ্বারা পরিতুষ্ট ক'রলেন, আমি যদি এ সমস্ত গুণের কণা মাত্রেরও অধিকারী হ'য়ে থাকি, তাও শুধু আপনার ত্রিচরণের রূপায়। সুতরাং আমার গার্হস্থ্য জীবনে যদি কিছু ধর্ম সঞ্চিত হ'য়ে থাকে সে সমস্তের অধিকারী আপনি। আমি আপনার চরণ ধ্যান ক'রে সে সমস্তই আপনাতেই সমর্পিত করি, আপনি গ্রহণ করুন। কিন্তু এই পর্য্যন্ত গুরুদেব! যদি রাজবংশে কিছুমাত্রও অধর্ম স্পর্শ করে, অনুমতি করুন, শুদ্ধমাত্র আমি যেন তার ফলভোগ করি। দয়াময়, এইটা ভিক্ষা—এইটা দেখবেন—যেন আমার পিতৃপুরুষকে সে পাপ স্পর্শ না করে।

নারদ। সে কি, তোমার বংশে পাপস্পর্শ! আবার সে পাপের

কিনা তোমা হ'তে উৎপত্তি হবে ? এ যে অসম্ভব কথা মহারাজ !

অশ্ব । প্রভু, আপনাকে উপদেশচ্ছলে কোন কথা কওয়া ধৃষ্টতা । আপনি জানেন না,—এ কৃথা মনেও বিশ্বাস করা উন্নততা । দয়াময়, মদ্রবংশে এক মহান্ অনর্থ সংঘটিত হবার উপক্রম হ'য়েছে । ত্রিরাত্র মধ্যে আমাকে এক দারুণ পাপ অধিকার ক'র্বে । এই আশঙ্কায় আমি বড় ভীত হ'য়ে আছি ।

নারদ । ব'লতে যদি আপত্তি না থাকে, তা হ'লে কথাটা কি শুনতে পাই না কি ?

অশ্ব । কিন্তু ভয়—কেন ভয় ? আমার এই সঙ্কট সময়ে ভবভয়-হারী স্বয়ং ভগবান্ আমার গৃহে । মোহান্ন আমি, তাই ভীত হ'ছি । এই ভীতিপ্রকাশেই আমাতে পাপস্পর্শ ক'র্ছে ।

নারদ । এমনি ভক্তিমান্‌ই তুমি বটে ! মহারাজ, তোমার পবিত্র হৃদয়ে যদি কখন পাপ স্পর্শ করে, আমার বিশ্বাস—সে পাপ স্পর্শমাত্র সহস্র তীর্থ ভ্রমণরূপ মহাপুণ্যে পরিণত হবে । কিন্তু মহারাজ ! বিষয়টা কি, জানবার ইচ্ছা হয়েছে যে ।

(বেগে মালবীর প্রবেশ ।)

মালবী । মহারাজ ! মহারাজ ! সাবিত্রী আমার ফিরে আসছে । কেও—প্রভু !—দয়াময় !—আপনি ? তাইত বলি, আমার এ সৌভাগ্য কে আনলে ? আমার নয়নের নিধি—আজ

আবার আমার সংসার আনন্দময় ক'রতে ফিরে আসছে। আমার হারানিধিকে কে ফিরিয়ে এনে দেয়—কে তাকে ফিরিয়ে আনালে। তুমি—দয়াময়—তুমি না হ'লে এ অবটন কে ঘটায়? আর ভয় কেন মহারাজ! স্বয়ং অভয়-দাতা নারায়ণ আপনার সন্মুখে। কৃপাসিদ্ধ! কৃপা কর; এই দেখুন, আমার এই সুখের সংসার এতক্ষণ অন্ধকার ছিল। যোগিরাজ তুল্য অটল অচল মহানুভাব হয়েও, স্বামী আমার কতটা বিয়োগে বালকের তায় দিবারাত্র অশ্রুজল বর্ষণ ক'রছিলেন। সেই আনন্দময়ী মা আমার, আবার আমার ঘর আলো ক'রতে ফিরে আসছে। কৃপানিধান! দয়া ক'রে মদ্ররাজগৃহের চারিধারে তোমার চরণরেণুর একটা গাণ্ডী দিয়ে যাও,—আর যেন কোনও ক্রমে আমার ঘরে নিরানন্দ না প্রবেশ করে!

নারদ। কতটা, কি ব'লছ? নিরানন্দের কথা কি ব'লছ? আমি ত কিছুই বুঝতে পারছি না মা!

মালবী। কেন প্রভু! জ্ঞানের চাপে ভিমরতি হয়ে গেছেন নাকি? সে দিন এক প্রভু এলেন, তিনিও কিছু জ্ঞানেন না; আপনি এলেন, আপনিও কিছু জ্ঞানেন না। অথচ বিপদ বুঝে, একটা একটা ক'রে ধীরে ধীরে এসে এখানে পদধূলি দিচ্ছেন। বলি, সমস্ত জগতে জ্ঞান বিলিয়ে নিজের জ্ঞানের ঘর খালি ক'রে ফেলেছেন নাকি? তা বেশ,—বুঝতে পারুন আর নাই পারুন মন্ত্বরূপে আমার স্বামীকে ছোটো একটা সৎপরামর্শও ত দিতে পারেন। তাতে ত আর আপনার ভূত ভবিষ্যৎ বোঝবার দরকার

হবে না! দয়াময়! রক্ষা করুন। মন্ত্রণায়, আশীর্বাদে,
দাস দাসীর হিতকর কার্যে মদ্রবংশের ধর্ম রক্ষা করুন।
কত্থা আমার ফিরে আসছে—ত্রিরাত্র অরণ্যবাস ক’রে
আবার রাজধানীতে ফিরে আসছে। শুভ সংবাদ কি
অশুভ সংবাদ লয়ে ফিরে আসছে, তা ব’লতে পারি না।
প্রাণ কাঁপছে! একমাত্র নন্দিনী—কুলের প্রদীপ-স্বরূপা—
তথাপি তাকে প্রত্যাশমন ক’রে আনতেও প্রাণ কাঁপছে!
ভবভয়হারী! ভয় দূর করুন—কিছুক্ষণের জন্ত মাতৃ-
হৃদয়ের, সন্তানজনিত আশঙ্কা উদ্বেগের সহস্র তরঙ্গ, আপ-
নার বিশাল হৃদয়ে ধারণ করুন—সন্তানের জন্ত মায়ের
প্রাণ কি করে বুঝুন,—বুঝে, অভাগিনী মাকে রক্ষা
করুন। ভয় ক’রছে—আমার বড় ভয় ক’রছে—মাকে
যে বক্ষে ধ’রে চুষন ক’রব, তা পরের কথা—মায়ের
মুখের দিকে চাইতেও আমার সাহস হচ্ছে না।

নারদ। মা আসছেন—ওই সন্তানকে রূপা ক’রে দেখা দিতে
আসছেন। আহা কি রূপ! ষোল কলায় পূর্ণ হয়ে
স্বধাময়ি! একি নিতুই-নব মোহিনী মূর্তি ধারণ ক’রেছ!
পাগল ভোলাকে ভোলাতে তোর এত রূপ কেন মা!
তিনি যে তোর রণরঙ্গিনী মূর্তি দেখলেও প্রেমানন্দে
ধরায় বিলুপ্তি হন!

(সাবিত্রীর প্রবেশ ।)

মালবী। মা আমার! সম্মুখে তোমার মদ্রবংশের কুলগুরু—
দেবর্ষি নারদ। অগ্রে তাঁকে প্রণাম কর।

(সাবিত্রীর প্রণাম ।)

নারদ । কত্যাটিকে কুমারী দেখছি না মহারাজ ?

অশ্ব । হাঁ প্রভু ! কত্যা আমার এখনও কুমারী ।

নারদ । এ কত্যা কোথায় গিয়েছিলেন, কোথা হ'তেইবা আগমন ক'রলেন ? আর এমন যুবতী কত্যা কে তুমি স্বামী-হস্তে সম্প্রদান ক'রছ না কেন ?

অশ্ব । ইনি এই কার্যের জন্তই প্রেরিতা হয়েছিলেন, সম্প্রতি এই আগমন ক'রলেন । ইনি যে ভর্তাকে বরণ ক'রেছেন, আপনি কত্যা কাছের তার বৃত্তান্ত শ্রবণ করুন । মা আমার ! কি ক'রে এলে না এলে, দেবধীর কাছে বিস্তারিত রূপে বর্ণন কর ।

সাবিত্রী । পিতৃবাক্য আর দেববাক্য উভয়ই তুল্য । স্মৃতরাং প্রতিগ্রহ না ক'রলে ধর্ম পতিত হ'তে হয় । দেব ! পিতৃ কর্তৃক আদিষ্ট হয়ে আপনাকে নিবেদন করি, শ্রবণ করুন ।—শাৰ্দ্ধদেশে ছামৎসেন নামে বিখ্যাত এক ধর্মাত্মা ক্ষত্রিয়ভূপতি ছিলেন । কালক্রমে তিনি অন্ধ হয়ে পড়েন । যে সময় এই ধীমান্ মহীপতির নয়ন বিনষ্ট হয়, তখন তাঁর পুত্র নিতান্ত বালক । স্মৃতরাং নিকটবর্তী কোন রাজা—পূর্ব-শত্রু—এই ছিদ্র পেয়ে তাঁর রাজ্য অপহরণ করে । রাজা ছামৎসেন ভাৰ্য্যা ও শিশু পুত্রকে সঙ্গে লয়ে বনে গমন করেন । এখন তিনি সেই মহাবনে অবস্থিত হয়ে মহাব্রত-নিষ্ঠ—তপশ্চারণ-পরায়ণ—রাজর্ষি । তাঁর পুত্র সত্যবান্, নগরে জন্মগ্রহণ ক'রেও তপোবনে ঋষিগণ মধ্যে তপস্যার আবরণে বর্জিত হয়েছেন ; অতএব তিনিই আমার উপযুক্ত ভর্তা জানে আমি তাঁকে মনে মনে বরণ ক'রেছি ।

মালবী । মা মঞ্চলচণ্ডী ! ষোড়শোপচারে তোমার পূজা দেবো

মা ! তুমি আজ মদ্ররাজের মুখ রক্ষা ক'রেছো ।

নারদ । ছ্যামৎসেন-পুত্র সত্যবান্ ! তাকে বরণ ক'রেছ ! কি

ক'রলে সাবিত্রী ! হায় হায় হায় ! মহারাজ, সাবিত্রী না

জেনে মহৎ পাপ ক'রেছেন !

মালবী । সে কি দয়াময় ! সাবিত্রী কি করেছে ! হা সাবিত্রি

অভাগিনি ! কি ক'রে এলি ?

অশ্ব । কেন দেবর্ষে ? সত্যবান্কে জামতা ক'রলে আমার

কৌলীন্তের কি হানি হবে ?

নারদ । তা নয় মহারাজ,—ছ্যামৎসেনের তুল্য কুলীন রাজা

আর কে আছে ?

মালবী । তবে ?

অশ্ব । সত্যবান্ কি গুণহীন ?

নারদ । তাও নয় মহারাজ,—সত্যবানের তুল্য গুণবান্ যুবক

আমি সমস্ত পৃথিবীর মধ্যেও দেখতে পাই না ।

মালবী । তবে ? সত্যবান্ গুণবান্—কুলীন, তথাপি সাবিত্রীর

বরণের কথা শুনে আপনি হায় হায় ক'রে উঠলেন কেন ?

নারদ । সত্যবানের পিতা ও মাতা উভয়েই সত্য বলেন, পুত্রও

সত্যশ্রমী ; এই জন্ত ঋষিগণ তাঁর নাম রেখেছেন

সত্যবান্ ।

মালবী । তবে প্রভু ! তাঁর দোষ কি ?

নারদ । সত্যবান্ মহেন্দ্রের ছায় শৌর্য্যসম্পন্ন, বৃহস্পতির

তুল্য বুদ্ধিমান্, সূর্য্যসদৃশ তেজস্বী, পৃথিবীর ছায় ক্ষমান্বিত ।

মালবী । এমন সদৃশগুণযুক্ত স্বামী ত বহু তপস্তার ফলে পাওয়া

যায়, তবে মেয়ে আমার মহাপাপ ক'রেছে—একথা বললেন কেন ?

অশ্ব। রাজযোগ্য সমস্ত গুণই যখন তাতে বর্ত্তমান, তা হ'লে দেবর্ষে ! তার দোষ কি ?

নারদ। রাজকুমার দাতা, ব্রহ্মনিষ্ঠ, সত্যবাদী, রূপবান্, মহানু-
ভাব, প্রিয়দর্শন।

(অলিঙ্করার প্রবেশ।)

অলি। বস্ ! তবে সে কেমন ক'রে সাবিত্রীর বর হয় !

নারদ। তাতে সারলা নিত্য-প্রতিষ্ঠিত ! মর্যাদাও নিশ্চলা।

অলি। সাবিত্রী ! ভগিনী ! বেচে বেচে এমন মহাপুরুষকেও আত্মসমর্পণ ক'রে এসেছ ! দেবর্ষি ঠাকুরকে এ কার্যের অত্র ঘটক নিযুক্ত ক'রতে হয়। চিরদিন ওঁর যেমন ক'রে আসা অভ্যাস, এবারেও তাই ক'রতেন—তোমাকে কোথা থেকে একটা ভস্মমাখা ভুতুড়ে বুড়ো বর যোগাড় ক'রে এনে দিতেন। এবারে ত আর সেটার সুবিধে হ'ল না—চখের ওপর সোণার বিজলী নবজলধরে সংলগ্ন হ'ল,—এও কি ওঁর প্রাণে সহ্য হয় !

অশ্ব। একি মা ! কে তুমি ?

মালবী। সাবিত্রী !—সাবিত্রী !—মা আমার ! এই অপরূপ তেজস্বিনী বালিকাটি কে ? মায়ের মধুর কথায় আমার হৃদয়ে আবার নববাৎসল্যের সঞ্চার হ'ল। সাবিত্রী ! আজ যেন আমি আর একটা নূতন সর্কশোভাময়ী কথা লাভ ক'রলুম। কে মা তুমি ?

সাবিত্রী । ওটী আমার পূর্বজন্মের পুণ্যার্জিতা ভগিনী ।—

নারদ । উনি মাণ্ডব্য-নন্দিনী, ওঁর নাম অলিঙ্করা ।

অলি । মা ! নন্দিনী কাছে এসেছে—সুতরাং কতাই আমার পরিচয় । তারপর চুপ ক'রে রইলেন যে ঠাকুর ? সাবিত্রীর সম্প্রদানে রাজাকে অহুমতি প্রদান করুন ।

নারদ । কেমন ক'রে করি ! একটা মাত্র মহৎদোষ সত্যবানের গুণরাশিকে অভিভূত ক'রে রেখেছে । সত্যবান্ স্বন্নাযু । সুতরাং এ সমস্ত গুণ এক ক্ষণস্থায়ী পাত্রে রক্ষিত হ'য়ে নিষ্ফল । শুধু তাই নয়—দুঃখের কারণ হয়ে প'ড়েছে ।

সকলে । স্বন্নাযু ! সেকি স্বন্নাযু !

নারদ । আজ হ'তে ঠিক একবৎসর পরে সত্যবান্ সহসা শিরো রোগে আক্রান্ত হ'য়ে দেহত্যাগ ক'রবে ।

সকলে । বলেন কি ?

নারদ । বিধিলিপি ! এত সদৃশ্যের আধার রাজকুমার বৃদ্ধ অন্ধ পিতাকে ও বৃদ্ধা জননীকে অকূল শোক-সাগরে ভাসিয়ে পরলোকে প্রস্থান করবেন ।

অলি । কেউ ধ'রে রাখতে পারবে না ?

নারদ । আজও পর্য্যন্ত ত কেউ পারেনি জননী !

অশ্ব । সাবিত্রী ! সত্যবান্কে পতিত্বে স্বীকার করবার সঙ্কল্প ত্যাগ কর ।

মালবী । হা ভগবান্ পূর্বজন্মে এত কি কঠোর পাপ ক'রে-ছিলুম যে, প্রতিদিন আমি এই কঠোর যন্ত্রণানলে দগ্ধ হচ্ছি । আর নয়—অসহ্য । নারী আমি কত সহ্য ক'রব । আমার সর্বশরীর কেমন কচ্ছে । পারলুম না

আর বুঝি কিছু রাখতে পারলুম না। ধর্ম গেল—
কল্পা গেল—মায়া মমতা স্নেহ! তোরাই বা থাকিস
কেন? সব যা—একেবারে যা—আর এ অভাগিনী
রমণীর দুর্বল হৃদয় পীড়ন ক'রতে আসিস নি।

অম্ব। সাবিত্রী! অভাগ্য সত্যবানকে পতিত্ব স্বীকার করবার
সকল জন্মের মত পরিত্যাগ কর।

অলি। আপনারও কি এই মত প্রভু?

নারদ। জেনে শুনে একজন স্বামীঘুর হস্তে কেমন ক'রে
রাজাকে কতাদানের পরামর্শ দিই মা!

অলি। তা হ'লে মদ্রবংশের কুলধর্ম? তা তো আর রক্ষা হয়
না! তিন দিনের ভিতরে সাবিত্রীর কুমারী-কাল উত্তীর্ণ
হবে। ধর্মলোপের কাছে কি সাবিত্রীর বৈধব্যের তুলনা
হ'ল!

নারদ। ধর্মলোপ হ'তে যাবে কেন? এখনও যে সময় আছে,
তাতে সহস্র সহস্র সাবিত্রী-যোগ্য বর এই রাজ সভায়
উপস্থিত করা যায়। সাবিত্রী স্বয়ম্বর হোন। তাদের
মধ্যে যোগ্য পাত্রকে মনোনীত ক'রে স্বামিত্বে বরণ
করুন।

অলি। পৃথিবীর মধ্যে এক সত্যবান্ ভিন্ন সাবিত্রীর যোগ্য বর
আর দ্বিতীয় নাই।

নারদ। বেশ, পৃথিবীতে না থাকে, স্বর্গে ত আছে। ইচ্ছা
কর, স্বর্গ থেকে সহস্র বর চক্ষের নিমেষে এখানে এনে
উপস্থিত করছি। ইন্দ্র, চন্দ্র, বায়ু, বরুণ কারে চাও?

অলি। তাদের একজনও সাবিত্রীর পদরেণু স্পর্শের যোগ্য নয়।

অশ্ব । কি কঠোর গর্ব্ববাক্য !—বল কি কল্যাণী !

অলি । দেবতার ভিতর নিষ্কলঙ্ক-চরিত্র কে আছে ? গুরুপত্নী-
হারী ইন্দ্র চন্দ্রে কি পবিত্রতাময়ী সাবিত্রীর সম্মুখে দাঁড়া-
তেও সাহস করে !

অশ্ব । সাবিত্রী ! তুমি নীরব কেন ? বক্তব্য যা থাকে বল ।
আমার আর চিন্তা করবারও অবকাশ নেই ।

সাবিত্রী । ঠাকুর, সম্পত্তি-বিভাগ-নির্ণায়িকা গুটিকা একবার
মাত্র ভূমিতে নিষ্কিপ্ত হয় ; লোকে কত্নাকে একবার
মাত্র প্রদান করে ; এবং দান ক'রলুম্—একথাও লোকে
একবার মাত্র ব'লে থাকে । অতএব আমি যাকে এক-
বার পতি ব'লে বরণ ক'রেছি, তিনি দীর্ঘায়ুই হউন বা
অল্পায়ুই হউন—গুণবান্‌ই বা নিশ্চ'ণই হউন—তিনি
ভিন্ন অপর ব্যক্তিকে আর আমি বরণ ক'রতে পারি
না ।

অশ্ব । এ সঙ্কটে কি করি প্রভু ?

সাবিত্রী । মন—মহারাজ,—মন । সাবিত্রীর মনের দিকে
লক্ষ্য করুন । লোকে অগ্রে কোন বিষয় মনে নিশ্চিত
ক'রে তবে কথায় তাকে প্রকাশ করে ; অবশেষে কার্য্যে
তাহা অন্তর্গত হয় । কত্নার মন নিশ্চই স্বয়ম্বর-প্রথার
প্রতিষ্ঠা । কত্না কত্ৰ'ক মনোনীত, নিশ্চ'ণ কদাকার
পাত্রকেও কোন রাজা কখন প্রত্যাখ্যান ক'রতে পারেন
না ।

অশ্ব । কি আদেশ দয়াময় ?

নারদ । বড় বিষম সমস্তা ! আদেশ—কি দেবো ?

সাবিত্রী । কেন,—প্রশস্ত অসীম বিস্তৃত ধর্মপথ আপনার চক্ষের উপর প'ড়ে রয়েছে । সে পথের কোথায় কি, আপনি নখদর্পণের ত্রায় দেখতে পাচ্ছেন । আমাকে সেই ধর্মপথে অগ্রগামিনী দেখবার জন্ত যা আদেশ ক'রবেন, আমি তাই ক'রতে প্রস্তুত আছি । আদেশ করুন ।


নারদ । মহারাজ ! তোমার কত্যা সাবিত্রীর বুদ্ধি অবিচলিতা এই সতীত্ব-ধর্ম হ'তে একে বিচলিত করি, আমার এমন সাধ্য নাই । এদিকে সত্যবানে যে গুণ আছে, অন্য কোন পুরুষে তা দেখতে পাওয়া যায় না । অতএব আমি ইচ্ছা করি, তুমি সত্যবানকেই এই কন্যা সম্প্রদান কর । আশীর্বাদ করি, তোমার কন্যা সাবিত্রীর সম্প্রদানে যেন কোন বিষয় না হয় ।

অথ । আপনি গুরু, আপনার আদেশ লঙ্ঘন করা পাপ । এস মা অতাই তোমাকে সত্যবানের হস্তে সমর্পণ ক'রতে যাত্রা করি ।

অলি । মা, আমি ব্রাহ্মণকত্যা—ব্রাহ্মণপত্নী, আশীর্বাদ করি—তোমার কত্যা সাবিত্রী যেন চিরায়ুত্মতী হয় ।

মালবী । কে তুমি মা, মঙ্গলচণ্ডিকার মূর্তিধ'রে আমার গৃহে উদয় হ'য়েছে ?

তৃতীয় অঙ্ক ,



প্রথম দৃশ্য—আশ্রম ।

অলিঙ্করা ও সাবিত্রী ।

সাবিত্রী । স্বথের সংসারে বাস ক'রেও স্বামীর পরিণাম চিন্তায় আমার মনে এক দণ্ডের জন্তুও শান্তি নাই। দেবর্ষি নারদের সেই বজ্রনির্ঘোষ তুল্য কঠোর ভবিষ্যদ্বাণী স্বপ্নে—জাগরণে—প্রতি মুহূর্ত্তেই আমার কর্ণে ধ্বনিত হচ্ছে। “মত্যবান্ আজ হ'তে এক বৎসব পরে, করাল কালকবলে নিপতিত হবে”। এখনও যেন সে গম্ভীর স্বর বর্ণে বর্ণে আমি শুন্তে পাচ্ছি! শুনে আমি স্তম্ভিতা, জ্ঞানশূন্য—এক মুহূর্ত্তের ভিতর সমস্ত পৃথিবী অন্ধকার দেখেছিলুম। হৃদয়ের শোণিত তরঙ্গ যেন এক মুহূর্ত্তে নিশ্চল হয়ে গিয়েছিল। সর্বশরীরে কম্পন—কণ্ঠ অধঃস্রব—কিছুক্ষণের জন্তু যেন আমার অস্তিত্ব পর্য্যন্ত বিলুপ্ত হয়েছিল, শুধু মা সরস্বতী কণ্ঠে অধিষ্ঠিতা হ'য়ে, আমার অজ্ঞাতসারে আমাব মনের কথা বার ক'রে, সে সঙ্কট সময়ে মর্যাদা রক্ষা ক'রেছিলেন। তার পর আজ এক বৎসর অতীত প্রায়। আর চার দিন মাত্র অবশিষ্ট। সম্মুখে সেই ভীষণ কৃষ্ণা চতুর্দশা!—মনে হচ্ছে, আর সর্বাঙ্গ শিউরে উঠছে—চার দিক আবার আঁগ অন্ধকার দেখছি। আমার অদৃষ্টে সে রাত্রি কি নিবিঘ্নে অতি-

তিবাহিত হবে!—না,—মন ব'ল্ছে—‘না’। আমার ধর্ম-
বিশ্বাস ব'ল্ছে—‘না’। দেবর্ষির বাক্য মিথ্যা হবে!
হরিনাম-উচ্চারণে চির-বিগুহ রসনা—সত্যের অধিষ্ঠান-
ভূমি—সে রসনা থেকে মিথ্যাবাক্য নির্গত হবে! কেমন
ক’রে বিশ্বাস করি!—অলিঙ্করে, বিশ্বাস করায় যে
মহাপাপ! কেমন করে বিশ্বাস করি!

কি এ কাল চতুর্দশী রাত্রি কিছুতেই নির্বিলম্বে
তিবাহিত হবে না?

কিছুতেই হবে না।

অলি। এ নিম্নতির গতি কি রোধ হয় না? বিধিলিপির কি
খণ্ডন নেই?

সাবিত্রী। দেবর্ষি ব'লেছেন—গতায়ু ব্যক্তিকে কেউ কখন
ফিরতে দেখেনি।

অলি। তুমিও কি তাই জেনে নিশ্চিত হয়ে থাকবে?

সাবিত্রী। কি ক’র্ব, আদেশ কর।

অলি। আমি আদেশ ক’র্ব কি! আমার হকুমেরই কি চন্দ্র-সূর্য্য
গ্রহ-তারা সকলে চলা ফেরা ক’চ্ছে যে, এই নিম্নতির
ভীষণ আক্রমণ থেকে তোমাকে আত্মরক্ষার উপায় ব'লে
দেব?

সাবিত্রী। উপায়—আত্মরক্ষার উপায়। অকালমৃত্যুর হাত
থেকে স্বামীকে নিস্তার দান!—সম্ভব!—অলিঙ্করে সহ!
এ কি সম্ভব? প্রকৃতির আক্রমণ—আমি অবলা—এ
ভীষণ যুদ্ধে আমি কি তার যোগ্য প্রতিদ্বন্দ্বিনী?

অলি। শুধু দুটো হাত পা নাড়াতেই কি প্রতিদ্বন্দ্বিতার এক-

শেষ হ'ল! মানসিক বল কি বল নয়? মহিষাসুরের
বিক্রমে যখন সমস্ত দেবতারা প্রাণ নিয়ে সুরেক-কন্দরে
গহবরের ভেতর মুখ লুকিয়ে বসেছিল, কে তাদের সে
দারুণ বিপদ থেকে মুক্তি প্রদান ক'রে, আবার আমরা-
বর্তীতে পুনঃ প্রতিষ্ঠিত ক'রেছিল?

সাবিত্রী। এ তুমি কি ব'লছ?

অলি। শুভ-নিশুভ-দলনী অবলাটী তোমার চেয়ে কত বড়?
সে ত তোমারই মতন একটা অর্দ্ধপ্রক্ষুটিত কুসুমকলি।
হিমালয়ের শীতল সমীরণে শুধু একটু রূপের লহর
তোলবার জন্ত, আপনার মনে, বহু কুসুমরাশির সঙ্গে
খেলায় নিযুক্ত ছিল!

সাবিত্রী। তাই ত! ঠিক ব'লছ ত সখি!

অলি। সেই জীবন্ত ফুলটীর সৌরভে আকুল হ'য়ে, দৈত্যরাজ
শুভ তাকে তুলে আনতে সামান্য অনুচর প্রেরণ ক'রে-
ছিল। ভেবেছিল—একটা ছোট মেয়ে—শুধু রূপ বই ত
নয়—তার ওপর অসহায় একাকিনী—সে শুধু দৈত্য-
রাজের অন্তঃপুরস্থ উজ্জানের শোভা-বর্ধনের জন্তই জন্ম
গ্রহণ ক'রেছে। এই না ভেবে, সামান্য দুই একজন
অনুচর দিয়ে মেয়েটাকে আস্তে আদেশ ক'রেছিল।
কিন্তু সাবিত্রী, জাননা কি? কত দানব—কত দৈত্য—
কত ধূম্রলোচন—কত রক্তবীজ—সমূলে ধ্বংস প্রাপ্ত হ'ল,
তবু সে অবলার কিছুমাত্র স্থানচ্যুতি হ'ল না! সে
সর্বনাশী যে হিমালয়-শিখরে, সেই হিমালয় শিখরে!
তার পর কত চণ্ড গেল, মুণ্ড গেল, ইন্দ্রবিজয়ী—ধরণীর

অধীশ্বর—তপোবলে বলীয়ান—দৈত্যপ্রধান শুভ নিশুভ
 দুই ভাই গেল, দৈত্যকুল একেবারে সবংশে নিশ্মূল হ'ল,
 তথাপি ধরণীর কোন শক্তি সে অবলাকে স্থানচ্যুত
 ক'রতে পারলে না !

সাবিত্রী। এ তুমি কি ব'লছ ?—অলিঙ্করে ভগিনি ! এ তুমি
 কি ব'লছ !

অলি। ব'লব কি—মাথা আর মুণ্ডু ! সব বোঝ। বুঝে যে
 অজ্ঞান, তাকে বোঝায় কে ? যুমুস্তকে তুলতে পারি,—
 তুমি যে জেগে যুমুচ্ছে ! দেবর্ষি ব'লেছেন—কেউ
 কখন দেখেনি, তাইতে তুমি একেবারে হাল ছেড়ে দিয়ে
 র'সে আছ। কেউ দেখেনি—কেউ কি দেখবেও না ?
 দেবর্ষি ত এমন কথা বলেননি যে, কেউ দেখবেও না।

সাবিত্রী। কই—তা বলেননি।

অলি। তবে ? দেবর্ষির বাক্যে বিশ্বাস কর—তঁার ভবিষ্যদ-
 বাণীতে বিশ্বাস কর, কেবল শাস্ত্রবাক্য বিশ্বাস ক'রতে
 পারছ না ! তবে আর ব্রত নিয়মাদি কেন—স্বস্ত্যয়ন
 শাস্তি কেন ? শাস্ত্রে ব'লেছে—কর্মযোগে নিয়তির
 আক্রমণ প্রতিহত করা যায়। এই জন্তই ত দৈবের সঙ্গে
 পুরুষকারের প্রতিদ্বন্দ্বিতা !

সাবিত্রী। দৈবের সঙ্গে প্রতিদ্বন্দ্বিতা !

অলি। হাঁ—যমের সঙ্গে লড়াই !

সাবিত্রী। তাও ত বটে ! শাস্ত্রার্থদর্শিনী সতী, আজ তুমি আমার
 চোক ফুটিয়ে দিলে। সত্যই ত ! যা ঘটবে, তা নিশ্চয়ই
 যদি সংঘটিত হয়, তবে তার জন্ত শুধু শুধু চিন্তায় ফল

কি ? অবশ্যজ্ঞাবী পরিণাম শুধু চক্ষু-জলে ত মুছে ফেলা যায় না ।

অলি । চক্ষুজল !—চক্ষুজলে কি হয় ! তাতে শুদ্ধমাত্র কাঁদবার অভিলাষ বৃদ্ধি করে । চক্ষুজলে, মসীবর্ণ অন্ধকারময় পরিণাম, আরও গাঢ়তা প্রাপ্ত হয়—বিধিলিপি উজ্জলতর অক্ষরে মানুষের বিভীষিকা উপাদান করে । জেনে শুনে দেবর্ষির ভবিষ্যৎ বাক্য অগ্রাহ্য ক'রে, পিতার আদেশ পর্যন্ত অমান্য ক'রে, সত্যবান্কে পতিত্বে বরণ ক'রেছ—ইচ্ছাপূর্ব্বক অকালবৈধব্য শিয়রে প্রতিষ্ঠিত ক'রেছ । এখন ভাবলে কি হবে ভাই ?

সাবিত্রী । আর ভাব্বে না । জ্ঞানদাত্রী শিক্ষয়িত্রী সতী !
অধমা ভগিনীকে পদধূলি প্রদান কর ।

অলি । চিরায়ুস্বতী হও ।

সাবিত্রী । একদিকে নির্যাত্তর আদেশ, অতৃদিকে সতীর আশীর্বাদ । দুই মহাশক্তির পরস্পরে জীবন-সংগ্রাম । মন ব'লছে—বুঝি সতীর আশীর্বাদেই জয় হবে ।

অলি । তোমার মন ব'লবেনা ত ব'লবে কার ? তুমি যে ভগিনী—সতীকুলরাণী । তোমার কাছে এ কথা না শুন্লে তৃপ্তি পাব কেন ? সতীত্ব—বিধাতার সর্ব্বশ্রেষ্ঠ রত্নভাণ্ডারের মহামূল্য উজ্জলতম রত্ন । ভাস্কলে আর গড়ে না । দেবত্ব হারালে দেবত্ব ফিরে পাওয়া যায়, ইন্দ্রত্ব গেলে আবার ইন্দ্রত্বেরও সৃষ্টি হয় ; কিন্তু যে অমূল্য নিধি রমণী হৃদয়ের প্রিয়তম সম্পত্তি, সে সতীত্ব একবার গেলে, ব্রহ্মা বিষ্ণু মহেশ্বর-সমেত ব্রহ্মাণ্ড-বিনিময়েও আর

পাওয়া যায় না। এমন মহাশক্তির কাছে অত্ন তুচ্ছ শক্তির তুলনা ! কায়মনোবাক্যে সতী তুমি, তুমি কিনা অদৃষ্টের আক্রমণে চিন্তাকাতরা ! মুছে ফেল—ললাট থেকে বিধিলিপি মুছে ফেল। স্বেচ্ছায় মনোমত অদৃষ্টের সৃষ্টি কর।

সাবিত্রী। যথা আজ্ঞা।

অলি। এই—এই ত তোমার যোগ্য কথা। বৈধব্য—কে দেয় ? আশ্রুক দেখি বিধাতা—স্পর্ধার সঙ্গে তাকে আহ্বান করি। বৈধব্য গ্রহণ—সে ত রমণীর নিজের হাতে। পত্নী যদি নিজের ইচ্ছা না করে, তাহ'লে তাকে পতি-বিরোগিনী করা বিধাতারও সাধ্য নাই।

সাবিত্রী। নিশ্চয় ; তোমার আশীর্বাদ সর্ব্বাঙ্গে বেঁধে কবচ ক'রেছি—প্রস্তুত হয়েছি। মনে মনে কার্য্যের পথে বহুদূর অগ্রসর হয়েছি—ত্রিরাত্র ব্রত গ্রহণ ক'রেছি।

অলি। অগ্রসর হও—তোমার আদেশে মৃত্যু দ্বার থেকে এসে ফিরে যাক। বিশ্বজননীর আয়তি রক্ষা কর'বার জন্ত, সমুদ্রমহুনে আকণ্ঠ হলাহল পান ক'রেও বিশ্বেশ্বর মৃত্যুকে জয় ক'রেছিলেন। সেই অবধি নাম তাঁর মৃত্যুজয়। সখি ! তুমিও সেই অলৌকিক কার্য্য নিষ্পন্ন কর। দেব দানব গন্ধর্ব্ব—সকলে সমস্বরে সতীর জয় গান করুক। সমস্ত জগৎ সাবিত্রীর জয়ধ্বনিতে পূর্ণ হোক। (নেপথ্যে —সাবিত্রী !)। ওই ভাই, তোমার স্বামী আসছেন। তা হ'লে আমি আসি !—তোমায় আমি বোঝাব কি ! তুমি জ্ঞানময়ী—তোমাকে বোঝাতে যাওয়া আমার ধৃষ্টতা।

সাবিত্রী। তুমি আমার গুরু—তুমি আমার আমার প্রণাম গ্রহণ কর ।

[অলিঙ্গনার প্রস্থান ।

(নেপথ্যে—সাবিত্রী)

(সত্যবানের প্রবেশ ।)

সত্য । এই যে—এই যে । সাবিত্রী সাবিত্রী ক’রে আমি এত ডাকছি, আর তুমি নীরবে এখানে দাঁড়িয়ে আছ !

সাবিত্রী । কোনও বিশেষ প্রয়োজন আছে কি ?

সত্য । প্রয়োজন—তোমাকে প্রয়োজন ! কি প্রয়োজন, তা কি জান না । অন্ধরাজা একমুহূর্ত্ত তোমার কথা না শুনলে কত কাতর হন তা কি জাননা প্রাণেশ্বরী ? তার ওপর তুমি ব্রতচারিণী—উপবাসিনী ।

সাবিত্রী । আমি ত তাঁর অনুমতি নিয়ে এসেছি ।

সত্য । তোমাকে অদেয় তাঁর কি আছে ! অনুমতি চেয়েছ—অনুমতি পেয়েছ ; কিন্তু কত কষ্টে প্রাণ ধ’রে যে তোমাকে অনুমতি দিয়েছেন, তা কি বুঝতে পার ? তোমায় পাঠিয়ে তিনি পূজায় নিযুক্ত হয়েছিলেন, কিন্তু তুমি কাছে না থাকতে পূজায় মনোনিবেশ ক’রতে পারছেন না ।

(শৈব্যার প্রবেশ ।)

শৈব্যা । এই যে, এই যে । ওমা ! কিক’রে এসেছ মা ! একদণ্ড কাছে না থাকলে যার যুগ ব’লে জ্ঞান হয়, তাকে কিনা তুমি এতক্ষণ একাকী রেখে এসেছ ! দেখবে এস বুদ্ধরাজার ব্যাপার খানা দেখবে এস । ইষ্টদেবতার নাম

জপ কর্তে তিনি কেবল সাবিত্রী সাবিত্রী নাম মুখে উচ্চারণ করছেন। ছ-গুণদিয়ে তাঁর দশ ধারা পড়ছে। কি করলে মা! বৃদ্ধ রাজর্ষি—সর্বভাগী সন্ন্যাসী—সংসারের সমস্ত সামগ্রীতে লোভ ত্যাগ করে গাছের তলায় আশ্রম নিয়েছিলেন, তুমি কিনা শেষকালটা তাঁকে ইষ্টমন্ত্র ভুলিয়ে দিলে!

সাবিত্রী। তাই ত—তাই ত—তা হ'লে কি হবে মা!

শৈব্যা। কি আর হবে! সোণার পুতুল সোণার সিংহাসন ছেড়ে বনে পড়েছ, হৃৎক-ফেন-নিভ শব্দা ত্যাগ করে আশ্রমের কঠোর মৃত্তিকায় গড়াগড়ি খাচ্ছে। এ ননীর দেহে কি কষ্ট হচ্ছে, তিনি ত বুঝতে পাচ্ছেন। তাই দিবারাত্র তোমার কথাই চিন্তা করেন। চিন্তা করতে করতে ভয় হ'য়ে গিয়ে, ইষ্টদেবতার নাম স্মরণ করতে তোমার নাম স্মরণ করে বসেছেন!

সাবিত্রী। আমার যে বড় ভয় করছে! পিতা যে আমার জ্ঞানবৃদ্ধ ঋষি, তিনি এমনটা করলেন কেন?

শৈব্যা। ভয় কিসের মা! স্বামী আমার অর্চনার সময়েও যদি তোমাকে স্মরণ করেন, সে ত তোমাকে আশীর্বাদ। মাঝার পুতুল—তুমি তার মাঝার ঘরটা দখল করছে। তোমাকে পেয়ে রাজা আবার সংসারী—বনে বসেও ভবিষ্যতের একটা সোণার সংসারের ছবি তাঁর মনের ভেতর জেগে উঠেছে। তুমি যে দয়া করে শালরাজের কুলরক্ষার জন্ত এসেছো মা! পিতৃপুরুষের জলগঞ্জুষের আশা তোমা হ'তে। তার ওপর তুমি ত্রিরাত্র-ব্রত গ্রহণ

ক'রেছ।. তোমার বিষয় দিবারাত্র তিনি ভাববেন না
ত, কার ভাবনা ভাববেন !

সত্য। নাও—চল—পিতাকে সাঙ্গনা ক'রবে চল।

[প্রস্থান।

দ্বিতীয় দৃশ্য—পম্পা সরোবর।

মাণ্ডব্য ও সনাতন।

মাণ্ডব্য। সনাতন জ্ঞান কি ? কত অসংখ্য তীর্থের প্রলোভন
পরিত্যাগ করে, এই মালাবানের তলদেশে যে এতকাল
পড়ে আছি, তার কারণ জ্ঞান কি ?

সনা। কিছুইত জ্ঞানিনা প্রভু ! আমি মনে করি, বুদ্ধি, মালা-
বানের ভুবনমোহন সৌন্দর্য্য আকৃষ্ট হ'য়ে আপনি এই
স্থান যোগাসনের উপযোগী স্থানে অবস্থান করেন।

মাণ্ডব্য। সৌন্দর্য্যই বটে, তবে এ পবিত্র ভারততীর্থে বহিঃ-
সৌন্দর্য্যে মালাবান অপেক্ষা যে রমণীয়তর স্থান নাই,
একথা বলতে পারি না ! তবে অন্তঃসৌন্দর্য্যে মালাবান
আমার মনচ্চক্ষে যে মহতী শোভা ধারণ ক'রে আছে,
সনাতন ! মন্দাকিনীনিষেবিত নন্দনেও বুদ্ধি সে শোভার
অভাব। এস্থানের একটি ক্ষুদ্র করবী গন্ধাতিশয্যে দেব-
কুম্ভম পারিজাতকেও পরাস্ত করে। কেন জ্ঞান সনাতন ?

মাণ্ডব্য। শোন তবে, মন দিয়া শোন। সহস্র পুণ্যতীর্থ ভ্রমণ,
গোকোটী দানের পুণ্য সঞ্চিত হবে। সনাতন ! অবহিত

চিন্তে শ্রবণ কর। স্বরণেই আমার প্রাণ বিগলিত হ'য়ে
আ'সছে!—আমি দিব্যচক্ষে দেখ্তি পাচ্ছি! সম্মুখে হংস-
কারণ্ডব-সেবিতা কমলোৎপলশালিনী শুভজলা পম্পা।
ঠিক ওইখানে—সনাতন! ঠিক ওই পম্পাহৃদয়ের তরঙ্গ
সিংহাসনে—যুগযুগান্ত চ'লে গেছে; স্বামী বিয়োগবিধুরা
সতীর নয়ন কমল থেকে এক ফোঁটা জল পড়েছিল।
সেই জলকণার লোভে দেবতারা চাতকমূর্তিতে ওই
সমীরণে উন্মত্তের মত ছুটাছুটি করেছিল।

সনা। কেমন ক'রে পড়ল, কোথা থেকে পড়ল! পিতা!
পিতা! সে কোন দেবতার চক্ষের জল!

মাণ্ডব্য। এই যে ব'ল্লেম বাপ সতী-দেবতা। আমার এ পম্পা,
আমার এই অরণ্যবেষ্টিত মালাবান, সতী দেবতার লীলা-
ভূমি। মা আমার যখনই আসেন, তখনই এক আধ
ফোঁটা চখের জল, এই দরিদ্র সন্তানের আশ্রমে নিক্ষেপ
ক'রে যান। সেই জলসিক্ত মূর্তিকায় এ স্থানের তরুলতা
সমস্ত সৃষ্ট হ'য়েছে। সনাতন এ হ'তে পবিত্র স্থান কি
আর জগতে আছে! আমি নিম্নে পম্পাতীরে ধ্যানমগ্ন,
সহসা দূর আকাশে যেন ত্রিদিববাহিনী অলকনন্দার
ক্রন্দনকল্লোল আমার কর্ণে প্রবেশ ক'রুলে। হা রাম,
কোথা রাম! মুহূর্ত্ত মধ্যে কাননে মালাবানে পম্পাজলে
সেই অপূর্ব শোকময় নাম অপূর্ব প্রাণোন্মাদকর প্রতি-
ধ্বনি তুলে মনের গতিতে জিহুবনে ব্যাপ্ত হ'য়ে পড়ল।
রাম রাম! কোথা রাম কোথা রাম! চেয়ে দেখি গগন-
মার্গে মায়াময় রথে ছরাস্রা রাবণ কর্তৃক কেশপাশে

নিগৃহীতা। রামহৃদয়-বিহারিণী জনকনন্দিনী বিচেতনা,—
তথাপি পতিশোকে ক্ষুরিতাধরা, রাম রাম ব'লে রোদন
ক'রছেন। সনাতন চক্ষে দেখিছি, কর্ণে শুনেছি, সে
তপস্বিনীর কাতর রোদন আজও পর্য্যন্ত পম্পা-জল-কল্লোল
সম্বন্ধে গান করে। যে একবার সে কাতর রোদন
শুনেছে—সে হৃদয়ের গভীর যাতনায় উত্তিত রাম নাম
একবার শুনেছে, সে কি আর আছে! তার পর এই
সরোবর তীরে, সীতাহারা রাম—দুর্ভর নিরাশায় অবসন্ন
নবজলধর—হা সীতা হা সীতা ক'রে কমল লোচন
বিগলিত সুধায় যে সময় পম্পার কলেবর বৃদ্ধি করেন,
সেদিনও আমি এই স্থানে। তারপর রাবণ সবংশে নিহত
হ'ল, সীতার উদ্ধার হ'ল, কিন্তু শোকোচ্ছ্বাসময় সীতা
রাম নাম আর ধরণী থেকে বিলুপ্ত হ'ল না।

সনা। পিতা জগতে এ স্থানের তুলনা কোথায়?

মাণ্ডব্য। আর একদিন, সনাতন আর একদিন। এই স্থানে,
ঠিক এই স্থানে আমি ধ্যানমগ্ন। এক রমণী গলিতকুষ্ঠ-
গ্রন্থ স্বামীকে স্বন্ধে বহন ক'রে নিয়ে যাচ্ছিলেন। স্বামী
মহাপাপী, এক বেঞ্জার প্রেমে উন্মত্ত হ'য়ে জীকে তার
গৃহে বহন ক'রে নিয়ে যেতে আদেশ করে। পতিপরায়ণা,
স্বামীর আদেশ পালন ক'রতে স্বামীকে স্বন্ধে ল'য়ে সেই
পাপাত্মার অভিলষিত স্থানে গমন ক'রছিলেন। রাজি
অন্ধকার—সুতরাং চ'লতে চ'লতে পথভ্রান্তা রমণী আমার
যোগাসন সমীপে উপস্থিত হ'ন। পাপাত্মার ক্ষত পদ
কোনও প্রকারে আমার অঙ্গ স্পর্শ ক'রে। পাপস্পর্শে

মুহূর্ত্ত মধ্যেই আমার যোগভঙ্গ হয়। ক্রোধে, আমি সেই পাপিষ্ঠকে অভিশাপ প্রদান করি, যেন রজনী প্রভাতে সূর্যোদয়ের সঙ্গে তার মৃত্যু হয়। স্বামীর অপমানে কুপিতা সতীও তৎক্ষণাৎ ব'লে উঠলেন, জ্ঞাপনি ব্রাহ্মণ, তাতে ভগবানের অর্চনার নিযুক্ত স্তবরাং আপনাকে প্রতাভিশাপ প্রদান ক'রলুম না। তবে যদি আমি সতী হই, তা'হলে আমিও বলি যেন রাত্রি আর প্রভাত না হয়।

সনা। তারপর ?

মাণ্ডব্য। তারপর দণ্ডের পর দণ্ড গেল, দিন যায়, সূর্য্য আর উদয়াচল পরিত্যাগ ক'রবার অবকাশ পান না। সৃষ্টিলোপ পায়। সমস্ত দেবতা—ব্রহ্মা, বিষ্ণু, মহেশ্বর সকলে এই স্থানে সমবেত হ'লেন। সবার অনুরোধে আমাকেই পরাভব স্বীকার ক'রতে হ'ল। - সূর্য্য উঠলো। সতীর কুপার নরোধম স্বামী পাপমুক্ত রোগমুক্ত দিবাদেহ ধারণ ক'রে, সতী সঙ্গে স্বর্গে স্থান প্রাপ্ত হ'ল। সনাতন, সতী ধর্ম্মেই আর্ধ্যাবর্ত্তের প্রতিষ্ঠা; আর্ধ্যাবর্ত্তেই সতীর আশ্রয় স্থান; আর্ধ্যাবর্ত্তেই লীলা। এই মালাবানের উপত্যকায়ই আবার সেই লীলাভূমির ছায়—আমার তীর্থ, আমার স্বর্গ, আমার মর্কশ্ব। যতদিন এ দেবরাজ্যে সতীর অধিষ্ঠান, ততদিন সহস্র কোটা রাক্ষসের অত্যাচারেও এ ভারতের কোনও অনিষ্ট হ'তে পা'রবে না।—নাও সনাতন, এই চিরপবিত্রা পম্পার জল গ্রহণ কর। আর এক সতী ত্রিরাত্র ব্রত গ্রহণ ক'রে প্রায়োপবেশনে উপবিষ্টা আছেন। আদি এই মহাব্রতের হোতা—

হোমানগে পূর্ণাহুতি প্রদান ক'রে এসেছি। এই পম্পা-
জল শান্তিরূপে তাঁর মস্তকে প্রদান ক'রলে তবে মা
আমার জল গ্রহণ ক'রবেন।

সনা। যথা আজ্ঞা—

(অলিঙ্কার প্রবেশ ।)

মাণ্ডব্য। অলিঙ্কারে! আর বিলম্ব ক'রছ কেন মা ? তোমার
সখী যে তিন দিন নিরন্তর উপবাসে অর্দ্ধমৃত্যু। যাও মা শীঘ্র
যাও, এই জল গ্রহণ কর। এই সপ্তসতী-গৃহীত জলে
অভিষিক্ত ক'রে শীঘ্র মাকে রক্ষা কর।

তৃতীয় দৃশ্য—আশ্রম ।

হ্যামৎসেন, শৈব্যা ও সাবিত্রী ।

হ্যামৎ। কেমন ক'রে যে প্রাণধ'রে তোমাকে এই ব্রত গ্রহণে
অনুমতি দিয়েছি, তা তোমাকে কি ক'রে বোঝাব মা।
তুমি স্বামীর মঙ্গলার্থে ব্রত গ্রহণ ক'রেছ, “ব্রতভঙ্গ কর”
এমন কথা বলা আমার মত লোকের কোন ক্রমেই ত
যুক্তিযুক্ত নয়, তাই ‘ব্রত সমাপ্তি কর,’ এই কথা আমাকে
ব'লতে হ'য়েছে। কি কঠোর ব্রত! তিনদিন নিরন্তর উপবাস!

শৈব্যা। তিন দিন কই মহারাজ! চতুর্থ দিনেরও তৃতীয় প্রহর
যায় যায় হ'য়েছে! সোণার প্রতিমা কাঠের পুতুল হ'য়ে
গেছে!—মা উঠ; গাত্রোৎখান কর। ভবানীর কৃপায়
তুমি যে জীবনে ব্রত উদ্‌ঘাপন ক'রেছো এই আমাদের
বড় সৌভাগ্য। তোমার মুখের দিকে একবার ক'রে

চেয়েছি, আর ঠক ঠক ক'রে কৈপেছি। আর কেবল মাকে ডেকেছি, যে মা, সতীরানী, সতীর মর্যাদা তুমি রক্ষা কর। সাবিত্রীকে আমার প্রাণে বাঁচিয়ে রে'খ।

হ্যামৎ। ভগবান্ আমাকে অন্ধ ক'রেছেন—জগতের কোনও কিছু দেখার অধিকারে বঞ্চিত। তথাপি মা আমি যেন দিব্যচক্ষে দেখতে পাচ্ছি; তোমার দেহের কি অবস্থা হ'য়েছে। যে দিন সর্ব প্রথম মা লক্ষ্মী, পূর্ণশশীকলা মূর্তিতে আমার গৃহে অবতীর্ণ হ'য়ে, আমাকে প্রণাম ক'রেছিলে, আমি তোমাকে আশীর্বাদ ক'রতে গিয়ে মন্তকে হস্তার্পণ ক'রে, স্পর্শমাত্রেই এক অপূর্বরূপ রাশির আভাস অনুভব ক'রেছিলুম। আর আজ মা আশীর্বাদ ক'রতে গিয়ে সর্বশরীর আমার আতঙ্কে শি'হরে উঠেছে। মনে হ'য়েছে যেন সে পূর্ণিমার পূর্ণগগনের গলিত-সুবর্ণ-ধারারূপিণী-কৌমুদী, দ্বিতীয়ার ক্ষীণচন্দ্র-লেখায় পরিণত হ'য়েছে। কেন মা, এমন কঠোর ব্রতে তোমার অভিরুচি হ'ল ?

সাবিত্রী। পিতা সন্তাপ ক'রবেন না। ব্রত সমাপ্তির একমাত্র কারণ নিশ্চল উৎসাহ। আমিও অবিচলিত উৎসাহ সহকারে ইহা অবলম্বন ক'রেছি। বাবা, আপনাদের আশীর্বাদে আমি উপবাসের যৎসামান্য কষ্টও অনুভব করিনি।

(মাণ্ডব্যের প্রবেশ)

শৈব্যা। আ! বাঁচলুম! ঠাকুর আসছেন। আসুন প্রভু, মাকে আমার শান্তিজলে অভিষিক্ত করুন।

মাণ্ডব্য । আত্রেয়ী ভারতী গঙ্গা যমুনা চ সরস্বতী ।
 সরযূর্গুণকী পুণ্যা স্বেতগঙ্গা চ কোশিকী ।
 ভোগবতী চ পাতালে স্বর্গে মন্দাকিনী তথা ।
 সর্ষাঃ সূমনসো ভূত্বা ভৃঙ্গাটৈঃ নাপয়ন্ত তাঃ ॥
 সিন্ধুভৈরব-শোণাদ্যা য়ে হ্রদা ভূবি সংস্থিতাঃ ।
 সর্ষে সূমনসো ভূত্বা ভৃঙ্গাটৈঃ নাপয়ন্ত তে ॥
 লবণেশু-সুরাসর্পির্দধিহৃদ্ধ-জলাত্মকাঃ ।
 সঠপ্ততে সাগরাঃ সর্ষে ভৃঙ্গাটৈঃ নাপয়ন্ত তে ॥

সমস্ত বসুন্ধরার মধ্যে,—আকাশে পাতালে—দেব-
 লোকে—সপ্তর্ষিমণ্ডলে—ব্রহ্মাণ্ডের যে যে স্থলে শাস্তি-
 দায়িনী শক্তি আছে, সকলে আজ সাবিত্রীর শুভপ্রদানের
 জন্ত শাস্তি জলরূপে অবতীর্ণ হও । সকলে সূমনা হ'য়ে
 সাবিত্রীকে নারীর চিরসৌভাগ্য—অবৈধব্য প্রদান কর ।

(অলিঙ্করা ও সতীগণের প্রবেশ)

সাবিত্রী-মস্তকে জল সেচন ।

(গীত)

এস শুভদায়িনী গঙ্গে ।

উখলি আকাশ তটে, গশ ঘটে সংঘট তরল তরঙ্গে ॥

এস চির শুভকারী বারি—

যমুনা বরুণা উছলিত করুণা

নর্মদা সিন্ধু কাবেরী ;

মানস সরোবর পুষ্ট জলধর—

শুভ বস্ত্র সূধাধার সঙ্গে ।

শুভ গ্রহ তারা শশাঙ্ক ধারা ঝর ঝর শুভ সতী সঙ্গে ।

চতুর্থ অঙ্ক ।

—আশ্রম সম্মুখ ।—

ভাবান্ ।

সত্য । প্রভাতে যে সমস্ত ফল সংগ্রহ ক'রেছিলুম, সাবিত্রী ব্রাহ্মণ ভোজনে সমস্তই নিঃশেষিত ক'রেছে। ব্রাহ্মণভোজনা-বশিষ্ট যা কিছু আছে, তাতে বালিকা আজকের মতন কথঞ্চিৎ প্রাণধারণ ক'রতে পা'র্বে। তার পর কা'ল !—কা'লকে না খেতে পেলে সাবিত্রী কেমন ক'রে বাঁচবে ! প্রাণময়ী সর্বস্ব আমার, স্বামীর জন্ত দেহত্যাগ ক'রতেও কুণ্ঠিতা নয়। উপবাসক্লিষ্টা পতিপরায়ণার যে মুখ দেখে এসেছি, তাতে আমার সর্বাস্ত্র শিউরে উঠেছে ! এমন অপূর্ব রত্ন লাভ ক'রে, বনবাসী ভিখারী হ'য়েও আমি মহেশ্বরের ভাগ্যে ভাগ্যবান্ ! এ রত্ন পেয়ে, অবহেলায় কিনা হারিয়ে ফেল্‌ব ! এ দিকে অগ্নিরন্ধার কাঠের পর্যাপ্ত অভাব। সমস্ত কাঠ হোমানলে দগ্ধ হ'য়ে গেছে যাই—বেলা অবসান প্রায়—আর বিলম্ব করা উচিত নয়

(সাবিত্রীর প্রবেশ ।)

• একি সাবিত্রী, উঠে এলে যে !

সাবিত্রী । বাবা ও মাকে আহাৰ করিয়ে এসেছি ।

সত্য । আর তুমি ?

সাবিত্রী । আমার এখনও কিঞ্চিৎ বিলম্ব আছে ।

সত্য । সে কি সাবিত্রী !

সাবিত্রী । আর যখন তিন দিন কেটে গেল—তখন আর একটু সময়ের জন্ত মনে খুঁত রাখিব কেন ?

সত্য । স্বামীর মঙ্গলের জন্ত কার্য্য ক'রছ, কিন্তু কার্য্যতঃ
কিপরীত ক'রছ সাবিত্রী ! তোমার কিছু অমঙ্গল হ'লে
কি আমি প্রাণধারণ ক'রব, মনে ক'রেছ !

সাবিত্রী । ভয় নেই, আমি ম'রব না ।

সত্য । আর আমাকে স্তোকবাক্যে ভুলিয়ে না । আমি বেশ
বুঝতে পাচ্ছি, আমার মঙ্গলের জন্ত নয়—আমাকে
চিরজীবন যন্ত্রণানলে দগ্ধ করবার জন্ত তুমি আমার ঘরে
উদয় হ'য়েছ !

সাবিত্রী । ভয় নেই আমি ম'রব না । আপনার শ্রীচরণের
শীতল ছায়ায় যে আশ্রয় পেয়েছে, সে কখনও কি ম'রতে
চায় ! বিশেষতঃ এখনও আমার স্বস্তির শান্তুড়ীর সেবার
আকাঙ্ক্ষা মেটেনি । তাঁরা আমাকে অনুমতি দিয়েছেন ।
তা যা হোক, এমন অসময়ে কোথায় যাওয়া হ'চ্ছে ?

সত্য । অগ্নিহোত্র কার্য্যের জন্ত কাঠের অভাব ।

সাবিত্রী । তা হ'লেত নিশ্চয়ই যেতে হবে ।—তা হ'লে আমিও
সঙ্গে যাব ।

সত্য । সে কি !

সাবিত্রী । আজ একলা ছেড়ে দ্বিতে আমার ইচ্ছে হচ্ছে না ।

সত্য । সে কি ! তুমি ইতিপূর্বে কখনও বনে যাওনি । পথ
অতি ক্লেশকর । বিশেষতঃ ব্রতোপবাসে তুমি ক্লেশ হ'য়েছ,
সুতরাং পদব্রজে কেমন ক'রে যাবে ?

সাবিত্রী। 'কেমন ক'রে যাবে'---দেখতেই পাবে এখন---
চল না।

সত্য। এ কি বিপদ! এদিকে যে সন্ধ্যা হয়।

সাবিত্রী। তা হ'লে আর দেরি করা কেন? একেবারে ছুঁগা
ব'লে যাত্রা কর। কুড়ুল আমার কাঁধে দাও।* মুখপানে
চেয়ে দেখুছ কি? আমার উপবাস জন্ত পরিশ্রম কিম্বা
শ্রম কিছই নাই। তার ওপর তোমার সঙ্গে যাবার
আমার একান্ত ইচ্ছা হয়েছে, সুতরাং আমাকে বাধা
দিও না।

সত্য। ভাল, বন-গমনে যদি তোমার একান্তই উৎসাহ হয়ে
থাকে, তা হ'লে আমিও তোমার এই প্রিয়কার্য্য ক'রব।
কিন্তু এই দোষ আমাকে স্পর্শ না ক'রতে পারে, এজন্ত
তুমি জনক-জননীর নিকট অনুমতি গ্রহণ কর।

(দ্যামৎসেন ও শৈব্যার প্রবেশ)

দ্যামৎ। কে কথা কয়?

সাবিত্রী। পিতা, আমি।

দ্যামৎ। আমি!

শৈব্যা। আপনার পুত্রবধু।

দ্যামৎ। আহা মা! এত দুর্কলা হয়েছ যে, তোমার বীণা-
বিনিদিত কণ্ঠস্বর শুনেও আমি অনুভব ক'রতে পারিনি।
এখানে কি ক'রছ মা?

সাবিত্রী। অর্থাপুত্র গুরু ও অগ্নিহোত্রের কার্য্যে কাষ্ঠ সংগ্রহের
জন্ত বন-গমন ক'রছেন।

দ্রামণ । এই অপরাহ্ন সময়ে ?

সত্য । সমস্ত কাষ্ঠ হোমের জন্ত ব্যবহৃত হয়ে গেছে । সমস্ত রাত্রি অগ্নিপ্রজ্জ্বলিত থাকবে, এমন কাষ্ঠও নাই ।

দ্রামণ । তা হ'লে অধিক দূর বনে ঘেন গমন ক'রো না ।
আজকে রাত্রে মতন যা প্রয়োজন, তাই আন । তার পর কাল প্রাতঃকালে গেলেই চ'লবে ।

সাবিত্রী । পিতা, কন্টার একটা প্রার্থনা আছে ।

দ্রামণ । প্রার্থনা—কি প্রার্থনা মা ! এসে অবধি একদিনের জন্তও কখন কিছু প্রার্থনা করনি । কি প্রার্থনা মা !

শৈব্যা । আর প্রার্থনা ক'রলেই বা দেব কি মা ? শুধু আমরা আলীকাদ দিতে পারি ।

দ্রামণ । কি প্রার্থনা মা ?

সাবিত্রী । দেখুন পিতৃগৃহ থেকে আসা অবধি প্রায় এক বৎসর আমি আশ্রম থেকে বহির্গতা হই নাই, স্মৃতরাং কুন্মিত কানন দেখতে আমার বড়ই কৌতূহল হয়েছে । পিতা ! অনুমতি করুন, স্বামীর সঙ্গে যাই । কেননা, অষ্ট ব্রতউদ্ঘাপনের দিন । পতি-বিরহ আমার কোনমতেই উপযুক্ত নয় ।

দ্রামণ । রাণী ! সাবিত্রী পিতৃগৃহ থেকে এখানে এসে কখন যে কিছু চেয়েছেন, তা ত আমার স্মরণ হয় না ।

শৈব্যা । কৈ ? আমারও ত স্মরণ হয় না ।

দ্রামণ । তা' হ'লে কি কর্তব্য ?

শৈব্যা । যে নাছোড়বান্দা মেয়ে—ওকি অনুমতি না নিয়ে ছাড়বে । এখনি কত শাস্ত্রের দোহাই দেবে । অত

শাস্ত্র বুঝিও না ছাই। কাজেই জবাবও দিতে পারি না।

সাবিত্রী। শাস্ত্রে ব'লেছে—

শৈব্যা। আর শাস্ত্রে কাজ নেই মা। যেতে. ইচ্ছা হয়েছে, যাও। শাস্ত্র আবার কি? পতিপরায়ণা সাক্ষী তুমি, তুমি যে বাক্য মুখে উচ্চারণ ক'রবে, তাই শাস্ত্র। মহারাজ বউমাকে অনুমতি দিন।

দ্ব্যমৎ। মা সাবিত্রী! সন্তুষ্ট মনে অনুমতি ক'রছি—তুমি স্বামীর অনুগমন কর। চল মহিষী, আর বিলম্ব ক'রো না। আমাদেরও পম্পাতীরে নিম্নে চল। সন্ধ্যার সময় বেন উত্তীর্ণ না হয়।

দ্বিতীয় দৃশ্য—বন।

কাঠুরিয়াগণ।

১ম। আজকে এবনে সমস্ত গুকনো কাঠ নিশ্খূল ক'রে ফেলা গেছে। কি বলিস্ দাদা?

২য়। আজকে আর যে কেউ এখানে এসে কাঠের কুঁচিট পর্য্যন্ত নিয়ে যাবেন, এমন অবস্থা রাখিনি।

৩য়। না দাদা, অমন কথাটা বলোনা। এবনের গুণ তোমরা কেউ জান না। এ বনে গুকনো কাঠ গজায়।

১ম। বলিস্ কি!

৩য়। আমি স্বচক্ষে দেখিছি দাদা—স্বচক্ষে দেখিছি।—পাহাড়ের তলায় সেই যে একটা অশোক গাছ দেখেছিলি, যেটার

ডাল পাল সব শুকিয়ে গিয়েছিল—কতকালের বুড়ো
গাছ—মাথায় কেবল একটু শিথের মতন ছ'চারটে পাতা ।
একদিন মনে ক'রলুম—শরীরটে সেদিন ভাই ম্যাজমেজে
ছিল—তাইতে মনে ক'রলুম—বেশি দূর আর যাব না,
ওই শুকনো গাছ থেকে খানকতক কাঠ কেটে নিয়ে
আসি । এই না মনে করেই ভাই ! কুড়লটা না কাঁধে
ক'রে টুকটুক ক'রতে ক'রতে গাছের কাছে যাচ্ছি!—
কাছ বরাবর গেছি!—ওই ওখানে গাছ আর আমি
এখানে!—এমন সময় বল্‌বকি রে ভাই ! একটা ফাঁস
করে শব্দ হ'ল !

সকলে । সেকিরে ! সেকিরে !—শব্দ কি !

৩য় । ভয় নেইরে ভাই—বলি শোননা—ভয়ের কথা হ'লে কি
এই বনের ভেতর দাঁড়িয়ে দাঁড়িয়ে বলি ! এ দেবতার
বন এখানে ভয় কি ।

২য় । ভয় নেই—একথা আগে বলতে হয় । তা হ'লে ব্যাপার-
খানা কি ভেঙ্গে বল ।

* সকলে । আমরা আগাগোড়া শুন্‌বো ।

২য় । তার পর আবার একটা ফাঁস ।

সকলে । আবার ফাঁস !

৩য় । প্রথম প্রথম মনটায় একটু ভয় হ'ল । এই চেনা যায়গা—
হুবেলা যাতায়াত ক'রছি, এখানে ফাঁস করে কি !—এই
না ভেবে রে ভাই ! একটু থম্‌কে দাঁড়িয়েছি, এমন সময়
চারিদিক থেকেই ঐ শব্দ—যেদিকে চাই, সেই দিকেই
শব্দ ।

সকলে ! ওই ফাঁস ?

৩য়। হাঁ দাদা ! ওই ফাঁস—যত সব শুকনো কাঠে ডাল
গজাতে লাগল। একটা ক'রে ফাঁস ক'রে শব্দ হয়,
আর একটা ক'রে ফাঁকড়া বেরোয়। সে অশোক
গাছটায় হ'ল কি জানিসরে ভাই—একেবারে হাড়ে হাড়ে
ফুল গজিয়ে গেল।—আমি ত অবাক ! তার পর যেরূপে
চাই, সেই দিকেই গজায়।

সকলে। বলিস্ কি !

১ম। হাঁ হাঁ—এ ঘটনাটা ঘটেছিল, শুনেছিলুম।

৩য়। সে আজ একবছরের কথা হ'ল।

সকলে। তুই স্বচক্ষে দেখেছিস্ ?

৩য়। স্বচক্ষে দাদা—স্বচক্ষে।

২য়। তাহ'লে ত বড় আশ্চর্য্যের কথা দাদা !

সকলে। আশ্চর্য্য—আশ্চর্য্য !

৩য়। শুনলুম—একটা বেদের বউ নাকি সেই বনের ভেতরদে
যাচ্ছিল। সে মরতে মরতে বেঁচে গেছে।

সকলে। কেন, কেন ?—

৩য়। তার মাথায় ছিল তাল পাতার চ্যাঙড়া—তাতে ক'রে সে
শুকনো পাতা কুড়ুতে এসেছিল।—দেখতে দেখতে তাতে
পাতা বেরুতে শুরু ক'রলে !

সকলে। তার পর, তার পর ?

৩য়। তার পর—এই এত বড় গুঁড়ি।

সকলে। বউএর মাথায়।

৩য়। দেখতে দেখতে সেই গুঁড়ি বাড়তে লাগিল।—যায় যায়

এমন সময় কে কোথা থেকে এসে বউএর চুলের গোছা না ধ'রে তড়াক ক'রে সেই গাছের ওপর উঠে—হাতে দা ছিল, তাই দিয়ে গাছের মাথাটা কেটে ফেল্লে। নইলে কাঁদি গজালে বউটো ত একেবারে গেছেলো।

১ম। আর ভাদ্র মাসে সেই বউ-গাছের তলা দে গেল কি হ'ত ! সকলে। বেঘরন্ধ ভেদ।

৩য়। তাই বলি এ বনের মন্ম কিছু বোঝা যায় না দাদা, কিছুই বোঝা যায় না—এবনে মানুষ পুত্লে গাছ হয়। এই রে বউ আসছে, তা হ'লে কি একটা কাণ্ড ঘটেছে !

(জনৈক স্ত্রীলোকের প্রবেশ ।)

স্ত্রী। ওগো, তুমি কোথায় গো ?

৩য়। কি হয়েছে—কি হয়েছে বউ !

স্ত্রী। আছ—এখানে আছ গো ?

সকলে। কি হয়েছে—কি হয়েছে বউ ?

স্ত্রী। ওগো ঠাকুরপো! পালিয়ে এসো—পালিয়ে এসো। আবার তাই !

সকলে। আবার গজান ?

স্ত্রী। এবারে যেমন তেমন গজান নয় গো—যেমন তেমন গজান নয়। শুনলুম—ধনা বাগদীর বউ একটা কাঁটাল কাটের পিড়ির ওপর ব'সে ভাত খাচ্ছিল। তার পর দেখতে দেখতে সেই পিড়ি—গুঁড়ি ডাল পালা নিয়ে—একেবারে এক বিরোদ্ গাছ !

৩য়। ওই শোন তাই।

সকলে । আর, বউ ?

জী । সে এটোড় হ'য়ে বুলছে গো—এটোড় হয়ে বুলছে । আহা কচি বউ—সে আর কত বাড়বে—হতুম আমরা, ত একে-বারে খাজা কাঁটাল হ'য়ে যেতুম । এমন অদৃষ্ট কি ক'রেছি যে, কাঁটাল-কাটের পিড়িতে ব'সে ভাত খাব । চেটাইএর ওপর ব'সে কোন্ দিন কি ছাই তালের আঁটি হ'য়ে যাব । শেষকালে বরাতে কি এই আছে । নাও—কাঠ কাটা রেখে অল্প দেশে যাই চল—এ ভূতের দেশে থাকে না ।

সকলে । ও দাদা, ঘাড়ের কাঠ যে খড়্ খড়্ করছে !

জী । চারিদিক থেকে যে আবার ফ্যাস্ফ্যাসের শব্দ হয় ! ওই বুঝি গজালো—ওই বুঝি গজালো !

সকলে । ওই বুঝি গজালো দাদা—হাতে পাতা ঠেকছে ।

জী । ওরে মিন্‌সে পালিয়ে আয়—ওরে পালিয়ে আয়—শেষ-কালে কি গজিয়ে উঠে ফল হয়ে বুলবি । কোন্‌দিন অন্তমনস্কে পেটে পুরে ফেলব ! পালিয়ে আয়—পালিয়ে আয় ।

[প্রস্থান ।

(সাবিত্রী ও সত্যবানের প্রবেশ ।)

সত্য । কি হ'ল সাবিত্রী ! সমস্ত বন অনুসন্ধান ক'রলুম, তবু ত কোথাও শুকনো কাঠ দেখতে পেলুম না ।

সাবিত্রী । তাই ত—বড়ই ত বিন্ময়ের কথা !

সত্য । এতটা পরিশ্রম ক'রে কি শুধু হাতে ফিরতে হবে !

সাবিত্রী । তাও কি হয়,—দেবগুরুর কার্য—শুধু হাতে ফেরা
কি চলে !

সত্য । তা হ'লে ত দূরবনে প্রবেশ ক'রতে হবে ?

সাবিত্রী । তা ভিন্ন ত আর উপায় দেখতে পাই না ।

সত্য । কিন্তু সাবিত্রী ! এদিকে যে অন্ধকার হয়ে এলো ।

সাবিত্রী । বনে প্রবেশ ক'রতে কি ভয় ক'রছ ?

সত্য । রাজ্যহার! হয়ে আছি ব'লে কি, সাবিত্রী ! ক্ষত্রিয়ের
জীবন পর্যাস্ত হারিয়ে ব'সে আছি !—ভয় নয় । তবে
তুমি সঙ্গে আছ—তার ওপর কৃপা চতুর্দশীর রাত্রি—
সম্মুখে ঘোর অন্ধকার ।

সাবিত্রী । তুমি যে আগার সঙ্গে আছ—এটা কি ভুলে গেছ ?
আমি যে পূর্ণিমার চাঁদ ললাটে বেঁধে চ'লেছি, তা কি
তুমি জান না ?

সত্য । বেশ, তবে এস—ছুর্তী স্মরণ ক'রে এই সম্মুখস্থ গভীর
বনাভ্যন্তরে প্রবেশ করি ।

তৃতীয় দৃশ্য—বন

সত্যবান্ ও সাবিত্রী ।

সত্য । কি গভীর অন্ধকার ! আর ত কিছু দেখা যায় না
সাবিত্রী !

সাবিত্রী । কেন, আমি ত এখনও বেশ

তুমি দেখতে পাচ্ছ না ?

সত্য । কই না—কিছু না !—কেমন যেন একটা

কি হ'ল প্রাণেশ্বরী ! সহসা দৃষ্টিশক্তি অবরুদ্ধ হ'ল
কেন ?

সাবিত্রী ! এক দৃষ্টে অবিশ্রাম কাঠের সন্ধানে প্রতি বৃক্ষ পানে
চেয়ে আস্ছি, তাই বোধ হয়, চোখে বাধা ঠেকছে ।
চোখটা মুছিয়ে দি । এইবারে দেখ দেখি ।

সত্য । হাঁ, আবার দেখতে পাচ্ছি—বেশ দেখতে পাচ্ছি ।—
ওই যে সম্মুখের গাছে একটা নীরস শাখা দেখা যাচ্ছে ।

সাবিত্রী । বোধ হচ্ছে ।

সত্য । বোধ হচ্ছে কেন—ঠিক দেখতে পাচ্ছি । তোমার
পবিত্র করকমল-স্পর্শে আমার চক্ষু এক নূতন জ্যোতিতে
উদ্ভাসিত হচ্ছে । তুমি ক্ষণেকের জন্ত অপেক্ষা কর,
আমি কাষ্ঠ সংগ্রহ ক'রে আনি ।

সাবিত্রী । কি ব'লব ?—না ছাড়লে নয়, তাই তোমাকে ছেড়ে
দিচ্ছি । নইলে কিছুতেই তোমার সঙ্গ ছাড়তে আমার
মন সরছে না । অনেক বিলম্ব হয়ে গেছে । বাবা ও মা
হয় ত এতক্ষণ আমাদের জন্ত উৎকণ্ঠিত হয়ে পড়েছেন ।

সত্য । যখন দেখতে পেয়েছি, তখন আর ভাবনা কি । যাব'
আর ভালটা কেটে নিয়ে আসবো ।

সাবিত্রী । দেখ স্থান ভাল নয়, সময় ভাল নয়—রাক্ষসী বেলা ।
একটু সাবধানে পথ চ'লো । আর গাছেই যদি উঠতে
হয়, অতি সাবধানে উঠো । (স্বগত) স্বামীর মুখের ভাব
পরিবর্তিত হয়ে আস্ছে ! যেন ধন অন্ধকারের পূর্বাভাস
সন্ধ্যার ধূসর ছায়া—

সত্য । ভাল সাবিত্রী ! একটা কথা তোমায় জিজ্ঞাসা করি—

বহুক্ষণ ধূঁরে ব'ল্বে ব'ল্বে মনে ক'রছি, কিন্তু কেমন বাধ
বাধ ঠেকছে ব'লে ব'লতে পারছি না।

সাবিত্রী। কি ব'ল্বে, ব'লেই ফেল না। আমাকে ব'ল্বে, তার
আবার লজ্জা কি!

সত্য। সমস্ত পথটা তুমি কেবল আমার মুখের দিকে চেয়ে
এসেছ।

সাবিত্রী। এই কথা!

সত্য। কথাটা বড় এই নয়। বাড়ীতে তুমি ব'ল্লে যে, আমার
কানন-শোভা দেখবার বড় ইচ্ছে হয়েছে। পথে আসতে
আসতে, তোমাকে কত অপূর্ণ প্রাকৃতিক শোভা দেখা-
লুম—পূণ্যজননী নদী দেখালুম, পুষ্পিত তরুলতা দেখালুম,
অমন শৈলোত্তম মালাবানের সর্বশোভাধার উপত্যকা
দেখালুম। সেই অশোক—মাণ্ডব্য-আশ্রম-প্রবেশ-মুখে
যার তলদেশে তুমি পথশ্রম-কাতরা হয়ে বিশ্রাম গ্রহণ
ক'রেছিলে—অপূর্ণ ফুলভারে যে তোমার পবিত্র সমাগম
আজও পর্য্যন্ত সকলকে জ্ঞাত ক'রছে—তাও দেখালুম,
কিন্তু ছুই একটা প্রশ্ন ক'রেই, তোমার উত্তরের ভাবে
বুঝলুম, তুমি কিছুই দেখনি। সমস্ত পথ কেবল আমার
মুখের পানে চেয়ে চ'লেছ। কেন বল দেখি সাবিত্রী?

সাবিত্রী। কেন?—কি ব'ল্বে?—একদিন বৈশাখের এক নব
জলধর একটা চাতকীকে এই রকম একটা কথা জিজ্ঞাসা
ক'রেছিল। ব'লেছিল—“পৃথিবীতে অনেক নদ নদী, হ্রদ
সরোবর, এমন কি স্বচ্ছজলা গিরিপ্ৰস্রবিণী থাকতে—হাঁ
চাতকী! তুমি আমার মুখ পানে চেয়ে থাক কেন?”

চাতকী কি উত্তর দিয়াছিল জানি না। কি ব'লেছিল
—তুমি জান কি প্রাণেশ্বর ? তুমি ত সর্বশাস্ত্র-বিশারদ—
আমি শিষ্য—আমায় ব'লে দাও না। কেন—কেন ?
কি ব'লব প্রভু ! হতে পারে সমস্তই সুন্দর ; কিন্তু—

অপাং হি তৃপ্তায় ন বারিধারা ।

স্বাচ্ছন্দ্যঃ স্নগন্ধিঃ স্বদতে তুষারা ॥

তোমার রূপ দেখে যে তৃপ্তি লাভ ক'রেছে সে কি আর
অন্য সৌন্দর্য্যে আকৃষ্ট হয় ।

সত্য । মিষ্ট কথায় ভুলিয়ে দিলে সাবিত্রী ! ভাল, আগে কাঠ
কেটে নিয়ে আসি ।—তুমি এই স্থানেই অপেক্ষা কর ।

[সত্যবানের প্রস্থান ।

সাবিত্রী । দুর্গা দুর্গা ! বুক কাঁপছে,—প্রাণ কেমন কচ্ছে ! সেই
কাল সময় উপস্থিত । চক্ষে দেখলুম—কে যেন কোথা
থেকে ঘন ঘোর অন্ধকারের জাল ধীরে ধীরে আমার
স্বামীর জীবনের চারিদিকে বেষ্টিত কচ্ছে । কি হবে !
ও মা ! মঙ্গলচণ্ডী কি হবে মা ! দুর্গে শিবে জগজ্জননি
ভবানি ! তোমার নামস্মরণে শুনেছি সকল ভয় দূর হয়
মা ! শুনেছি—স্বামীর মর্যাদা-নাশ দেখে, অনিমন্ত্রিতা
হয়েও তুমি একদিন পাগলিনীর মত পিতৃগৃহে ছুটে
গিছিলে ! সেখানে পিতৃমুখে প্রতিনিন্দা শুনে অসহ
যন্ত্রণায় মুহূর্ত্ত মধ্যে জীবন বিসর্জন দিয়েছিলে । মরণেও
সে জ্বালার নিবৃত্তি হয়নি । কেই দেহাবসানে উত্তপ্ত
প্রাণের শান্তির সন্ধানে, তুষারে প্রাণ আবৃত ক'রতে
হিমালয়ের ঘরে গিয়ে আত্মরক্ষা ক'রেছিলে । এমন

পবিত্রতাময় সৰ্ব্বতীর্থময় সৰ্বদেবতাময় পতি আমার বিপন্ন।
 ঈশানি ! এ দাসীর মনের অবস্থা তুমি না বুঝলে কে
 বুঝবে মা ? এ সঙ্কট-সময়ে তুমি ভিন্ন দাসীকে রক্ষা
 ক'রতে আর কে আছে ! করাল কাল আমার চখের
 সাম্নে আমার স্বামীকে গ্রাস ক'রতে ছুটে আসছে,
 শক্তিস্বরূপিণী ! এ দারুণ সঙ্কটে আমি তোমার শরণাপন্ন
 হ'লেম। দাসীকে রক্ষা কর—মা, দাসীর মর্যাদা রক্ষা কর।

(সত্যবানের প্রবেশ ।)

সত্য । সাবিত্রী,—সাবিত্রী !

সাবিত্রী । কি প্রভু ?

সত্য । কোথায় তুমি ?

সাবিত্রী । এই যে প্রভু !

সত্য । আমি বাই—দারুণ শিরঃপীড়া ! ধর—আমায় ধর—
 প্রেমময়ী ! শেষ মুহূর্তের জন্ত আমাকে একবার দেখাদাও,
 আশ্রয় দাও। দেখতে পাচ্ছি না—সাধ মেটেনি। সোণার
 সংসার—বাবা—মা—তুমি। (ভূমিতে পতন। সাবিত্রী
 কর্তৃক সত্যবানের মস্তক অঙ্কে রক্ষণ) কারে রেখে গেলুম !

সাবিত্রী—সাবিত্রী—উঃ !—

সাবিত্রী । আৰ্য্যপুত্র, হৃদয়-সর্বস্ব, প্রাণেশ্বর !—সব শেষ !
 দেবধীর বাক্য—সেই দিন, সেই বেলা, সেইক্ষণ, সেই
 মুহূর্ত ! সব'শেষ। কি হ'ল ! কি হ'ল ! কি ক'রলুম !
 রাখতে পারলুম না—কিছুতেই তোমাকে রাখতে পার-
 লুম না। চ'লে গেলে, দাসীকে বনে একা ফেলে চলে
 গেলে ! আৰ্য্যপুত্র—জীবিতেশ্বর ! কথা কও ওঠ। রাজা

ও রাণী তোমার আগমন-প্রতীক্ষায় পথ পানে চেয়ে ব'সে
আছেন। তাঁরা যে তোমাকে এক দণ্ড চক্ষের অন্তরাল
ক'রতে কাতর হন! মা যে তোমাকে সন্ধ্যা না হ'তেই
ঘরে বদ্ধ ক'রে রাখেন। জেনে শুনে সম্মুখে রাজি
দেখেও, তুমি এখানে শয়ন ক'রলে কেন? এই দেখ,
তামসী নিশা উপস্থিত। নিশাচরগণ নিষ্ঠুর নিনাদ আরম্ভ
ক'রেছে, বহুজন্তু ইতস্ততঃ সঞ্চরণ ক'রছে। চতুর্দিকে
শিবাগণের ভয়ঙ্কর চীৎকার শুনে আমার বুক কাঁপছে।
ওগো! ওঠ—ওঠ—জাগো—আমার ভয় দূর কর! আমায়
একবার সাবিত্রী ব'লে ডাক! আমাকে নির্জনে পেলে,
কত মধুর বাক্যে—কত সোহাগ আদরে—আমার প্রাণে
কত যে নূতন নূতন সাধ জাগিয়ে তুলতে! আমাকে কত
কি চাইতে যে অনুরোধ ক'রতে! আমি না চাইলে যে,
বিমর্ষ-মুখে ফিরে যেতে! তাই কি আমার পূর্বাচরণের
প্রতিশোধ নিচ্ছ? প্রাণেশ্বর! ক্ষমা কর। চরণাশ্রিতা
দাসী কাতর প্রাণে তোমায় অনুরোধ ক'রছে, আজ
একটী বার আমাকে সাবিত্রী ব'লে ডাক।

(গীত)

অন্ধের নয়ন তুমি এ কথা কি নাই মনে।

তাই কি হে যোগীবর আছ চলে যোগাসনে ॥

ভুলেছ কি একেবারে তোমারে ক্ষণ না হেরে,

আকুলা জননী তব আঁধার হৃদয়ে নয়নে।

এস নাথ এস ফিরে, ভুলনা হে অধিনীরে,

গলহার দাগিনীরে কড়ু কি ছাড়েহে যনে ॥

ওগো ! আমার শোন্বার সাধ যে কিছুই মেটেনি ।
 প্রাণেশ্বর ! প্রাণেশ্বর ! অপূর্ণ সাধে আমাকে অনাধিনী
 ক'রে যেয়ো না । তবু শুন্ছো না—তবু ফি'রছো না !
 হে জনার্দন ! স্বামীকে আমার ফিরিয়ে দাও । আজীবন
 তপস্তায় তোমাতে আত্মসমর্পণ ক'রে এতকাল স্বামী
 আমার, তোমারই সেবা ক'রে এসেছেন । তাঁকে এ
 অকাল-মৃত্যু দিও না । রক্ষা কর—ফিরিয়ে দাও । হে
 জনার্দন ! হে শঙ্কর ! হে ধর্ম্ম ! এ সঙ্কটে আমি তোমা-
 দের আশ্রয় ভিক্ষা করি, আশ্রয় দাও—অনাধিনীকে
 আশ্রয় দাও ।

(যমের প্রবেশ)

একি ! রক্তবস্ত্র-পরিধায়ী, বক্সমুকুট, সূর্যাসদৃশ তেজস্বী,
 শ্যাম গৌরবর্ণ, লোহিত-লোচন কে ইনি মহাপুরুষ
 পাশ-হস্তে আমার স্বামীকে নিরীক্ষণ ক'রতে ক'রতে
 আগমন ক'রছেন । ভয়ে সর্ব্ব শরীর কাঁপছে । মা
 শক্তিরূপা সনাতনি ! শক্তি দাও—সাহস দাও । (যমের
 প্রতি) বোধ হচ্ছে, আপনি কোন দেবতা । কেন না,
 আপনার শরীর অলৌকিক । হে দেব, যদি ইচ্ছা হয়,
 বলুন—আপনি কে, এবং কি নিমিত্তই বা হেথা আগমন
 ক'রেছেন ।

যম । সাবিত্রী ! তুমি পতিব্রতা ও তপোভূষ্ঠান-সমন্বিতা, এই
 জন্ত তোমার সঙ্গে সম্ভাষণ ক'রছি । আমি যম । তোমার
 স্বামীর আয়ুক্ষয় হয়েছে, তাই তাকে বেঁধে নিয়ে যেতে
 এসেছি ।

সাবিত্রী। ভগবন্! শুনতে পাই—আপনার দূতেরাই মানুষকে
নিতে আসে, তা ঠাকুর! আপনি এসেছেন কেন?

যম। সত্যবান্ ধর্ম্মাশ্রা, রূপবান্ ও গুণসাগর। এরূপ লোককে
নিয়ে যেতে আমি নিজেই আসি। তার ওপর তুমি তাকে
স্পর্শ ক'রে র'য়েছ। এইজন্ত আমি নিজেই এসেছি।

সাবিত্রী। দয়াময়! যদি দাসীকে রূপা ক'রে দেখা দিয়েছেন,
তা হ'লে আপনার রূপা অসম্পূর্ণ রাখবেন না। আপনার
নিকটে আমি স্বামীর জীবন ভিক্ষা করি।

(গীত।)

দয়া ক'রে দেছ দেখা সে দয়া নিয়োনা তুলে।

অধিনী হৃদয়-মণি ভিক্ষা চায় পদমূলে ॥

সকল সংসার ঘুরে, এসে কানন ভিতরে,

পেয়েছি হৃদয় ভরে হৃদয় রতন;

দিওনা হে ডুবাইয়ে সে মণি অতল জলে ॥

যম। তা যে হ'তেপারে না সাবিত্রী! মৃত কখনও ত পুনর্জীবিত
হয় না।

সাবিত্রী। ধর্ম্মের করুণায় কি না হ'তে পারে দয়াময়?

যম। এ নিয়তির ক্রিয়া—করুণার কথা নয় বালিকা! তুমি
সত্যবান্কে পরিত্যাগ কর। আমি তার প্রাণ গ্রহণ করি।

সাবিত্রী। আমার ধর্ম্ম, পুণ্য, জীবন—সমস্ত গ্রহণ করুন।

যম। তোমার ধর্ম্ম তোমারই সহায়—জীবন-পথে তোমারই
সহচর, অপরে তার ফলভাগী হতে পারে না। যাও
সত্যবানের জীবনের মমতা পরিত্যাগ ক'রে ঘরে ফিরে
যাও।

সাবিত্রী । আর আমার ঘর কোথায় ?—আপনি আমার ঘর ভেঙ্গে দিয়েছেন । আবার ব'লছি—প্রভু ! দেবতা ! ধর্ম ! দয়া করুন—আমাকে অকালে পতিহীনা ক'রবেন না ।

ধর্ম । অত্যাগ উপরোধ ক'রো না সাবিত্রী ! স্বামীকে পরিত্যাগ ক'রে ঘরে ফিরে যাও ।

সাবিত্রী । কেমন ক'রে ফিরব ? বৃদ্ধ অন্ধ বনবাসী রাজার যষ্টি নিয়ে বনে এসেছি—আশাপথ চেয়ে অন্ধ ব'সে আছেন । একা সেখানে কেমন ক'রে ফিরবো ! প্রতি পদশব্দে রাজর্ষি আমার স্বামীর আগমন প্রত্ন ক'রছেন, সেখানে একা কেমন ক'রে ফিরবো ! আমার যখন জিজ্ঞাসা ক'রবেন—সাবিত্রী ! কই—কই আমার জীবন কই ? অন্ধের সর্বস্ব ধন—আমার চক্ষুরত্ন—আমার সত্যবান্ কই ?—ধর্মরাজ ! তুমিই আমার শিথিয়ে দাও—আমি কি ব'লব ? কোন্ প্রাণে ব'লব যে, মহারাজ ! তোমার পুত্রকে আমি যমের হাতে সমর্পণ ক'রে এসেছি । ধর্মরাজ ! চরণে ধরি—ভিক্ষা দাও । আমাকে দয়া প্রকাশ ক'রতে যদি আপনি অশক্ত, বৃদ্ধ পরম ধার্মিক রাজার প্রতি কৃপা করুন । এ বৃদ্ধ বয়সে তাঁকে পুত্র-বিয়োগী করবেন না । তাঁর কেউ নেই—কিছু নেই—চক্ষুরত্ন, তাও নেই । দয়া করুন । আবার ভিক্ষা ক'রছি স্বামীর অস্ত্র নিজের জীবন প্রদান ক'রছি—কীতদাসী হ'তে প্রতিশ্রুত হ'ছি । স্বামীকে আমার ফিরিয়ে দাও ।

ধর্ম । সাবিত্রী ! অত্যাগ উপরোধে আমার সময় নষ্ট ক'রো

না। এই দণ্ডেই স্বামীকে পরিত্যাগ কর। আমি সত্যবানের প্রাণ গ্রহণ করি। আমি বিধির আদেশ পালন ক'রতে এসেছি। বিধিলিপির খণ্ডন নেই।

সাবিত্রী। বেশ, তবে, গ্রহণ করুন! (সত্যবানের মস্তক ভূতলে রক্ষা, সাবিত্রী দণ্ডায়মানা, যম কর্তৃক সত্যবানের বক্ষে হস্তক্ষেপ, প্রাণ গ্রহণের অভিনয় ও গমনোদ্‌যোগ এবং সাবিত্রীর পশ্চাদনুসরণ)

যম। তুমি আর আমার সঙ্গে আসছ কেন ? প্রতিনিবৃত্তা হও, সত্যবানের অন্ত্যেষ্টিক্রিয়া সম্পন্ন কর। যতদূর পধ্যস্ত তোমার আসা সম্ভব, তুমি ততদূর এসেছ। যাও—স্বামীর নিকটে তোমার কোনও ধণ নাই।

সাবিত্রী। জীবনে মরণে স্বামীর অনুবর্তিনী হওয়াই জীব কৰ্ত্তব্য।
যেহেতু এই হ'চ্ছে সনাতন ধর্ম।

যম। আমার সঙ্গে যাওয়া ত তোমার সম্ভব নয়।

সাবিত্রী। আমার স্বামী যখন যাচ্ছেন, তখন আমিই বা যেতে পার্‌ব না কেন ?

যম। তোমার স্বামী সূক্ষ্ম দেহে পাশবদ্ধ হয়ে আমার সঙ্গে যাচ্ছেন। ঐ দেহ—তাঁর স্থূল দেহ—পক্ষি-হীন পিঞ্জরের ছায়—ভূমিতে নিক্ষিপ্ত হয়ে প'ড়ে আছে। দেহীর এ পথে গমন অসম্ভব। ফিরে যাও।

সাবিত্রী। আমার স্বামী যেথায় যাচ্ছেন, আপনিও যেখানে যাচ্ছেন, আমারও সেখানে যাবার কৰ্ত্তব্য। যে হেতু এই হচ্ছে সনাতন ধর্ম। তপশ্চা, গুরুভক্তি, পতিস্নেহ ব্রত ও আপনার প্রসাদ দ্বারা আমার গতি অপ্রতিহতা হোক।

অন্ত কোন দেবতা হ'লে আমার গমনে বাধা দিলেও
দিতে পার'তেন, কিন্তু আপনি পারেন না ।

যম । আমি পারি না ! এ তুমি কি বলছ ?

সাবিত্রী । আমি ঠিকই বলছি, শাস্ত্র যা বলে, তাই বলছি ।
আপনি পারেন না । আর সেইজন্যে কার্যতঃ আপনি
কেউও পারেন না । অর্থাৎ আমি যদি ইচ্ছা না করি,
তেজিশ কোটী দেবতা একত্র হয়েও আমার গতিরোধ
ক'রতে পারেন না ।

যম । ক্ষুদ্র বালিকা ! এ তুমি কি বলছ ।

সাবিত্রী । আপনি যেমন আমার প্রিয়তম বস্তুটাকে পাঠে আবদ্ধ
ক'রে নিয়ে যাচ্ছেন, আমিও তদ্রূপ আপনাকে কঠিন
পাশে আবদ্ধ ক'রে রেখেছি ।—কর্মবন্ধন ছিন্ন ক'রবার
জন্ত আমার স্বামী যে সমস্ত ধর্ম্মাচরণ ক'রছেন, আর
তাঁর সহধর্ম্মিণী হ'য়ে আমার আয়তি রক্ষার জন্ত আমিও
যে সমস্ত কার্য্য ক'রেছি তাতে আপনার এ রজ্জু সম্পূর্ণ
ছিন্ন না হোক, বহুস্থানে দুর্ব্বল হ'য়ে গেছে । কিন্তু আমি
যে পাশে আপনাকে আবদ্ধ রেখেছি, ধর্ম্মরাজ, তা আজও
পর্য্যন্ত অটুট । তবে শুনুন ।—তৎস্বার্থদর্শী পণ্ডিতেরা
ব'লে থাকেন,—সপ্তপদ মাত্র ভূমি একত্র সংকরণ ক'রলেই
মিত্রতা হয় । আমিও আপনার সঙ্গে সাত পা চ'লেছি ।
অতএব মিত্রতাকে অগ্রবর্ত্তিনী ক'রে আমি আপনার
সঙ্গে কিছু আশ্রয় ক'র্ব্ব, আপনি স্থির হ'য়ে শুনুন ।

যম । এ কি !—এক কথায় আমার গতি রুদ্ধ !—শক্তিময়ী—
এ তেজস্বিনী কে ?

সাবিত্রী । দেখুন, সাধুরা সৰ্বদেবতার মধ্যে ধৰ্ম্মকেই সৰ্ব্বশ্রেষ্ঠ আসন প্রদান ক'রেছেন । ইন্দ্ৰাদি দেবতারাও ধৰ্ম্মহীন হ'লে, নিজ নিজ আসন হ'তে বিচ্যুত হন । শাস্ত্রের বচন—যেখানে ধৰ্ম্ম, সেখানে জয় । ধৰ্ম্মের সঙ্গে জয়ের নিত্য সম্বন্ধ । বৃত্তাদি অমুরগণও ধৰ্ম্মকে আশ্রয় ক'রে স্বৰ্গ পর্যন্ত জয় ক'রতে সমর্থ হ'য়েছিলেন । যিনি সৰ্ব্বশক্তিমান—সৰ্ব্বনিয়ন্তা—সেই নারায়ণকেও একমাত্র ধৰ্ম্মবলে দৈত্যরাজ বলি, নিজ অটালিকার দ্বারদেশে দ্বাররূপে আবদ্ধ ক'রে রেখেছেন । সুতরাং ধৰ্ম্মই একমাত্র বলবান্ । এদিকে আবার সংসারীর ধৰ্ম্মই শ্রেষ্ঠ ধৰ্ম্ম । অবশ্য—ধৰ্ম্ম না হ'লে চিরব্রহ্মচর্যাও হয় না, সন্ন্যাসও হয় না । কিন্তু অতি জিতেন্দ্রিয় না হ'লে সংসারধৰ্ম্ম করা যায় না । সংসারে এত বাধা—এত প্রলোভন ! এইজন্ত ধার্ম্মিকদিগের মধ্যে জনকরাজ্যের শ্রেষ্ঠ স্থান । ধার্ম্মিক গৃহস্থের আশ্রম—ঋষি-তপস্বিগণের তীর্থ । আমি সেই গৃহস্থাশ্রমের সন্ন্যাসিনী । আপনি দণ্ডায়মান হ'ন ।

ষম । (স্বগত) একি ! এষে আমি ক্রমেই শক্তিহীন হ'য়ে প'ড়ছি ! আমার সৰ্ব্বশরীর যে কল্পিত হ'য়ে উঠছে । কি ক'রে এ বালিকার হাত থেকে নিস্তার পাই ! প্রলোভন দেখান ভিন্ন দে'খছি অণ্ড উপায় নাই । (প্রকাশে) সাবিত্রী ! তোমার যুক্তিযুক্ত বাক্যে আমি পরম পরিতুষ্ট হ'য়েছি । তুমি বর প্রার্থনা কর—আমি সত্যবানের জীবন ভিন্ন তোমাকে আর যে কোনও বর দিতে প্রস্তুত আছি, তুমি বর গ্রহণ কর ।

সাবিত্রী ! আমার স্বপ্নের রাজ্যচ্যুত ও অন্ধ হয়ে আছেন ।
আমার প্রার্থনা এই যে, আপনার প্রসাদে তিনি নয়ন
লাভ করুন ।

যম । তথাস্তু । যাও এইবারে ফিরে যাও । একি—তথাপি
অনুসরণ ক'রছ যে ! বর দান ক'রলুম, আবার
কেন ?

সাবিত্রী । স্বামীর যে গতি, আমারও তাই । আপনি যেখানে
গুঁকে নিয়ে যাবেন আমিও সেইখানে যাব । সম্প্রতি যেতে
যেতে আমার আর একটা কথা শুনুন । পণ্ডিতেরা বলে
থাকেন, যে সাধুদের সঙ্গে একবার মাত্র সঙ্গ হওয়াও
প্রার্থনীয়, তাঁদের সঙ্গে মিত্রতা—তার তুল্যা বাঞ্ছনীয়
বিষয় ত জগতে আর নেই । সংপুরুষের সমাগম কখনও
নিষ্ফল হয় না ।

যম । এ তুমি কি বলছ সাবিত্রী !

সাবিত্রী । আপনি আবার সাধুতার প্রতিমূর্তি—সুতরাং নিষ্পাপ ।
আপনার সংসর্গে বাস করাই সনাতন ধর্ম । সুতরাং
আমি যদি কোন ফল পাই, তা কেবল শাস্ত্রের আদেশে ।

যম । সাবিত্রী ! তোমার ইষ্টসাধনবিষয়িণী বাণী আমাকে আজ
যথেষ্ট জ্ঞান দান ক'রলে । এরূপ তেজোময় বাক্য
আমি আর কখনও শুনিনি । হৃদয়ে অপূর্ব আনন্দ !
মা ! সত্ত্বর এ আনন্দের ফলভোগ কর । সত্যবানের
জীবন ব্যতিরেকে, তুমি দ্বিতীয় বর প্রার্থনা কর ।

সাবিত্রী । আমার স্বপ্নের যেন আবার নিজের রাজ্যলাভ করেন,
আর তিনি যেন স্বধর্ম হ'তে পরিত্রষ্ট না হন ।

যম। তথাস্ত। এইবারে যাও মা, তোমার ত কামনা পূর্ণ ক'রে দিলুম।

সাবিত্রী। তা দিয়েছেন—এবং এই জন্ত আমি আপনার নিকট কৃতজ্ঞা। আপনি আমার প্রণাম গ্রহণ করুন, এবং হৃদয়ের আনন্দে মনে যে সমস্ত ভাবের উদয় হয়েছে, আপনাকে নিবেদন করি, শুনুন—যেহেতু আত্মতৃপ্তি দেবতাকে নিবেদন ক'রতে হয়। আপনি যে কার্যাই করুন না কেন, চিরদিন নিয়মের বশীভূত হ'য়ে করেন,—নিজের ইচ্ছাপূর্বক করেন না। এইজন্তই আপনার নাম যম। সর্বভূতে ভালবাসা, অমুগ্রহ ও দান—ইহাই সাধুদিগের সনাতন ধর্ম। মাহুবে শক্তি অনুসারে কোমল হয়, সংপুরুষেরা শত্রুকেও দয়া করেন।—সুতরাং আপনার দয়া—এ নূতন কথা নয়।

যম। তৃষ্ণার্ত লোকের পক্ষে জল যেমন, আমার পক্ষে তোমার মধুর অথচ জ্ঞানপূর্ণ কথা সেই রকম বোধ হচ্ছে। অতএব যদি ইচ্ছা হয়, তা হ'লে সত্যবানের জীবন ভিন্ন ভূমি পুনরায় বর প্রার্থনা কর।

সাবিত্রী। আমার পিতা—রাজা অশ্বপতি পুত্রহীন আছেন। অতএব কুলোজ্জ্বলকর, তাঁর একশত পুত্র হউক—এই তৃতীয় বর আপনার কাছে প্রার্থনা করি।

যম। তথাস্ত—তোমার পিতার কুলসন্তানকারী তেজস্বী একশত পুত্র হোক। আর নয়—তোমার কামনা পূর্ণ হয়েছে, এই বার ফিরে যাও।

সাবিত্রী। স্বামীর সঙ্গে থাকায় এ আমার দূর ব'লে বোধ হচ্ছে

না। বিশেষতঃ আপনি স্বয়ং ধর্মরাজ। সংপুরুষের প্রতি লোকে যত বিশ্বাস করে, নিজের আত্মার প্রতিও তত করে না। এইজন্য লোকে সংপুরুষের প্রণয় প্রার্থনা করেন,—আপনিও সংপুরুষ। তার ওপর বহুক্ষণ আমি আপনার সঙ্গে আলাপ ক'রেছি, আপনিও ক'রেছেন। সুতরাং শাস্ত্রাদেশে আপনি আমার সঙ্গে সম্বন্ধ-বন্ধনে আবদ্ধ। কাজেই আমার অনিচ্ছায় আপনি আমাকে নিবৃত্তা ক'রতে পারেন না।

যম। না,—দেখছি এ বালিকার হাত থেকে নিস্তার পাওয়া বড়ই কঠিন কথা। একে নিরস্ত ক'রি আমার এমন শক্তি নাই। অবলা—তীর দৃষ্টির আঘাত সহ্য ক'রতে অসমর্থ—সে কিনা যুক্তিতর্কে, জ্ঞানে, মধুর বচন বিভ্রাসে আমাকে সম্পূর্ণরূপে পরাস্ত ক'রলে! এই অবলার কথায় আমাকে পরিচালিত হতে হচ্ছে!—এষে ব্যাপার কিছুই বুঝতে পারছি না! আমার সমস্ত বুদ্ধিবৃত্তি বালিকা যেন নিঃশেষে আকর্ষণ ক'রে নিয়েছে,—আমি জ্ঞানশূন্য! বাহিরে স্থিরা, শাস্তিময়ী, নতমুখী—কিন্তু বাক্যে বিশ্ব-বিমোহিনীর ভুবন-বশীকরণের শক্তি! কে এ তেজস্বিনী? সাবিত্রী! এই শেষ বক্তব্য—তোমার প্রতি স্নেহে আমি আরও এক বর প্রদান ক'রতে প্রস্তুত আছি। সুতরাং সত্যবানের জীবন ভিন্ন তুমি চতুর্থ বর প্রার্থনা কর।

সাবিত্রী। বেশ, এতই যদি ভাগ্যবতী আমি যে, আপনার প্রসাদ পাবার উপযুক্ত জ্ঞানে, আপনি আমাকে স্বেচ্ছায় বর প্রদানে উদ্বৃত্ত হয়েছেন, তবে এই প্রার্থনা করি—যেন

মর্তে এসে আমি নিষ্ফলা নামে জগতে না পরিচিতা হই।
 কেননা, গৃহস্থ-কণ্ঠা নিষ্ফলা—এ হ'তে বুঝি অপবাদ
 আর নাই !

যম । বেশ, এই কথা ! তা হ'লে যদি আমি তোমাকে শত
 পুত্রের বর দান করি, তা হ'লে ত আমাকে নিষ্কৃতি
 দাও ?

সাবিত্রী । তদগুণেই ।

যম । সাবিত্রী, তুমি সূর্য্যসদৃশ, তেজস্বী শত পুত্র লাভ কর ।

সাবিত্রী । আপনি পুনরায় আমার প্রণাম গ্রহণ করুন।
 (প্রণাম) ।

যম । তোমার মঙ্গল হোক ।

পঞ্চম অঙ্ক ।



প্রথম দৃশ্য—বনপথ ।

(মাণ্ডব্য ও সনাতনের প্রবেশ) ।

সনা । বৃথা অবেষণ,—এত বন ঘুরেও যখন সন্ধান পেলুম না,
 তখন আর কি তাদের পাব ?

মাণ্ডব্য । পাব না—সেকি সনাতন ! পাব না কি ? আজই যে
 আমি যুবকদম্পতীর মাথায় শান্তিজল ঢেলেছি—সাবিত্রীকে
 অবৈধব্য আশীর্বাদ প্রদান করেছি, তার ফল কি এই
 হ'ল ! আশীর্বাদে পর মুহূর্ত্তেই কিনা বৃদ্ধ রাজা ও

রাণীর সর্বনাশ হবে! পাব না—কি বলছ সনাতন—
পাব না কি! যদি ধরণী নিজ বক্ষে লুকিয়ে রাখে,
ধরণী-বক্ষ বিদীর্ণ ক'রে তাদের খুঁজে আনব। সাগর
যদি গ্রাস করে, অগস্ত্যের ত্রায় গঙ্ঘুষে সাগর উদরগত
ক'র্ব্ব। যম কর্তৃক যদি অকালে নিষ্পীড়িত হয়,
যম মন্দির চূর্ণ করবো—আর না যাতে লোককে যমভবন
যেতে হয়, তার ব্যবস্থা ক'র্ব্ব। পাব না!—পাব না কি!
সনা। প্রভু! শুধু না ফিরতে হয়, তার উপায় করুন। অন্ধ
রাজা ও বৃদ্ধা রাণী যখন আমাদের প্রত্যাগমন-বার্তা শুনে,
ছুটে এসে জিজ্ঞাসা ক'রবে—সনাতন, আমার পুত্র ও
পুত্রবধু? পিতা! তাদের কেমন ক'রে বলব যে, রিক্তহস্তে
ফিরে এসেছি।

মাণ্ডব্য। সাবিত্রী সত্যবান্কে না নিয়ে ফিরব না, তুমি নিশ্চিত
থাক। প্রয়োজন হয়, যম-ভবনে প্রবেশ ক'র্ব্ব।
একবার নিজের জন্ত প্রবেশ ক'রেছিলুম—নিরপরাধে
শূলদণ্ড বিধান ক'রেছিল বলে, আমিও তাকে দাসীপুত্র
হবার শাপ দিয়েছিলুম। আমি আবার সাবিত্রীর
অবৈধব্যের জন্ত প্রবেশ করব।

সনা। পিতা—পিতা!

মাণ্ডব্য। কি সনাতন?

সনা। আর নয়—আর অল্পসঙ্কানের প্রয়োজন নাই। সব শেষ!

মাণ্ডব্য। সব শেষ?

সনা। সখার প্রাণহীন দেহ ধূলি-বিলুপ্তিত!

মাণ্ডব্য। হঁ!—আর সাবিত্রী?

সনাতন। তাঁকে ত দেখতে পাচ্ছি না প্রভু! বুঝি অভাগিনী

স্বামীবিয়োগে উন্মাদিনী হয়ে কোথায় চ'লে গিয়েছে।

সখা! সখা! কি ক'রলে! কি সর্বনাশ ক'রলে!

মাণ্ডব্য। সনাতন! ঋষিকুমার হয়ে এ তুমি কি অজ্ঞোচিত কার্য ক'রছ? ঋষিগণ শোক ক'রবার জন্ত জন্মগ্রহণ করেনি। এস আমরা সাবিত্রীর অনুসন্ধান করি। সাবিত্রী কই? সতীরানী, নিজের অবৈধব্য প্রতিষ্ঠা ক'রতে, তিন দিনের নিরন্তর উপবাসের ব্রত উদ্‌ঘাপন করেছে। সে সাবিত্রী কই? পিঞ্জর পড়ে আছে, নিশ্চয় সে তেজস্বিনী এ পিঞ্জরের পাখিকে ফিরিয়ে আনতে, ভীষণ ব্যাধের অনুসরণ ক'রেছে। সাবিত্রী—সাবিত্রী—মা আমার! কোথায় তুমি?—কতদূরে? মা, মা, সন্তান আমি—এ অপূর্ব জীবন প্রতিষ্ঠা দেখবার আমার বড় সাধ হয়েছে। দেখাও।—চিরদিন যে মৃত-সঞ্জীবনী সুধার সন্ধান উন্মত্তের মত ত্রিভুবন পরিভ্রমণ করিছি, সেই সুধাভাণ্ড, জগতের সর্বশ্রেষ্ঠ রত্নাধার সতীর হৃদয়—আমাকে একবার দেখাও।

সনা। পিতা! সত্যবানের দেহ সম্বন্ধে কি ক'রব, আদেশ করুন।

মাণ্ডব্য। আমি দেহ রক্ষার ব্যবস্থা ক'রছি। দেহের চতুর্দিকে গাণ্ডী দিচ্ছি। ভূত প্রেত পিশাচ রাক্ষসাদি পিশিতাশী জীব দূর হও, সত্যবানের প্রাণহীন দেহ-সমীপে কেউ এসোনা। সাবধান, এই গাণ্ডীস্পর্শ মাত্রেই সকলে চক্ষুর নিমেষে ভস্মীভূত হবে।

ভূতাঃ প্রেতাঃ পিশাচাশ্চ রাক্ষসাশ্চ সরীসৃশাঃ ।

অপসর্পন্ত তে সর্বকৈ চণ্ডিকাল্লোণ তাড়িতাঃ ॥

দ্বিতীয় দৃশ্য—আশ্রম সম্মুখ ।

শৈব্যা ও ছ্যামৎসেন ।

ছ্যামৎ । কি ক'রলুম শৈব্যা ! কেন অসময়ে পুত্রকে বনে পাঠা-
লুম ! রাজ্য গেছে, চক্ষু গেছে, অন্ধের ষষ্টি পুত্ররত্ন
অবশিষ্ট ছিল, তাও গেল ! ও শৈব্যা ! কি ক'রলুম, কেন
অসময়ে তাকে বনে যেতে আদেশ ক'রলুম । তুচ্ছ কাঠ
—একরাত্রের জন্ত ঋষিদের ঘর থেকে ভিক্ষা ক'রে
আনলুম না কেন ?

শৈব্যা । মহারাজ, উতলা হবেন না । আপনি উতলা হ'লে এ
অভাগিনীর উপায় কি—আমি যে দশদিক অন্ধকার
দেখছি ।

ছ্যামৎ । আর অন্ধকার—আমি চক্ষুহীন, হঠাৎ দেখবার সমস্ত
সুখ অনুভব ক'রেছি ।—ভগবান্ যে এ অন্ধ বৃদ্ধকে
সাবিত্রী সত্যবান্‌রূপ দুটি প্রজ্ঞা-চক্ষু প্রদান ক'রেছিলেন ।
আমি দু-জনের মাথায় হাত দিলেই, সমস্ত ব্রহ্মাণ্ড অপক্লপ
সৌন্দর্য্যে যে আমার দৃষ্টির সম্মুখে উপস্থিত হ'ত ! রাণী,
ইচ্ছা ক'রে সেই তারকাযুগল স্বহস্তে উৎপাটিত ক'রে
বনে নিক্ষেপ ক'রলুম ! না না—ওই আসছে । ওই যে

ক'র পদ শব্দ শুনতে পাচ্ছি না? কেও—কেও—সত্যবান্
এলি!

শৈব্যা। কেও—সাবিত্রী আমার আসছে?

(অলিঙ্করার প্রবেশ ।)

অলি। না, মা—আমি অলিঙ্করা।

শৈব্যা। কি ক'রলুম মা অলিঙ্করা!—আমি যে হাস্তে হাস্তে
আনন্দময়ীকে স্বামীর অনুগমন ক'রতে অনুমতি ক'রেছি।
পম্পা সরোবরের তীর ধ'রে, আমার হর গৌরী যে, সমস্ত
বন আলো ক'রতে ক'রতে, দেখতে দেখতে চক্ষু অন্ধ
ক'রে মিলিয়ে গেছে! এ চক্ষু কি আর মিলবে না
অলিঙ্করা?

হ্যামৎ। যা ঘটেছে, আমি সব দেখতে পাচ্ছি—সব দিব্য চক্ষে
দেখতে পাচ্ছি। মা আমার চারদিন উপবাসিনী—অর্দ্ধ-
মৃত্যু! সতী মনের উৎসাহে স্বামীর সঙ্গিনী হয়েছিলেন;
কিন্তু দুর্বল দেহ, পরিশ্রমের ভার সহ ক'রতে পারেনি।
দেখতে পাচ্ছি--রাণী রাণী, ঠিক দেখতে পাচ্ছি চোখের
সামনে, সে সোণার লতা কঠিন বনপথে ধূল্যবলুপ্তিতা।
মা আমার স্বামীর পায়ে মাথা রেখে স্বর্গে চলে গেছেন।

অলি। স্বামীর পায়ে মাথা রেখেই যদি সাবিত্রীর মৃত্যু হয়, তা
হ'লে মহারাজ, তার তুল্য ভাগ্যবতী আর কে আছে?
এমন দেবতারও বাঞ্ছনীয় তীর্থ মৃত্যু যার তার জন্ম আর
দুঃখ কি? পুত্র আপনার সুস্থ শরীরে ফিরে আসুন—এই
আমাদের একমাত্র কামনা।

দ্যুমৎ । অলিফরা, সত্যাবান্ আমার সাবিত্রী বিহনে বেঁচে আছে
—এটা কি বিশ্বাস কর ?—মাধবী শুকিয়েছে, সঙ্গে সঙ্গে
সহকারও শুকিয়েছে —আমার সাধের বাগান আবার যে
মরুভূমি, সেই মরুভূমিতেই পরিণত হয়েছে ।

অলি । আমার পিতা ও স্বামী তাঁদের অহুসঙ্কানে বনে প্রবেশ
ক'রেছেন । যতক্ষণ পর্য্যন্ত না তাঁরা ফিরে আসেন,
আমার অহুরোধ—অন্ততঃ ততক্ষণ পর্য্যন্ত ধৈর্যধারণ
করুন ।

শৈব্যা । তোমরাই এতকাল অন্ধরাজাকে রক্ষা ক'রে এসেছ ।
তোমরা এখন এ বিপদে তাঁকে রক্ষা না ক'রলে, কে
ক'র্বে মা !

দ্যুমৎ । অন্ধ হয়ে, রাজ্যহারা হয়ে, বালবৎসা জ্ঞী নিয়ে তোমার
পিতার আশ্রমে এসেছিলুম : নিজ তপস্তার আশ্রয়ে
স্থান দিয়ে, তিনি আমাকে সন্ন্যাসী ক'রেছিলেন । তুমি
আবার কোথা থেকে এক সোণার প্রতিমা এনে আমার
পুত্রকে উপহার দিয়ে, আমাকে ভবিষ্যতের এক অপূর্ণ
ছবি দেখিয়ে, এই বৃদ্ধ বয়সে আবার সংসারী ক'রেছ ।
সে অপূর্ণ ছবি যে, দূর থেকেই মিলিয়ে যায় মা !

অলি । ভয় নেই মহারাজ !—আমার মন নিরাতঙ্ক ।

শৈব্যা । দাও মা সতী, লক্ষ্মী,—অভয় দাও মা,—অভয় দাও ।

অলি । সাবিত্রীর ত্রিরাত্র ব্রত—আমার পিতা আবার সে যজ্ঞের
হোতা—সাধুভ্রম ঋষিগণও পিতার সঙ্গে এ যজ্ঞে ব্রতী
হয়েছিলেন । যজ্ঞ নির্বিবাদে সুসম্পন্ন হয়েছে । ঋষিগণ
আপনাদের পুত্রবধূকে অবৈধব্য অশীর্ষাদ দিয়েছেন ।

এমন শুভদিনে কখনও কি অমঙ্গল হ'তে পারে ? যম-বিজয়ী পিতা—তঁার আশীর্বাদ—সে আশীর্বাদ নিশ্চল হবে ? তা আবার কিনা—যে দিনে ব্রত উদ্‌যাপন, সেই দিনে ! আমরা সাত এয়োতে পিতার আজ্ঞায় সাবিত্রীর মাথায় জল চেলেছি। তোমার পুত্রবধূর কেশকলাপ এখনও যে, সে জলে সিক্ত হয়ে আছে মহারাজ ! যম এসে কিনা সেই সিক্ত কেশে হস্তার্পণ ক'রবে !

(ঋষিগণের প্রবেশ ।)

শৈব্যা । মহারাজ, ঠাকুরেরা সব এখানে আসছেন ।

দ্বাগৎ । ঠাকুর, রাজ্যচ্যুত অন্ধ ভৃত্যকে এতকাল শ্রীচরণের আশ্রয়ে রেখে এসেছেন, আজকে এই বৃদ্ধ বয়সে তাকে আশ্রয়চ্যুত করবেন না ।

সকলে । ভয় কি—ভয় কি !

১ম ঋষি । তোমার পুত্র পুত্রবধূর কোন অমঙ্গল হবে না মহারাজ !

সকলে । এ আমরা দিবাচক্ষে দেখতে পাচ্ছি ।

১ম ঋষি । এই আমরা সবাই মিলে অগ্নিতে আহুতি চেলে, তোমার পুত্রবধূকে আশীর্বাদ ক'রে এলুম—

২য় ঋষি । অগ্নি অমনি প্রত্যক্ষবৎ লহ লহ জিহ্বা বা'র ক'রে, সেই সমস্ত স্নাত পান করলে—

৩য় ঋষি । কাষ্ঠখণ্ড সব দেখতে দেখতে অজারবৎ হয়ে গেল—

১ম ঋষি । প্রশান্ত দিগ্‌মণ্ডল মৃগ-পক্ষীর কলরবে পরিপূর্ণ হ'য়ে গেল ।

২য় ঋষি। বৃক্ষলতার পত্র সমস্ত সরসর্ শব্দে দিগন্ত মধুময়
ক'রে তুললে—

৩য় ঋষি। আর লাজগুচ্ছের ছায়—কুন্দ, মালতী, শেফালিকা,
মধুপবনে আন্দোলিত হয়ে, ঝরঝর্ ঝ'রে গেল—

১ম ঋষি। এমন সময়ে আপনার পুত্র—পুত্রবধূর অমঙ্গল হবে !
সকলে। কখনই নয়—কোন প্রকারে নয় ।

২য় ঋষি! বোধ হয়, পতি-পরায়ণা পতি-সঙ্গে ভ্রমণ ক'রতে
ক'রতে কথঞ্চিৎ ক্লান্তা হয়েছেন ।

৩য় ঋষি। অথবা ভ্রমণ ক'রতে ক'রতে বহুদূরগতা হয়ে, পথ
হারিয়েছেন ।

১ম ঋষি। তাই রাত্রে জন্তু, হয় ত উভয়ে বনমধ্যে কোন
স্থানে আশ্রয় গ্রহণ ক'রেছেন ।

সকলে। মহারাজ, ভয় ক'রবেন না ।

১ম ঋষি। অলিঙ্করে, তোমার পিতা কোথায় ?

অলি। তিনি রাজকুমারের অনুসন্ধানে গমন ক'রেছেন ।

সকলে। তবে আর কি !—যমবিজয়ী মাণ্ডব্য যখন অনুসন্ধানে
গেছেন, তখন আপনি নিশ্চিন্ত হ'ন । আমরাও সকলে
অনুসন্ধানে যাচ্ছি ।

সকলে। অবশ্য—অবশ্য ।

২য়। অনুসন্ধান ক'রতে ক'রতে যদি যম ভবনে গমন ক'রতে
হয়, আমরা তাতেও প্রস্তুত আছি ।

৩য়। চল, চল—আর বিলম্বে প্রয়োজন নাই ।

অলি। আনুন মহারাজ,—আমরাও এই সব মহাপুরুষদের
অনুগমন করি ।

দ্রামণ । একি হ'ল—একি হ'ল !—দয়াময়, দয়াময়—এ আমার
কি হ'ল !

সকলে । কি হ'ল—কি হ'ল মহারাজ !

দ্রামণ । সহসা আমার দৃষ্টিশক্তি কে ফিরিয়ে দিলে ? আমি
আবার দেখতে পাচ্ছি—সব দেখতে পাচ্ছি—এই
আপনাদের চরণ দর্শন ক'রছি ।

শৈব্যা । মহারাজ, মহারাজ ! এ আপনি কি বলছেন ।

ঋষিগণ । অপূর্ব দৈবশক্তি !

অলি । সতী—সতী—মহারাজ, সতী আপনার গৃহে অবতীর্ণা—
ত্রিরাত্র-ব্রতে উপবাসিনী সতী আপনার গৃহে শান্তিময়ী-
রূপে অবস্থিতা । মহারাজ—আপনাকে দর্শন ক'রলে
ভয় দূরে পলায়ন ক'রবে । সেখানে কিনা আপনার ভয় !

দ্রামণ । কি সুন্দর ! চরিত্রিক কি সুন্দর ! রাণী ! এই তুমি ।
অলিঙ্করা ! এই তুমি—এই তুমি—আহা তুমি এই
অলিঙ্করা ! দয়াময় ! এই চারিদিকে দেখতে পাচ্ছি ।
এই আপনাদের দেববাহিত মূর্তি । বিংশতি বৎসর পূর্বে
যে মনোমোহিনী প্রতিমার সৌন্দর্য্য দেখে দেখেও আমি
তৃপ্তি পাইনি, এই সেই শৈব্যা রাণীর ছায়া । যে
অলিঙ্করার মিষ্ট বাক্য কর্ণে প্রবেশ ক'রে, আমার হৃদয়ে
এক মধুময় রূপের আভাস দেখাত, এই সেই আরও
সুন্দর—কত সুন্দর এক মুখে বলতে পাচ্ছি না—কত
সুন্দর অলিঙ্করা ।

অলি । আর আপনার পূত্রবধু ! শত অলিঙ্করার একত্র
সমাবেশে সে সর্বনাশীর রূপের একাংশ প্রস্তুত হয় ।

পঞ্চম অঙ্ক ।

মহারাজ ! চক্ষু পেয়েছেন । যৌবনে আপনার পুত্র কত
সুন্দর হয়েছে দর্শন ক'রবেন চলুন । আর তার পাশে
শোভাময়ী ভুবনমোহিনী সাবিত্রী—মহারাজ, হরগৌরী—
হরগৌরী ।

শৈব্যা । ঠাকুর ! স্বামীকে চক্ষু দিয়েছেন এখন তাঁকে চক্ষের
তারি দিম । দেখবেন দয়াময় ! যেন স্বামীর আমার
হর্ষে বিষাদ না হয় ।

সকলে । কখনই নয় । শুভলক্ষণ—দৈবশক্তি !

অলি । সতী—সতী—

সকলে । এস মহারাজ, চক্ষু পেয়েছ, আর কেন ? এস সকলে
সন্ধান করি ।

তৃতীয় দৃশ্য ।

ষম ও তৎপশ্চাৎ কিঞ্চিৎ দূরে সাবিত্রী ।

ষম । সে সর্বনাশীর হাত থেকে যে নিস্তার পাব, এ আমার
বিশ্বাস ছিল না । বাপ্—কি বিপদেই পড়েছিলুম !—
আর একটু পীড়ন ক'রলেই সত্যবানের প্রাণ হস্তচ্যুত
হ'য়েছিল আর কি ! বালিকাকে আমার অদেয় কিছুই
ছিল না । কিন্তু কি ক'রব, নিয়মের বশীভূত হয়ে অমন
সাধ্বীকেও আমাকে পতি হ'তে বিচ্ছিন্না ক'রতে
হ'য়েছে । সন্তান-প্রলোভনে মুগ্ধা হ'য়ে সর্বনাশী মুহূর্তের
জগ্ন জননীরূপিণী স্বামীকে বিস্মৃতা হ'য়েছিল ; আমিও
সেই অবকাশে পালিয়ে এসেছি ।

সাবিত্রী । প্রভু, এস্থানের নাম কি ?

যম । য়্যা !

সাবিত্রী । এস্থানের রমণীয়তা আমাকে বড়ই মুগ্ধ ক'রেছে ।

আমি যেন এক অপূৰ্ণ আনন্দের আভাস পাচ্ছি, যেন কোন অদৃষ্টপূৰ্ণ মধুময় প্রদেশের সল্লিকটবর্তিনী হ'য়েছি । পবনে মধু, ঋতু মধুময়, ওষধী সকল মধুপূর্ণ । বৃক্ষে বৃক্ষে মধুসঞ্চার ! এমন কি, পথের ধূলায় মধু মাথা । এ কোথায় এসে উপস্থিত হলুম দয়াময় ?

যম । তুমি এখানে পর্য্যন্ত আমার অনুসরণ ক'রেছ ! এস্থান যে মনুষ্যের অগম্য ।

সাবিত্রী । ধর্ম্ম যার সহায় ও জীবন-পথের সঙ্গী, ত্রিভুবনে তার অগম্য স্থান কোথায় প্রভু ।

যম । তুমি যে আমাকে নিষ্কৃতি দিয়েছ সাবিত্রী !

সাবিত্রী । আমি ত দিয়েছি, কিন্তু আপনি নিজেই যে নিষ্কৃতি গ্রহণ ক'রছেন না প্রভু ! হে দেব ! আপনি প্রজ্ঞাচক্ষু—আপনিই বলুন, আমার গতি কোথায় !

যম । নৃপনন্দিনি ! আর অগ্রসর হয়োনা—নিবৃত্তা হও । মুহূর্ত্তে তোমার চক্ষে এক মহা অন্ধকারের আবরণ পড়বে । আর আমাকেও দেখতে পাবেনা, আপনাকেও দেখতে পাবে না । অগ্রপশ্চাৎ গতিরুদ্ধ হয়ে বিষম মন্ডটে পতিতা হবে । ফিরে যাও—ফিরে যাও । তোমাতে পরম প্রীতি প্রযুক্তই এই কথা বলছি । নতুবা আমার কথা পর্য্যন্ত আর তুমি শুনতে পেতে না । ফিরে যাও—আর মুহূর্ত্ত-মাত্রও বিলম্ব ক'রো না ।

সাবিত্রী । আপনি ষম ; কিন্তু নিজে নিয়ম ভঙ্গ ক'রে নামের সার্থকতা নষ্ট করছেন ! ধর্ম্মরাজ ! এবারে নিজের জন্ত নয়—জগতের কল্যাণ-সাধনের জন্ত আমি আপনার সঙ্গে চ'লেছি। যেহেতু জগতের ভিত্তিস্বরূপ যে ধর্ম্ম, তিনি যদি চঞ্চল হন, তা হ'লে সমস্ত জগৎ এক মুহূর্ত্তে ধ্বংস-প্রাপ্ত হবে। তাই আমি আপনাকে স্বপদে পুনঃপ্রতিষ্ঠিত ক'রতে এতদূরে এসেছি।

ষম । ষাঁ ! সে কি ব'লছ সাবিত্রী !

সাবিত্রী । আপনি আমাকে শতপুঞ্জের জননী হবার বর প্রদান ক'রেছেন, অথচ আমার স্বামীকে নিয়ে যাচ্ছেন। সত্যকরে নিজেই সে সত্যপালনের অন্তরায় হচ্ছেন। আপনি ষম,—চিরদিন নিয়মাবধীন। মাম্মাবশে আপনি আমাকে বরপ্রদান করেন নি। আমার পুণ্যবল আপনাকে আকৃষ্ট ক'রে বরপ্রদানে বাধ্য ক'রেছে। সুতরাং মিত্ররূপে আমি আপনার কাছে প্রার্থনা করি আপনি স্বধর্ম্ম পালনের জন্ত আমাকে পঞ্চম বর প্রদান করুন। আমি নিজে ব'লছি—সনাতন ধর্ম্মের অস্তিত্ব রক্ষা ক'রে আপনি পুরীপ্রবেশ করুন। নতুবা সেখানে আপনার আর প্রবেশাধিকার নাই।

ষম । ষাঁ ! তুমি কে ? কে তুমি ? কোন্ ভূবনপালিনী শক্তি ধর্ম্মকে আজ জ্ঞান শিক্ষা দেবার জন্ত স্বেচ্ছায় আপনাকে পতিবিরোগিনী ক'রেছ ? মা—মা ! উজ্জলতর আলোক সন্নিহিত হ'লে, স্বল্লোক যেমন অন্ধকারময় হয়, জ্ঞান-ময়ি ! তদ্রূপ তোমার সমীপস্থ হয়ে আমার সমস্ত জ্ঞান

বিলুপ্ত হয়ে আসছে! ধর্মকে ধর্মশিক্ষা দিতে, কে তুমি
করণাময়ী! তার পুরীর দ্বারদেশ পর্যন্ত উপস্থিত
হয়েছ?

সাবিত্রী। আমি সত্যবানের প্রিয়তমা ভার্যা—শাস্ত্রে আমার
নাম সতী। আমার অস্তিত্বে তোমার অস্তিত্ব। ধর্মরাজ!
শাস্ত্রাদেশে আমি তোমাকে আদেশ করছি—আমার
পদ গৌরব রক্ষা করে স্বপদে পুনঃ প্রতিষ্ঠিত হও।

যম। মা! এই নাও—সতী! জগতে মহিমা প্রচার করার
জন্তু—পুরুষ-প্রকৃতি-রূপে সৃষ্টিরক্ষার জন্তু—তোমার
চিরন্তন সামগ্রী পতিধন গ্রহণ কর। আর সেই সঙ্গে
আমার কোটা কোটা প্রণাম গ্রহণ কর। আমি ধন্ত—
আমার পুরী ধন্ত—আর এই অপূর্ণ পতিব্রতার মাহাত্ম্য
এই আঘাতাধিক্তি যে ভারতভূমি, তিনিও ধন্ত।

সাবিত্রী। কতদূরে এসেছি ধর্মরাজ?

যম। মা, আমার প্রিয়তমা দয়িতা! মৃতসঞ্জীবনী পুরীর দ্বারদেশে
উপস্থিত হয়েছ। যদিই মা, রূপা করে এতদূর এসেছ,
তা হ'লে একবার ~~তাকে~~ ~~দেখ~~

সাবিত্রী। ~~কি করে~~ ~~কি করে~~ ~~কি করে~~—এ কি দেখলুম
ধর্মরাজ!

যম। সম্মুখে উত্তপ্তজলা বৈতরণী, তার উপরে ওই মায়া-সেতু।
দেখছ মা—কি অপূর্ণ বিবিধ বিচিত্র বর্ণে রঞ্জিত!

পুণ্যাত্মা যখন এই স্থানে উপস্থিত হন, তখন এই সেতু কুসুমচ্ছন্ন পবিত্র পথ । পাপাত্মারা যখন উপস্থিত হয়, তখন এই সেতু পাপভেদে বিভিন্নমূর্ত্তি ধারণ করে । ওই দেখ মা—ওই দেখ কাঞ্চনময় । ওই দেখ—ওই দেখ—আবার বিবিধবর্ণ কুসুম-সমাকীর্ণ । ওই দেখ, আবার ভীষণ অগ্নিময়—সঙ্কর্ষণের মুখানলের তায় নীল জিহ্বা বিস্তার ক’রে পাপীকে গ্রাস ক’রতে আসছে । দেখ মা—আবার দেখ—প্রবেশ-পথে অগ্নি-অঙ্করে কি লেখা আছে দেখ—“জীব ! এখানে চিন্তা ক’রবার অবসর নাই ।” পাপী, সম্মুখে এই কণ্টকাকীর্ণ পথে যেতে সাহস না ক’রে, নদীতে ঝম্প প্রদান করে । আর অমনি উত্তপ্ত জলে দগ্ধ হ’তে হ’তে, জলশ্রোতে অন্ধকারময় নরক-কুণ্ডে নিপতিত হয় । মা ! এই বারে আমাকে অনুমতি কর । রাত্রি প্রহরাবশেষা—অনুমতি কর মা—পুরী প্রবেশ করি ।

সাবিত্রী । করুন :—(যমের প্রস্থান)—তার পর ? জ্ঞানশূন্য হয়ে যমের পশ্চাৎ পশ্চাৎ ছুটে এসেছি । কোন্ পথে এসেছি, কিছুই ত জানি না ! এখন কেমন ক’রে ফিরি !—গুরুদেব ! কোথায় তুমি ? এ সঙ্কটে তুমি ভিন্ন রক্ষা করবার যে আর কেউ নাই । এ প্রাণ-পুষ্পাধার মলিন না হ’তে হ’তে আমাকে ফিরতে হবে—কোথায় আছ দয়াময় ?—অভাগিনী নন্দিনীকে রক্ষা কর—জ্ঞানাজ্ঞান-শলাকায় চক্ষু উন্মীলিত ক’রে অজ্ঞান-অন্ধকার দূর কর । পথ দেখাও—পথ দেখাও ।

(মাণ্ডব্যের প্রবেশ ।)

মাণ্ডব্য । মা, মা—কই তুমি ?

সাবিত্রী । এসেছ—এসেছ—পিতা এসেছ ?—কই তুমি ? আর
যে আমি তোমাকে দেখতে পাচ্ছি না ।

মাণ্ডব্য । ভয় কি মা, এই যে আমি—এই যে আমি । কই—
আমার প্রাণ কই—সাবিত্রী ! আমার প্রাণ কই ! আমার
প্রাণ কই ?

সাবিত্রী । এই নাও—শীঘ্র নাও—অঞ্জলি নাও—তব দত্ত
সামগ্রী তুমি গ্রহণ কর

(গীত ।)

জীবন-ভাণী-কূলে এসে আবার পাছে ভেসে যাই ।
ভয়ে ভয়ে আসি, চরণে দাসী, রাখিল জীবন-কুশুম তাই ॥
মুছে নিয়ে গিয়েছিল শমন অকালে জলাট-বিন্দু,
চকিতে চাহিতে, দেখি চারিভিতে, অপার আঁধার সিঁদু,
দূর কর ভয় দয়াময়, আর না হারাউ—না হারাই—
অভয় চরণে রাখিনু যতনে, তুলে লও কোলে হে গৌসাই ॥

চতুর্থ দৃশ্য ।

অশ্বপতি ও মালবী ।

মালবী । কই মহারাজ, সাবিত্রী কই ? আমার জামাতা কই ?
বৃদ্ধ অন্ধ রাজা, আর বৃদ্ধা মতিবী শৈব্যা—তারাই বা
কই ? ঋষিগণ—তারাই বা কোথায় ? সব অন্ধকার !

আশ্রম শূন্য । কার কাছে আশ্রয় গ্রহণ ক'রব—কাকে আমার জামাতার কথা জিজ্ঞাসা ক'রব ? কে ব'লবে—সত্যবান্ বেঁচে আছে, আমার মেয়ে বেঁচে আছে । মহারাজ—মহারাজ ! কোথায় যাই ? কি করি ? সম্মুখে গভীর বন—কৃষ্ণা চতুর্দশীর ঘোর অন্ধকার—কাল আবরণে যেন আমাদের গন্তব্য পথ রোধ ক'রে ব'সে আছে । কি হবে মহারাজ—কি হবে !

অশ্ব । উতলা হয়োনা মহিষী ! এক বৎসর থেকে বিপদের জন্ত প্রস্তুত হয়ে আছি । বিপদের সম্মুখে এসে আত্মহারা হয়োনা ।

মালবী । ওগো অমন কথা ব'লোনা—দোহাই মহারাজ, আশ্বাস দাও । বল, আমার জামাতা বেঁচে আছে—সাবিত্রীর সিঁথের সিদূর অটুট আছে ।

অশ্ব । কেমন ক'রে থাকবে মহিষী ! দেবর্ষির বাক্য মিথ্যা নয় ।

(তুশ্বুরু ও মালিনীর প্রবেশ ।)

তুশ্বুরু । কখনই নয়, দেবর্ষি ঠাকুরের বাক্য—সেকি মিথ্যে হবার ঘো আছে ! কি বলিস বউ !

মালিনী । ও বাবা—টুকি ঠাকুরের কথা মিথ্যা হবে ! যেমনি একটা বছর গেছে, অমনি মালার ফুল আবার চন্‌চন্‌ ক'রে ফুটে উঠেছে ।

তুশ্বুরু । বাতাস অমনি ফুলের গন্ধ মাথায় ক'রে রন'রন ক'রে দিদিরাণীর কাছে ছুটে গেছে ।

মালিনী । ভোমরা পুটলীর ধারে বন্বন্ ক'রে ঘুরছে ।

তুষুরু । আর বউএর প্রাণ বন্ বন্ ক'রছে—দেবষি ঠাকুরের
কথা কি কখন মিথ্যে হয় !

অশ্ব । কিরে তুষুরু, কি ব'ল্ছিস ?

তুষুরু । আর বলাবলির সময় নেই মহারাজ ! এখন থেকে
গলাগলি । দিদিরাণী আর তার বরকে গলায় গলায়
মালা দিয়ে বাঁধব, তবে আমরা ঠাণ্ডা হব ।

অশ্ব । আ, হতভাগ্য অজ্ঞান ! কে তোদের এ বৃথা আশ্বাস
দিয়েছে ?

উভয়ে । টেকি ঠাকুর ।

মালবী । টেকি ঠাকুর কি ব'লেছে ?

মালিনী । দিদিরাণী আর বরের জন্ম মালা গেঁথেছিলুম । ঠাকুর
ব'লেছিল—এক বৎসর পরে মালা এখানে নিয়ে
আসতে ।

তুষুরু । দিদিরাণীর বরের নাকি আজ যমের বাড়ী নেমস্ত্রণ
আছে ! নেমস্ত্রণ সেরে ফিরে আসবে, দিদিরাণীর পাশে
ব'সবে, আর আমরাও অমনি মালা নিয়ে হাজির
হব ।

মালবী । এসব কি ব'ল্ছিস ! তুষুরু—তুষুরু, স্পষ্ট ক'রে বল—
নগামূল্য পুরস্কার দেবো । সত্য ক'রে বল—দেবষি কি
ব'লেছেন । সাবিত্রীর বর কি বেঁচে আছে ?

তুষুরু । বেঁচে আছে—তবে এখনও যমের বাড়ী আছে, কি
গাছতলায় ফিরে এসেছে, সেটা ব'লতে পারছি না । ওই
বাবাঠাকুর আসছে—ওঁর কাছে খবর নাও মহারাজ ।

। (মাণ্ডব্যের প্রবেশ ।)

মালবী । দয়াময়—দয়াময়, কোথায় ছিলে ? তোমার দাস-
দাসী যে অভয়পদ দেখতে না পেয়ে জগৎ অন্ধকার
দেখছিল !

অশ্ব ! দয়াময়, দাসের প্রণাম গ্রহণ করুন ।

মাণ্ডব্য । কে ও—মহারাজ ! কতাকে দেখতে এসেছ ? জামা-
তাকে দেখতে এসেছ ? এস মহারাজ, এস রাণী, দেখ্বে
এস । তোমার নন্দিনী ধর্ম্মরাজকে পরাস্ত ক'রে, তার
হাত থেকে স্বামীকে উদ্ধার ক'রে এনেছে । দেখ্বে
এস—স্বর্গীয় আলোকে উজ্জ্বলাঙ্গ পতির পাশে সতীরাগীর
কি অপূর্ব শোভা !

মালবী । প্রভু—প্রভু, ব'ল্ছেন কি ! বুঝতে পা'রছি না ।
আমার মাথা ঘুরছে । নন্দিনী জ্ঞানশূন্য, তাকে রক্ষা
করুন ।

অশ্ব । ধন্য আমি, এমন কতাকে লাভ ক'রেছি । রাণী ! ধন্য
তুমি, সাবিত্রীকে গর্ভে ধারণ ক'রেছ । প্রভু ! সে
শোভা দেখবার জন্য আমি আকুল হয়ে উঠেছি ।

মাণ্ডব্য । আগুন মহারাজ ! তুষ্টক, তুমি নীরব কেন ? মালা
কই ? মালার অপেক্ষায় তোমার দিদিরাণী যে ব'সে
আছে । মালিনী, তুমিও নীরব কেন মা !

মালিনী । হাঁ দেবতা—কিছু নীরব আছি । যখন যমের বাড়ী
থেকে বর আস্ছে, তখন যমদূত গুলো ত বরষাত্র হয়ে
এসেছে !

কোড় অঙ্ক

— * —

(আসনোপরি উপবিষ্ট সাবিত্রী সত্যবান্ ।

সম্মুখে মাণ্ডব্য ; উভয়পার্শ্বে অশ্বপতি, মালবী,
দ্রুমৎসেন, শৈব্যা, অলিঙ্করা, তুম্বুরু ও
মালিনী)

অলি । কেমন সাবিত্রী—কেমন ভগিনী ! যমের সঙ্গে কে যুদ্ধে
জিতুলে ? তবে নাকি বিধিলিপির খণ্ডন নেই ? তবে
কৰ্ম কেন ? ব্রত-নিয়মাদি কেন ? ভগবান্ নিজস্ব
কৰ্মের অজস্র প্রশংসা ক'রেছেন । এ জগতে কৰ্মই
বলবান্ ।—

কৰ্মণা জায়তে জন্তুঃ কৰ্মণৈব প্রলীয়তে ।

স্বখং দুঃখং ভয়ং ক্ষেমং কৰ্মণৈবাভিপত্ততে ॥

সাবিত্রী । ভগিনি ! এ সমস্তই ত তোমার আশীর্বাদ ।

অলি । সাবিত্রি ! অসাধারণ অধ্যবসায়, অবিচলিত উৎসাহ,
গুরুভক্তি, পতিস্নেহ ও ব্রত-নিয়মাদি দ্বারা তুমি যে
অলৌকিক কার্য সাধন ক'রেছ, অনন্তকাল ধ'রে তুমি

সেই কুর্মফল ভোগ কর । স্বরচিত এই পবিত্র সংসার-
উদ্ধানের অধিষ্ঠাত্রী দেবী হ'য়ে সমস্ত সংসারে আলোক
বিকীর্ণ কর । শতব্রাতার ভগিনী হও, শতপুত্রের জননী
হও । অ - দেখাও—যেখানে, যে সময়ে, তুমি যে
ভাবেই অবস্থিতি কর না কেন, তুমিই গীতা, তুমিই
গায়ত্রী, তুমিই ভগবতী । তুমিই জননী, তুমিই কন্যা,
তুমিই ভগিনী । সহধর্ম্মিণীরূপে ধর্ম্মরক্ষার জন্ত তুমি গৃহে
গৃহে মূর্ত্তিমতী হও । পৃথিবীতে সোণার সংসারের প্রতিষ্ঠা
হোক । সুধার লহরে ধরনী ভেসে যাক্ ।

(গীত ।)

তারে তারে বাঁধা প্রাণ ।
মিলনে মিলনে তোলে জীবনে ললিত গান ॥
সোণার হুথের প্রাতে,
অঁধারে আবরিতে,
কাল নিশি করে অভিযান ;—
জাগো সতী জাগো সতী,
যুচাও তামসী-রাতি,
দাও জ্ঞান রাখ মান, আকুলে কুল কর দান ॥

মাণ্ডব্য । তুম্বুরু, নীরব কেন ? আনন্দ কর ।

তুম্বুরু । আমি যে মুরুক্ষু দেবতা !

মাণ্ডব্য । আমার আশীর্ব্বাদে তোমার কণ্ঠে সরস্বতী নৃত্য
করুন ।

তুধুর্ন ।

(গীত)

প্রভাত অরুণকণ রঞ্জিত কানন,

বিকসিত কমল পলাখে ।

মত্ত মলয়ানিল সেবিত সরোবর

শীকর নিকর অভিলাষে ॥

কোকিল পঞ্চম মুখরিত কুঞ্জে, মধুকর চুস্থিত হৃমনস পুঞ্জে,

বিহরতি মদন বিলাসে ।

তাজ আলস, কুক লালস জাগৃহি জাগৃহি শীতবাসে ?

~~শবনি~~ পতন ।

